

Luk

Od Uyu Irouya

¹ Musei idi, amã atun ereb ereb wowã yen anĩ, ditotauf nigin age difen, ² are biya od nẽ kabĩ tamo uyulil dibod ken, meledim dilen anidi bun tamal, anĩ wogõ difaman. ³ Age fiya nigin, aya yug bagai, gariya bunem ereb wowã yen anĩ ganan amir ailen, are aya kisi afen, tamo odug Teofilus õ bun el fe, itotoya nigin biya bagai aun, ⁴ anĩ bunem, õ ereb ereb difelnon are momoi yeya anĩ keleĩ youf.

*Jon Naan Igunẽ*diya Tamo Gõ Fiya Sã Mog, Anĩ Ket Wogõ Yen

⁵ Herod Judia nẽ king ibodon sain bun, pris taka ibodon, in yana Sekaraia, ã Abiya nẽ pris bun tamal taka, in aiwa Elisabet ãg Aron nẽ ibor bun tamal. ⁶ Idi urom Negur mala bun madur dibodon, idi Odug nẽ ãtãfiya ganan ado nun el de, tutuk dõ difedig. ⁷ Anĩ ere, idi urom kesu sã, ere nigin, Elisabet ã dali, kesu gõ fiya kisi feleya sã, agef fen, idi urom tubau bagai.

⁸ Sain taka bun, Sekaraia, ne kabĩ tura tar geid kabĩ dale mog, ã Negur nẽ pris kabĩ yale fen, ⁹ pris idi neid tobonunã bunem, Odug nẽ tempel namen ile fen, aa gaula sumeĩ biya tõ fiya nigin aisaĩ kodẽ bunem ã digirnen. ¹⁰ Aa gaula sumeĩ biya tõ fiya saine di, idi Odug yana dalesedig ganan mayarẽ kosẽ den.

¹¹ Agef mog, Odug nẽ engel, ã bun wõ ye, alta aa gaula sumeĩ biya tõ fiyadig anĩ ima biyalẽ ifaren. ¹² Age fe di, Sekaraia ã ile fen, ã terẽ ye mã, kumĩ ye fen, dẽ yelen. ¹³ Anĩ ere, engel ã irokenen, “Õ to kumĩ wo, Sekaraia, ogon

kosēya are Negur ī karī yen. Ogon aiwā Elisabet ī, ogon kesu monog gō fouf, age fe di, in yana ū, Jon wouf. ¹⁴ Ī bunem waū kulīya ado waū al fiya ō bun ibodōf, age fe di, musei ī gō fouf bun waud al fouf, ¹⁵ ere nigin, Odug mala bun ī yana odug adouf, ī wain be, aai naan total falei difef anīg to yāf, agef fen, ī sina namenem Awa Uur Fateulem aura fiyēf. ¹⁶ Israel tamo kayau musei fau inim, Odug, nedi Negur wagen kel gurif irou ilauf. ¹⁷ Agef fen, ī Eliya nē uur ado megeir bunem, Odug fau ileya sā mog, ī ket uyu irou ile fen, temeid tar, naaluid tar nigin waud yenēf nigin ado, fe temeleid idi madur ibodōya nē kisi biya bun ileya nigin falei fe fen, tamo kayau Odug nē anidi saika fediyouf.”

¹⁸ Sekaraia engel to fiyen, “Naig afe fen, aya enei keleī youf? Aya neu kayau ado urom mabodok masi, tubau bagaif.”

¹⁹ Engel aiten yale iron, “Aya Gabriel. Aya Negur mala bun afaredig, anī nigin, aya ō wogō yōya nigin ado, biya od enei irokonōya nigin sur fiyal. ²⁰ Anī gama ō ait ufokol fen, od to wogō wof ule, anī wō youf naa bun, ere nigin, ō neu od to momoi wol, od enei are fau yogon sain bun bagai, kaū wō youf.”

²¹ Age fe di, tamo kayau Sekaraia tari de fen, idi ī sain meluk tempel namen ibodon nigin kisi musei dalen. ²² Ī ulō yesin sain bun, ī wogō fiyēdiya kisi feleya san. Age fe di, idi kelein, ī tempel namen mala seleulā kurāf fen, ereb taka ilel, ere nigin, ī imam dogol ifelneīd fen, ī wogōya sā ibodok ilen.

²³ In kabī nē sain bure fele di, ī fō bun kel ilen. ²⁴ Anī bure fele di, in aiwa Elisabet bou adon, agef fen, ogō faif ī iminkel ibodon. ²⁵ Ī iron, “Odugem enei age fanan. Naa eneidi bun, ī yogon oroya ado wau ifenēya ifelnan, agef fen, neu mama tamo kayau atun yalelkanan.”

Jesus Gō Fiya Sā Mog, Anī Ket Wogō Yen

²⁶ Ogō sigis bun, Negur, engel Gabriel Nasaret taun, oun Galili teneub, sur fiyē di, ile, ²⁷ kayau taulei, tamo yana Josef, Dawid nē ibor bun tamalem yalouf nigin digirin gein ilen. Kayau taulei yana Maria. ²⁸ Engel ī gein ile fen, iron, “Fel, ō nigin Negur fatuk el yok. Odug ō ado ibodok.”

²⁹ Maria in od nigin wau fatuk togu fen, aanya enei naig fiya nigin ye fen, kisi musei yalen. ³⁰ Anī ere, engel ī irokenen, “Maria, ō to kumī wo, ō Negur nē wau el fiya gurug wol. ³¹ Ō fau kesu ado fen, kesu monog gō wouf, ago fen, yana ũ, Jesus wouf. ³² Ī fau odug wō ye di, Negur Ilun Bagai Naal douf. Negur Odug yogo, king nē modoū tama Dawid nē anī, ī ifenēf. ³³ Age fe di, ī Jakop nē ibor bun king gai ibodkalauf, in tano to sa kalauf.”

³⁴ Maria engel to fiyen, “Aya fau mois, eī naig fe wō youf?”

³⁵ Engel ī aiten yale iron, “Awa Uur Fateul ō bun isiyouf, age fe di, Negur Ilun Bagai nē megeir kerub yōf. Anī bunem fateul bagai gō wouf are, yana Negur Naal douf. ³⁶ Ogon sirag Elisabeteg tubau mog, kesu yalouf, ī dali den, anī mogo ogō sigis ī bou ado ibodok. ³⁷ Ere nigin, ereb taka anī Negur bun malai sā.”

³⁸ Maria ī aiten yale iron, “Aya Odug nē kabī kayau, aya bun od sā, ō urok kilei od sā agef wō youf.” Age ye di, engel ī itornē ilen.

Maria Elisabet Ki Fiyen

³⁹ Sain anī bun, Maria dodok fel, kaisā bagai taun taka arei bun, Judia distrik nediwon ilen. ⁴⁰ An ī Sekaraia nē fō bun wō ye fen, Elisabet fel fiyen. ⁴¹ Sain Elisabet Maria nē fel ya anī karī ye fen, kesu sina namen ibodon anī okī yen, age fe di, Elisabet Awa Uur Fateulem aura fiyen. ⁴² Ī ait odugem iweig iron, “Kayau ganam atun, Negur ō el yok. Agef fen, kesu gō wouf anīg, Negur ī el fiyek! ⁴³ Anī ere,

aya naig fiya bagai nigin, neu Odug nē sina anī aya bun isif? ⁴⁴ Ogon fel ya nē ait wederoun ile mog bagai, momou nameun al fe fen, okī yel. ⁴⁵ Kayau taka, ī ereb Odug ī irokenek are agef kisi fel wō youf, ye fen, momoi yef, are Negur ī el fiyek!”

Maria Nē Seg

⁴⁶ Age fe di, Maria iron:

“Neu malaukanon Odug yana yalesef,

⁴⁷ agef fen, neu uur Negur Isennaya nigin kulī yef,

⁴⁸ ere nigin, ī, aya yogon kabī kayau maleg nigin
kisi fatuk yalen.

Sain enei bunem ilauf ganan, ibor ganan Negur ī el fiyen
douf,

⁴⁹ ere nigin, Negur Megeir Barikā ī aya bun ereb odug
age fel,

ī yana fateul ibodok.

⁵⁰ In wau yūya, ī nigin anini def bun tobol fouf,
ibor gama ibodok enei ado, dumen isiyouf idi buneg
gai gai ibodkalauf.

⁵¹ Ī yogo imam kabī total odug biya age fedin,
ī idi neid kisi bun yeneid dalesef anī irudi di, firaga-
gaū difen.

⁵² Ī yeneid adodo, nedi modoū bun yalelneīd fen,
maleg anī yalesnēdin.

⁵³ Ī idi naū fedif anī, ereb ereb biya ifeneīd fen,
idi safineid adodo daku irudin.

⁵⁴ Ī amā tubumā tar irokenēdin kilei,
ī yogon kabī tamo Israel isennen,

⁵⁵ agef fen, Abraham ado in ibor nē tubu tar bun faimud,
wau yūya ifenēdiya nigin karī yeledig.”

⁵⁶ Maria, Elisabet ado ogō towo age fiya dibod ken, fō
bun kel ilen.

Jon Naan Igunēdiya Tamo Gõ Fen

⁵⁷ Elisabet nē kesu gõ fiya sain wõ ye di, ï kesu monog gõ fen. ⁵⁸ ï ne tã tar, in sirag tar geid, Negur nē wau yūya odug ifelnen anī karī de fen, idi weim waud al fen.

⁵⁹ Naa eit bun, idi mulū nigin kesu bou gudū fiya nigin disin, age de fen, ï yana dū, tama nē dait Sekaraia douf nigin age difen. ⁶⁰ Anī ere, ne sina aitedin yale iron, “Age fiya sã! ï yana Jon ye yauf.”

⁶¹ Idi ï dirokenen, “Ogon sirag tar atun, yana age fiya taka sã.”

⁶² Age de fen, in tama bun kesu yana aib youf anī karī douf nigin, uris difenen. ⁶³ Age dife di, ï itotoya nē safina nigin to fiyēdin, agef fen, “ï yana Jon,” ye itoto di, idi ganan terē den. ⁶⁴ Sain anī bun bagai, ï awa kakã ye di, bale faraf yale ulō yalaisi di, ï wogō ye fen, Negur yana yalesen. ⁶⁵ Ne tã tar terē de fen, anini den, age de fen, Judia neid arein, fonō fonō wogagã de fen, ereb wõ yen anī ganan wogō den. ⁶⁶ Adok anī karī de fen, kisi musei dale fen, to difen, “Kesu enei naig fiya wõ youf?” Ere nigin, Odug nē ima ï bun ibodon.

Sekaraia Nē Seg

⁶⁷ In tama Sekaraia Awa Uur Fateulem aura fiyē di, ï profet od eig ye wogō yen:

⁶⁸ “Odug seli tabiyof, Israel neid Negur,
ere nigin, ï isi fen, in tamo kayau kafī fiya bun tamal kel gei fel.

⁶⁹ ï yogon kabī tamo Dawid nē fõ bun,
isennadaya megeir ado yalesel ifaref,

⁷⁰ (are ï yogon profet fateul kulu temeleid sigoreid bun wogō den kilei).

⁷¹ Nemã kiwai tar ado,
amã nigin to orodif anī imeid bun tamal, kel yalemãf.

⁷² Nemã tamamã tar nigin wau yūya anī ifelneid fen,

ĩ yogon bar itenēya fateul anĩ karĩ yelen.

⁷³ Ĩ wau kuturol fen, nemã tamamã Abraham irokenen.

⁷⁴ Nemã kiwai tar imeid bun tamal kel gei famãf,
agef fen, amã kumĩ sã ĩ aruna yaleya kisi falauf nigin.

⁷⁵ Amã nemã mabodok malauf bun, ĩ mala bun gai fateul
bagai fen, madur bagai mabodõf nigin.

⁷⁶ “Age fe di, õ neu kesu, Negur Ilun Bagai nẽ profet douf,
ere nigin, õ uyu urou fen, Odug nẽ naab dodok wouf.

⁷⁷ In tamo kayau neid mosor nigin wedereid tu kalauf
bunem,
kel yalediyouf nẽ keleĩ wenēdiyof.

⁷⁸ Are nemã Negur molol nem wau yũya bunem,
anĩ bun gaa kurã fiya, saa ilunem amã bun isiyouf.

⁷⁹ Are idi gugum bun difaref ado,
laa nẽ buri bun difaref anidi bun, fula fouf,
age fe di, nemã yemã delē anidi bun madur marã di, wau
inosiya bun malauf.”

⁸⁰ Age fe di, kesu biya fen, uur orib yen, ĩ gerere tuan
ibodok ile, dum ĩ Israel tamo kayau meleid bun wõ yen.

2

Jesus Gõ Fen (*Matyu 1:18-25*)

¹ Sain anĩ bun, Sisa* Ogastus, Rom teneub ganan bun,
tamo kayau an temeleid anĩ yeneid yaleya nigin od inon.

² (Eĩ urug bagai, sain Kwirinius ĩ Siria nẽ gawaman mudur
ibod mog, tamo kayau yeneid dalen.) ³ Anĩ nigin, ganan
dogo dogo neid taun bun yeneid inoya nigin dilen.

⁴ Anĩ nigin, Josef ĩg, oun Galili teneub Nasaret taun bun
tamal Judia iselen, Betlehem Dawid nẽ taun bun iselen,
ere nigin, ĩ Dawid nẽ fonõ ado in ibor bun tamal. ⁵ Ĩ

* **2:1:** Rom neid king odug.

Maria ado yeneid dinouf nigin diselen, ï Maria aiwauf nigin digirin, anï ï bou ado. ⁶ Idi an dibod mog, kesu gō fiya sain wō yen. ⁷ Age fe di, kesu monog matu gō fen. Maria ï gabar nem silef fen, yaro neid beï bun inenen, ere nigin, tamo irouya fō bun modoũ isokosen.

Gaar Lo Fediya Tamo, Engel Geid

⁸ An gaar lo fediya tamo, melsã fonō yerin dibod ken, bō nedi gaar lo difedin. ⁹ Age de mog, Odug nē engel idi bun wō yen, age fe di, Odug nē fula fiya medeïya kerub fedidi, idi kumï tererē den. ¹⁰ Anï ere, engel idi irokenēdin, “Ã to kumï wog, aya od biya, tamo kayau ganan waud al foug nigin arou asif. ¹¹ Ere nigin, gama Dawid nē taun bun, āgenei isenneïya wō yel, ï anï Kristus Odug. ¹² Enei ã bun uris. ã momou taka gabar nem sile de fen, yaro neid beï bun dinenem yenek anï ulogouf.”

¹³ Kaisã bagai, engel musei saa ilun temeleid ulolō deis, engel anï geid Negur yana dales diron,

¹⁴ “Negur ilun bagai bun fula fiya medeïya, age fe di, tenebur ein tamo kayau ï el fedif bun, wau inosiya ibodōf.”

¹⁵ Sain engel idi ditorneïd, saa ilun disele di, gaar lo fiya tamo abob dirokenen, “Odug ada irokanadal anï nigin, ada Betlehem teleg, ereb wō yel anï taileg.”

¹⁶ Anï nigin, idi kaisã bagai dile, Maria, Josef ado diledin, momou yaro neid beï bun yen mog, dilen. ¹⁷ Idi ï dile fen, idi kesu anï nigin wogō fiyēdin anï od wogō de diyon. ¹⁸ Age dife di, ganan karï den idi, gaar lo fiya tamo wogō difiyēdin anï nigin terē den. ¹⁹ Anï ere, Maria od anï ganan yale fen, waun ino fen, kisim dogol fen. ²⁰ Gaar lo fiya tamo keku de fen, idi wogō fiyēdin kilei, ereb idi karï den ado dilen anï ganan nigin, Negur seli dabi fen, yana dalesen.

Jesus Tempel Bun Dirou Dilen

²¹ Naa eit bun, ï mulũ ileyã saine di, ï yana dũ, Jesus den, yana are sina fau bou ado ya sã mog, engelem yun.

²² Idi neid nonorou lilik fiya naa, Moses nẽ Lo ifaref kilei anĩ bure fele di, Josef Maria ado, Jesus Jerusalem, Odug ifenẽya nigin dirou diselen, ²³ (are Odug nẽ Lo itotoya bun ibodok kilei, “Kesu matu monog wõ douf ganã, Odug wenẽdigouf”*), ²⁴ idi Negur sesewi fiya difenẽf nigin diselen, Odug nẽ Lo eig ye irok kilei, “kuburir uru be, kukutir balas uru be.”*

²⁵ Gama Jerusalem an tamo yana Simeon ibodon, ï madur bagai fen, Odug nigin karĩ yeledig. ï Israel waud inosiya dalouf anĩ tari fedig, Awa Uur Fateul ï bun ibodon.

²⁶ Awa Uur Fateulem, ï fau to laaf mog, Odug nẽ Kristus wõ ye di, ilouf nigin irokenen. ²⁷ Awa Uurem toli fiyẽ di, ï tempel nẽ modoũ bun ilen. Sain tama sina ado, Lo irok kilei age difouf nigin, kesu Jesus dirou dile di, ²⁸ Simeon imam ï yales fen, Negur yana yales iron:

²⁹ “Odug, õ uron kilei, õ gama ogon ferfer wau inosiya ado sur wo di, ilauf.

³⁰ Aya malaum bagai ogon isennẽya anĩ ailel.

³¹ Are ganã meleid bun saika won.

³² Are haiden Israel sã anidi bun, Negur nẽ oroya kurõ falaisiya nẽ lalan, ago di, are ogon tamo kayau Israel bun fulã fiya medeĩa.”

³³ Kesu tama sina ado, od anĩ karĩ de fen, kisi bun terefeit den. ³⁴ Age dife di, Simeon el fiya ifeneid fen, sina Maria irokenen, “Kesu enĩ, Israel tamo kayau musei kuku douf, musei fafã douf nigin ado, ï daũ gen ifare di, ï dumen od sane dirõf nẽ uris wõ youf nigin igirnen. ³⁵ Anĩ bunem, musei waud bun dinokok are yaorouf. Age fe

* **2:23:** Eksodas 13:2, 12 * **2:24:** Levitikas 12:8

di, ogon malākanon anīg dig otem borū foug.” ³⁶ Profet kayau takag ibodon, Ana, Fanuel ne barai, Aser nē ibor bun tamal. Ī gai tubau bagai, ĩ tamo yale fen, aiwa ado yar sewen dibodon. ³⁷ Agef fen, ĩ waab ibodok ile, in yar eiti-fo. Ī tempel to itoron, bō ado gaa ado kuri ye fen, kosē ye, Negur yana yalesedig. ³⁸ Sain anī bun bagai, ĩ idi gein isel, Negur de fiye ken, Jerusalem tamo kayau kafī fiya bun tamal kel yalediyoug nigin ganan tari de difaren anidi, kesu anī nigin wogō fiyēdin.

³⁹ Josef, Maria ado, Odug nē Lo irok anī ganan dō de kisi fele di, idi baban ke de, Galili teneub oun, nedi taun Nasaret dilen. ⁴⁰ An, kesu ĩ biya fen, tofol adon, ĩ kisi biya barikan, agef fen, Negur nē wau ifenēya ĩ bun ibodon.

Jesus Kesun Tempel Bun Ilen

⁴¹ Yar ganan bun, in tama sina Pasa Sifa naa bun Jerusalem taun diledig. ⁴² Sain ĩ tuwelf yar mog, idi neid tobonunā dō de fen, Sifa bun diselen. ⁴³ Sifa bure fele di, in tama sina fonō ke de dile mog, kesu Jesus ĩ fau Jerusalem ibodon, anī ere, idi to kelein. ⁴⁴ Idi weim melef den, age de fen, naa tekelei diyon. Age dife fen, idi mogo nedi sirag tar bun ado, nedi tā tar atun dimirnen. ⁴⁵ Idi ĩ to dile mā, idi ĩ dimirnē fenē nigin, Jerusalem taun baban ke de dilen. ⁴⁶ Naa towo bure fele di, idi ĩ tempel modoū bun ifelnēdiya tamo atun ibod, karī fiyeīd fen, to fiyeīd mog, fotou difiyen. ⁴⁷ Ganan ĩ karī difiyen are, in karīya nigin ado aiteid solo fen anī nigin, terefeit den. ⁴⁸ Tama sina ado ĩ dile fen, fatuk bagai terē den. Sina ĩ irokenen, “Neu kesu, ere nigin eig wamam? Aya tamā ado waumā morō ken, mamirnom.”

⁴⁹ Ī to fen, “Ere nigin ā aya umirnegel? Aya neu Dei nē fō bun abodōf ya, ā keleī sā de?” ⁵⁰ Anī ere, ĩ ereb irokenēdin are, idi to kelein.

⁵¹ Age dife di, ï weim Nasaret disil fen, sigoreid dōf el fen. Anĩ ere, in sina anĩ ganan yale, waun inon. ⁵² Jesus kisi biya ado bouwa orib yen, Negur ado tamo nē lo fiya bun biya len.

3

*Jon Naan Igunēdiya Tamo Naab Dodok Fenen
(Matyu 3:1-12; Mak 1:1-8; Jon 1:19-28)*

¹ Taiberius, Sisa mudur ibodon yar fiftin bun, Pontius Pailat ï Judia distrik nē gawaman mudur ibodon, Herod ï Galili distrik lo fen, ï tura Filip Ituria distrik ado Trakonitis distrik lo fen, age fe di, Lisantias ï Abilene distrik lo fen.

² Anas Kaiafas ado pris mudur dibodon sain bun, Negur nē od gerere tuan oun Jon, Sekaraia naal bun isin. ³ ï Jordan naan kalilĩ fiya ganan bun iyo ken, waud falei de fen, naan digũ di, mosor yalel kenēdiyof nigin biya od wogõ yen. ⁴ Are profet Asaia nē itotoya bun ibodok kilei: “Ait taka gerere tuan iweig irok, ‘Odug nē naab dodok ge fen, madur wenēg. ⁵ Uus ganan bun kurokirĩa yoso foug, arei ganan mudu ganan ado gudũ falaisi tenebur ouf. Naab goigul yedin, madur foug, naab koũkĩ yediya yoso fediyof. ⁶ Age fe di, tamo kayau ganan, Negur nē tamo kayau kel gei fiya anĩ dilouf.’ ”*

⁷ Tamo kayau Jonem naan igunēdiyof nigin guru difen anidi Jon irokenēdin, “Ā, gogour sane gere tar! Negur nē didi isiyof anĩ wal ge fen, uyagauf nigin, aim irokenein?

⁸ Wauĩ falei gef are, faat biya ũ gouf. Ā aug nigin to eig ge urõg, ‘Abraham nemã tamamã.’ Aya arokeneik, meein enidi Negur sã irõ di, Abraham gere tar wowã douf. ⁹ Safor aayũ gariyan mogo ibodok, aayũ ganan faat biya to yuk, are itu ira ken, yã malan iráf.”

* **3:6:** Asaia 40:3-5

¹⁰ Tamo kayau guru difen anidim to difen, “Age fiyauf are, amã naig mafouf?” ¹¹ Jon aitedin yale iron, “Tamo ï gabar uru adouf are, aib ï sã anĩ taka ifenēf, takag, taka ï saaf adouf, areg de age fouf.”

¹² Takis yaleya tamog, naan igũya nigin disin, idi to difen, “Tise, amã ere naig mafouf?”

¹³ Ï irokenēdin, “Å yaleya kilei anĩ to wal woseg waleg.” ¹⁴ Age fe di, kusĩ tamo tunĩ to difiyen, “Ba amã ere naig mafouf?” Age de di, ï iron, “Å nedi moni nigin ge fen, to fefu wiyēdig fen, idegēya bunem tamo kayau bouweid bun od to ũg. Ågenei kabĩ mala walegedig anĩ bun dogol al gouf.”

¹⁵ Tamo kayau Kristus nigin tari difen, anĩ nigin, idi ganan waud bun Jon anĩ Kristus be de fen, kisi musei dalen. ¹⁶ Jon idi ganan aitedin yale irokenēdin, “Aya naan nem naan aguneik. Anĩ ere, taka ï in megeir neu wal fiya fau isif, aya to biya nigin, ayam in su nē malũ biru felediya kisi feleya sã. Ï Awa Uur Fateul yã ado nem naan iguneif. ¹⁷ Ï es fiya nē fok iman ado, ï yogon mayã waĩ fouf, yogon wit biya are yogon ki bun kuruf fen, wit ido yã mala faimud bun an irãf.” ¹⁸ Agef fen, Jon od musei bunem, tamo kayau waud yale fen, biya od wogõ fiyēdin.

¹⁹ Anĩ ere, Jonem, Herod tano anĩ nē mudur, tura nē aiwa Herodias nigin ado ereb ereb sane ganan age fen nigin ou fiyē di, ²⁰ Herod mosor ganan mosor enei ado baguf fen, ï Jon kalabus bun inenen.

Jesus Naan Igun Ado In Ibor Nigin (Matyu 1:1-17; 3:13-17; Mak 1:9-11)

²¹ Sain Jonem tamo kayau ganan naan iguneid fen, Jesus ïg naan igunen. Age fe di, Jesus kosē ye mog, saa kã fele di, ²² Awa Uur Fateul kuburir bouwa bun genem ï bun isin.

Age fe di, ait taka saa ilunem isin, “Õ neu Kesu, ò nigin aya wau laa fedig, ò nigin aya wau kulī yedig.”

²³ Gama Jesus yogo ī yar teti age fiya bun kabī gariya inon. Tamo kayau kisi difen, ī Josef naal den,

Heli naal, ²⁴ Matat naal,

Lewi naal, Melki naal,

Janai naal, Josef naal,

²⁵ Matatias naal, Amos naal,

Nahum naal, Esli naal,

Nagai naal, ²⁶ Mat naal,

Matatias naal, Semen naal,

Josek naal, Joda naal,

²⁷ Joanan naal, Resa naal,

Serubabel naal, Sieltiel naal,

Neri naal, ²⁸ Melki naal,

Adi naal, Kosam naal,

Elmadam naal, Er naal,

²⁹ Josua naal, Elieser naal,

Jorim naal, Matat naal,

Lewi naal, ³⁰ Simeon naal,

Juda naal, Josef naal,

Jonam naal, Eliakim naal,

³¹ Melea naal, Mena naal,

Matata naal, Natan naal,

Dawid naal, ³² Jesi naal,

Obed naal, Boas naal,

Salmon naal, Nason naal,

³³ Aminadab naal, Ram naal,

Hesron naal, Peres naal,

Juda naal, ³⁴ Jakop naal,

Isak naal, Abraham naal,

Tera naal, Nahor naal,

³⁵ Serug naal, Reu naal,

Peleg naal, Eber naal,

Sela naal, ³⁶ Kainan naal,

Arpaksad naal, Sem naal,

Noa naal, Lamek naal,
³⁷ Metusela naal, Enok naal,
 Jared naal, Mahalalel naal,
 Kenan naal, ³⁸ Enos naal,
 Set naal, Adam naal,
 Negur naal.

4

Satan Jesus Kisi Fiyen

(Matyu 4:1-11; Mak 1:12, 13)

¹ Jesus Awa Uur Fateulem aura fiyen, Jordan naanum kel fen, Awa Uurem itonē, gerere tuan irou ilen. ² An ã naa foti ibod mog, Satanem kisi fiyen. Ì sain anĩ bun ereb taka to yon, naa foti bure fele di, ì naũ fen.

³ Agef mog, Satanem Jesus irokenen, “Õ Negur Naal ouf are, meein enei urokenē di, bret falei fouf.”

⁴ Jesus Satan aiten yale iron, “Negur nē Itotoya bun eig ye irok, ‘Tamo bretem dogol to mata ifenēf.’*”

⁵ Satan Jesus yale irou, modoũ ilun isel fen, kaisã bagai teneub enei nē tano ganan ifelnen. ⁶ Agef fen, Satan Jesus irokenen, “Aya õ teneub enei nē biya fiya megeir ado ganan afonõf, ere nigin, are aya ifanan, anĩ nigin, aya aib taka ifenēya orouf are afenēf. ⁷ Anĩ nigin, õ aya selu wabiyouf are, onou ganan are ogon ouf.”

⁸ Jesus Satan aiten yale iron, “Negur nē Itotoya bun eig ye irok, ‘Odug ogon Negur seli wabi fen, ì dogol aruna walouf.’*”

⁹ Satan Jesus yale irou, Jerusalem taun ilen, an tempel fõ soko ilun bagai inenē, ifaren. Satan iron, “Õ Negur Naal ouf are, ogo einenem ufũ urã. ¹⁰ Ere nigin, Negur nē Itotoya bun eig ye irok:

“ ‘Negur õ nigin yogon engel ari fedì di,

* **4:4:** Diuteronomi 8:3 * **4:8:** Diuteronomi 6:13

- kulatun diyōf,
¹¹ idi ō imedim ololon daleyōf,
 age dife di, ō yē meein takam to itutu ouf.”*
¹² Jesus Satan aiten yale iron, “Eig ye irok, ‘Odug ogon
 Negur kisi fiya bun to unenē.”*
¹³ Satan kisi fiya enei ganan bure fel fen, ī Jesus itorne
 ken, ī fau sain taka anī tari fen.

Nasaret Tamo Kayau Idi Jesus Dudum Difiyen

(*Matyu 4:12-17; Mak 1:14, 15*)

- ¹⁴ Jesus Awa Uur nē megeir bunem Galili kel ilen, age
 fe di, ī nigin od Galili teneub fonō fonō ganan iyokelen.
¹⁵ Ī idi neid uub fō fō bun biya od ifelnēdi di, ganan ī yana
 dalesen.
¹⁶ Ī Nasaret ilen, ī an biyan nē, agef fen, Sabat naa* bun,
 idi neid uub fō namen ilen, gai age fedig gen. Agef fen, ī
 iwesauf nigin fā ye ifaren. ¹⁷ Age fe di, profet Asaia nē
 itotoya buk kori fiya anī difenen, age dife di, ī fara fel fen,
 eig ye itoton anī imiren:
¹⁸ “Odug nē Awa Uur aya bun ibodok,
 ere nigin, ī aya maleg anidi biya od wogō afediyouf
 nigin, igrna fen,
 mudurou bun moul fi felen.
 Ī, aya kalabus bun difaref anidi karika dalouf nigin ado,
 meleid ifofakeleya anidi meleid fara falauf nigin,
 kurō afalaisiyouf nigin sur fiyan.
 Tamo kayau tunim kiwai difeneīd fen, morō difenēdif
 anidi yalel kenēdiya nigin sur fiyan.
¹⁹ Takag, Odug nē biya fiya nē yar anī kurō afalaisiy-
 ouf nigin sur fiyan.”*

* **4:11:** Sam 91:11, 12 * **4:12:** Diuteronomi 6:16 * **4:16:** Juda neid
 uub naa, are Sarere. * **4:19:** Asaia 61:1, 2

²⁰ Age yel fen, ï gaar gabar itotoya ado are korif fen, itotoya anï lo fedig tamo, kel ifen ken, ibodon. Juda neid uub fõ anï bun difaren ganan bagai, Jesus lo difelen. ²¹ Age dife di, ï gariya ino fen, irokenēdin, “Gama naa enï bun, Negur nē Itotoya enei, āgenei kariya bun kisi felel.”

²² Ganan ï yana dales fen, ï sigoron, wau ifenēya od wogõ yen anï nigin terē den. Age de fen, idi to difen, “Eï Josef naal anï sã de?”

²³ Jesus idi irokenēdin, “Momoi bagai, aya nigin od enei tamo kayau musei wogõ dedig wogõ gouf, ‘Dokta, õ ogo ogon dagi el wo! Ereb Kapenaum taun oun agon karï maun anï, ogon fõ gariyan ein ago wo.’ ”

²⁴ ï od tobol fe fen, iron, “Aya ã momoi arokeneik, profet taka ï yogon fõ gariyan to karï difiyēf. ²⁵ Aya ã momoi bagai arokeneik, Eliya nē sain bun, Israel oun kayau waab musei difar mog, yar towo ogõ sigis saa katï fele di, teneub ganan bun uyē sã naū odug difaren. ²⁶ Age de mog, Negur idi anidi taka bun Eliya to sur fen, anï ere, waab taka Sarefat oun Saidon teneub bun sur fen. ²⁷ Takag, Israel oun profet Elisa nē sain bun, musei lepra dagi ado dibodon, anï ere, idi atun taka lepra dagi to loko felen, Naman, Siria tamalem dogol.”

²⁸ Juda neid uub fõ bun, ganan anï karï de fen, waud sanen. ²⁹ Age de fen, idi fafã de fen, ï taun anï itor ilauf nigin dirun. Nedi taun are, arei bun nigin, siya sane bun dirãf nigin dirou dilen. ³⁰ Anï ere, ï tamo kayau atu iyok ile fen, yogon naab ilauf nē anï dõf ilen.

Jesus Kaa Sane Irun

(Mak 1:21-28)

³¹ Agef fen, ï Kapenaum taun isilen, taun are Galili distrik bun ibodok, an Sabat naa bun, ï tamo kayau ifelnēdiya gariya inon. ³² Idi ï ifelnēdin anï nigin terē den, ere nigin, in od wogõya are megeir ado.

³³ Juda neid uub fõ bun, tamo taka kaa sanem irounen anī an ibodon. Ī ait ilun feis iweig iron, ³⁴ “O, Jesus Nasaret tamal, õ amā ere naig wamā fenē? Õ amā daū wamā fenē nigin usil de? Aya õ nigin keleī, Negur nē Fateul anī!”

³⁵ Jesus totol ado iron, “Foro woll! Ī namen tamal ulõ weis!” Age ye di, kaa sane anī, tamo kayau ganan atun, tamo anī tou fiyē ira ken, ulõ yeis ilen, tamo are bouwa to daū fen.

³⁶ Tamo kayau ganan terē de fen, abob dirokenen, “Eī ere keleī eig fiya? Ī yana megeir adom irõ di, kaa sesen ulõ deis dilef.” ³⁷ Anī bunem, ĩ nigin od teneub anī kalilī fiya ganan bun iyokelen.

Jesus Musei El Fedin

(Matyu 8:14-17; Mak 1:29-39)

³⁸ Jesus Juda neid uub fõ itor ken, Simon nē fõ bun ilen. Simon nē mam, ĩ bouwa uruwa odug ado nigin yenen anī, isennēf nigin Jesus to difiyen. ³⁹ Anī nigin, Jesus ĩ itirne ken, bouwa uruwa dagi ou fiyē di, itornen. Age fe di, kayau anī kaisā bagai fã yale, aruneid yalen.

⁴⁰ Gaa kuru kel mog, tamo kayau, dagi tamo dagi gariya fire fire adodo ganan, Jesus wagen guri difeid disin, age dife di, idi mugu mugu bun ima tetedin ino fen, ĩ idi el fedin. ⁴¹ Kaa sesen, tamo kayau musei bun, ulolõ deis fen, diweig diron, “Õ anī Negur Naal!” Anī ere, ĩ sakā fiyeīd fen, to wogõ douf nigin sigoreid ifofan, ere nigin, idi keleī, ĩ Kristus.

⁴² Bonimeī gugum ado, Jesus moilin ilen. Tamo kayau ĩ dimirnek dile, ĩ ibodon nē disi fen, ĩ idi to itornēdiyof nigin katū difiyen. ⁴³ Anī ere, ĩ iron, “Aya Negur nē tano nigin biya od, taun taka takag wogõ auf, ere nigin, aya anī nigin sur fiyan.” ⁴⁴ Age ye fen, ĩ Judia distrik oun Juda neid uub fõ fõ bun, biya od wogõ yef iyon.

5

In Dō Fiya Tar Enidi Ket Jesus Iweignēdin
(Matyu 4:18-22; Mak 1:16-20)

¹ Naa taka bun, Jesus Genesaret daliyou* yerin ifaren. Agef mog, tamo kayau ī salili difiye ken, Negur nē od wogō ye di, karī de difar mog anī, ² ī mala ira kel, waag uru naan yerin difar mog, ilen, are gau yaleya tamom an ditor yen ken, nedi kakāg kulo difen. ³ Ī waag anidi taka bun sō yen, are Simon nē waag, agef fen, waag naanū naal godof irou ilauf nigin to fiyen. Agef fen, ī waag bun ibod ken, tamo kayau biya od ifelnēdin.

⁴ Sain ī wogōya bure fel fen, ī Simon irokenen, “Waag naan mala bun urou ule fen, gau yaleya nigin kakāg urofosil.”

⁵ Simon aiten yale iron, “Odug, amā bō odug kabī total malel, anī ere, ereb taka to malel. Anī ere, ō urok nigin aya kakāg baban arofosilauf.”

⁶ Sain idi age difen, idi gau musei bagai gei difen, age dife di, nedi kakāg serek fou fenē melsan. ⁷ Anī nigin, idi, nedi tā tar waag taka bun temeleid disi disennēdiyof nigin, gale difiyēdin, age dife di, disi, waag uru bun gau dife isokos fen, waag uru are dimutū fenē melsan.

⁸ Sain Simon Pita enī ile fen, Jesus iboron bobou fe fen, iron, “Odug, aya utorna ule, aya mosor nē tamo!” ⁹ Ere nigin, ī ne tā tar geid gau gei difen anī nigin, terefeit den. ¹⁰ Sebedi gere tar Jems Jon ado, are Simon ne kabī tura tar idig age difen. Age dife di, Jesus Simon irokenen, “Ō to kumī wo, gama naa enī bunem ilauf ganan, ō tamo gei wouf.” ¹¹ Age fe di, idi neid waag fiteiwō didī dife di, isel fen, ereb ereb ganan ditorara ken, Jesus dō difen.

* 5:1: Are, Galili Maaī.

Tamo Lepra Dagi Ado
(*Matyu 8:1-4; Mak 1:40-45*)

¹² Jesus taun taka bun ibod mog, tamo taka lepra guruma barikã anĩ isin. Sain ĩ Jesus ile fen, ĩ tenebur kubũ ye kumokur fe, Jesus igone ken, iron, “Odug, õ oroyõf are, el wiyauf.”

¹³ Jesus ima irã, tamo anĩ kobũ fiye ken, iron, “Aya wau irok, õ bouwã biyauuf.” Age ye di, kaisã bagai, lepra dagi ĩ itornen.

¹⁴ Agef fen, Jesus tamo anĩ irokenen, “Õ aib taka to urokenẽf, anĩ ere, õ pris wagen ule, õ bouwã ufelnẽf, õ bouwã biyal anĩ nigin Moses nẽ od irok anĩ dõ fen, sesewi fiya wenẽf, anĩ bunem yaore di, tamo kayau dilouf.”

¹⁵ Anĩ ere, ĩ nigin od fau fau iyok ilen, anĩ nigin, tamo kayau musei ĩ karĩ difiye ken, idi neid dagi yalel kenẽdiyof nigin disin. ¹⁶ Anĩ ere, Jesus sain taka taka moilin ile fen, kosẽ yedig.

Jesus Tamo Bouwa Ilolaisin Anĩ El Fiyen
(*Matyu 9:1-8; Mak 2:1-12*)

¹⁷ Naa taka bun, ĩ biya od ifelneĩd mog, Farisia tamo, lo ifelnẽdiya tamo geid, Galili distrik fonõ ganan, Judia distrik ado Jerusalem temeleid idi an dibodon. Age de mog, dagi el fediyof nigin Odug nẽ megeir, ĩ bun ibodon.

¹⁸ Tamo tunĩ, tamo ilolaisin anĩ, gabgab bun faali de dirou disi, Jesus wagen dinenẽf nigin fõ namen dirou dilau fenẽ age difen. ¹⁹ Idi anĩ age fiya nigin naab taka to dilen, ere nigin, tamo kayau ino yalen, idi fõ sokoron disel, soko korõ difel fen, ĩ gabgab ado folo folõ dife di, tamo kayau atun, Jesus wagen bagai isilen.

²⁰ Jesus idi neid momoiya ile fen, ĩ iron, “Mou, ogon mosor alelkonok.”

²¹ Farisia tamo, lo ifelnēdiya tamo geid, idi dogo namedin kisi difen, “Eĩ aim bagai, kono fiya od wogō yef? Taka nem mosor yaleleya to yenek, Negur yogo dogol.”

²² Jesus idi kisi difen anĩ kelei ken, to fen, “Ã ere nigin nameĩ bun agog kisi gef? ²³ Od nanĩ anĩ aya wogōya nigin karika, ‘Ogon mosor alelkonok’ de, ‘Fã wale fen, uyok ule’? ²⁴ Anĩ ere, Tamo Naal ĩ tenebur ein mosor yaleleya nigin yana ado anĩ, ã keleĩ youf nigin...” ĩ tamo ilolaisin anĩ irokenen, “Aya õ arokonok, fã wo, ogon gabgab wale fen, fonõ ule.” ²⁵ Age ye mog bagai, ĩ fã ye, idi wagedin ifaren, yogon yenen gabgab yale, Negur yana yalesef, fonõ ilen. ²⁶ Ganan terē de fen, Negur yana dalesen. Idi waud bun terefeit ye fen, diron, “Ada gama tobonunã fire bagai tailer.”

Jesus Lewi Iweignen

(Matyu 9:9-13; Mak 2:13-17)

²⁷ Enei bure fel fen, Jesus ile, takis yaleya tamo yana Lewi, an yogon takis yaleya fõ bun ibod mog, ilen. Jesus ĩ irokenen, “Aya dõ wiya.” ²⁸ Age ye di, Lewi fã ye, ereb ereb adok itor yen, Jesus dõ fiyen.

²⁹ Agef fen, Lewi yogon fõ bun, Jesus nē saaf odug yabi di, takis yaleya tamo musei, tunĩ geid weim saaf don. ³⁰ Anĩ ere, Farisia tamo, idi neid lo ifelnēdiya tamo geid, Jesus nē dõ fiya tar bun nauseir den, “Ã ere nigin takis yaleya tamo, mosor adodo geid, saaf ado naan wōgef?”

³¹ Jesus idi aitedin yale iron, “Dagi sã anidim dokta nigin waud to yenēdig, dagi adodom dogol. ³² Aya madur tamo anidi iweignēdiya nigin to asin, mosor adodo tamo anidi waud falei douf nigin asin.”

Kuriya Nigin Jesus To Difiyen

(Matyu 9:14-17; Mak 2:18-22)

³³ Farisia tamo idi ï dirokenen, “Jon nē dō fiya tar, idi kuri de fen, kosē dedig, Farisia tamo neid dō fiya tar idig age fiya, anī ere, ogon idi dobu dirak.”

³⁴ Jesus aitedin yale iron, “Mois ï fau ne tã tar weim dibod mog, ã ne tã tar idi kuriya nigin urokenēdigouf anī kisi feleya de? ³⁵ Anī ere, naa fau isi di, anī bun mois tamo idi bun tamal yalelnē di, naa anidi bun idi kuri douf.”

³⁶ Jesus yaab od enei idi irokenēdin, “Taka nem gabar masak mata serek fe fen, gabar tubu bun to iwadig. ï age foug are, ï gabar mata anī serek fouf, takag, gabar mata bun tamal masak are tubu anī ado to susu falauf. ³⁷ Takag, taka nem wain mata meme gabar* tubu bun to itinēf. ï age foug are, wain mata anī, meme gabar gē ye fen, serek fouf. Age fe di, wain anī oho yeis fen, meme gabar sane lauf. ³⁸ Age fiya sã, wain mata, meme gabar mata bun itinēf. ³⁹ Agef fen, taka nem wain tubu yakas fen, mata to orodig, ere nigin, ï irok, ‘Tubu are de biya.’ ”

6

Jesus ï Sabat Naa Nē Odug (Matyu 12:1-14; Mak 2:23-3:6)

¹ Sabat naa taka bun, Jesus in dō fiya tar geid, wit kabī atu diyok dile fen, in dō fiya tar wit biya tunī fito difen, imeid bun orok de fen, nedi ilo don. ² Farisia tamo tunim to difen, “Ã ere nigin Sabat naa bun ïtãfiya ufoduleg fen, tobonunã enei ago gef?”

³ Jesus aitedin yale irokenēdin, “Sain Dawid, ne tã tar geid naū fedi di, age fen anī, ã to uwesegen de? ⁴ ï Negur nē fō namen ile fen, bret fateul prisem dogol dōdig* an ibodon anī yokon, ï bret tunī ne tã tareg ifenēdin.” ⁵ Age

* **5:37:** Juda neid tobonunã, idi meme gabar nem darum diwadig. * **6:4:** Lo bun, bret fateul anī, prisem dogol dōdig.

ye fen, Jesus idi irokenēdin, “Tamo Naal ī Sabat naa nē Odug.”

⁶ Sabat naa taka bun, ī Juda neid uub fō bun ile, biya od ifelnēdin, sain anī bun, tamo taka ima biya melem gege fefu fiya anī an ibodon. ⁷ Farisia tamo, lo ifelnēdiya tamo geid, idi Jesus bouwa bun od dinouf nigin naab dimiren, anī nigin, idi ī Sabat naa bun dāgi el fe mog, mailauf de fen, ololo difen. ⁸ Anī ere, Jesus idi neid kisi kelei ken, tamo ima gege fefu fiya anī irokenen, “Fā wo fen, ganan meleid bun ufar.” Age ye di, ī fā yale, an ifaren.

⁹ Age fe di, Jesus idi irokenēdin, “Aya ā to ayeik, nanī anī Sabat naa bun lo dō fiya? Biya age fiya anī de, sane age fiya anī, oo, isennē di, mata ibodōya anī de, daū fiya anī?”

¹⁰ Jesus idi ganan fele feid le fen, tamo anī irokenen, “Imā yaī wo.” Ī yaī fe di, in ima oditekei biya len. ¹¹ Anī ere, idi waud fatuk sane fen, mogo Jesus naig tafiyēf de fen, dogo tutur katō difen.

Jesus Aposel Tuwelf Igirnēdin

(Matyu 10:1-4; Mak 3:13-19)

¹² Anī sain bun naa taka, Jesus arein kosē youf nigin iselen, bō anī bun Negur kosē fiyen. ¹³ We fele di, bonimei, Jesus in dō fiya tar wagen iweig laisi fen, idi atun tuwelf geif fen, idi anidi aposel wowā douf nigin igirnēdin. ¹⁴ Simon (Jesus ī yana yun Pita), in tura Endru, Jems, Jon, Filip, Batolomyu, ¹⁵ Matyu, Tomas, Jems Alfeus naal, Simon ī anī Selot* taka, ¹⁶ Judas ī Jems naal, Judas Iskariot, inim dum Jesus kiwai imeid bun inenen.

El Fiya Ado Malalon

(Matyu 4:23-5:12)

* **6:15:** Juda neid kusī mala taka, idi Rom gawaman ado kusī dedig.

¹⁷ Jesus idi geid weim disil, teneub uus bun difaren. In dō fiya tar musei ado, tamo kayau musei biya, Judia distrik kalilī fiya ganan temeleid, Jerusalem temeleid, Taia Saidon taun ado neid ubun temeleid, an difaren, ¹⁸ tamo kayau anidi Jesus karī difiyē fenē nigin ado, idi neid dagi el fediyouf nigin, disin. Idi kaa sesenem morō difenēdin are el fedin. ¹⁹ Tamo kayau ganān ī kobū difiyē fenē age difen, ere nigin, megeir ī bunem isi fen, idi ganān el fedin.

²⁰ Jesus in dō fiya tar lo fiyeīd fen, iron:

“Ā aib maleg are el yeik,
ere nigin, Negur nē tano are āgenei.

²¹ Ā gama naū ufaregef are el yeik,
ere nigin, ā nameī isokosauf.

Ā gama maruī isif are el yeik,
ere nigin, ā kasā gouf.

²² Tamo Naal nigin, tamo kayau sane diyeik, diruyei ken,
kono diyeik,
ā yeneī sane dile fen, to orodif are,
Negur ā el yeik.

²³ “Naa anī bun, wauī kulī ye fen, wauī al fouf, ere nigin, āgenei mala solo odug oun saa ilun ibodok. Ere nigin, temeid tar profet nigin de age difedin.

²⁴ “Anī ere, safineī ado ā meleīlon ado,
ere nigin, āgenei wauī isenneīya mogo walegel.

²⁵ Nameī gama isokosef ā meleīlon ado,
ere nigin, ā naū ulagauf.

Gama kasā gef ā meleīlon ado,
ere nigin, ā fau wauī gudūf fen, maruī isiyouf.

²⁶ Ā nigin tamo ganān biya de fen, wogō def ā meleīlon ado,
ere nigin, temeid tar idegēya profet nigin de age difedin.

*Kiwai Tar Nigin Wau Laa Fiya
(Matyu 5:38-48; 7:12a)*

²⁷ “Anĩ ere, ã aib aya karĩ wiyagef anĩ arokeneik: Āgenei kiwai tar nigin wauĩ laa foug, ã kiwai difeneik anidi nigin biya ago gouf. ²⁸ Idi ã disisneik el fiya wenēdig, idi ã to biya diyeik anidi nigin kosē gouf. ²⁹ Tamo taka ogon walā sitakā fakā foug, falei wel, walā sitakāg wenē. Tamo taka ogon saket yalouf are, ogon kolos yalouf nigineg to katū wiyē. ³⁰ Wenēdiyof nigin to diyok are, wenēdiyof, aib taka ogon safinā yalef are, anĩ baban kel yaleya nigin to urokenēf. ³¹ Ereb taka idim age difekeneif anĩ oroyeik age fiya gen, āg idi bun ago gouf.

³² “Idi ã nigin waud laa fef anidi nigin dogol wauĩ laa fef are, ã nigin ere mala ado? Mosor adodo idig, idi nigin waud laa fef anidi nigin, waud laa fedig. ³³ Idi ã nigin biya diyeik anidi nigin biya ago gouf are, ã nigin ere mala ado? Mosor adodo idig age difedig. ³⁴ Idi anidi bun moni kel walougouf nigin kisig fen, moni wenēdigouf are, ã nigin ere mala ado? Mosor adodo idig, moni ganan kel yaleya nigin kisi de fen, mosor adodo tutur moni difenēdidig. ³⁵ Anĩ ere, āgenei kiwai tar nigin wauĩ laa foug, idi nigin biya ago wedigouf, erab taka kel yaleya nigin to kisig fen, wenēdigouf. Ago gouf are, āgenei mala solo odug biyauf, agef fen, ã Negur Ilun Bagai nē gere tar wowā gouf, ere nigin, Negur ĩ idi to de difiyēdig sesen anidi ado, biya fiyēdidig. ³⁶ Āgenei Temeĩ wau yūdig gen, āg idi nigin wauĩ ineif.

*Ne Tā Es Fiyēya
(Matyu 7:1-5)*

³⁷ “Taka to es wiyēg, to ago gouf are, āg Negur to es yeif. Taka bouwa bun od to ūg, to ago gouf are, āg Negur bouweĩ bun od to yūf. Mosor nigin wedereĩ tu kalauf, ago gouf are,

Negur āgenei mosor nigin weder tu kalauf. ³⁸ Wenēdig, ago gouf are, Negur ifeneif. Ima su karikauf, lai fesil fen, baban teten ino isokose di, yokū fe di, awa gere fasauf, ā nigin gogū fouf. Tunī es wedigef gen, Negur āg agef es yeif.”

³⁹ Jesus yaab od eneig irokenēdin, “Mala ifofakeleya tamo taka, mala ifofakeleya tura itonēya kisi feleya de? Idi urom bebeigir to kuku douf de? ⁴⁰ Skul kesu in tise to wal fef, anī ere, taka ī keleī ganān yalef, yogon tise gen wō youf.

⁴¹ “Ō ere nigin turā mala teteur lo fen, ō ogon aa masak malā bun ibodok anī to ulef? ⁴² Ō ogo aa masak ogon malā bun to ule fen, naig fe di, turā nigin dogol urokenek, ‘Turau, utor len, aya ogon malā teteur alelkonōf’? Ō mala yaleya tamo, ō ogon malā bun ketem aa masak walel fen, anī malā kare kele di, turā bun mala teteur walelauf.

Aa Taka Yogon Faat Ado

(Matyu 7:16-20; 12:33-35)

⁴³ “Aa biya ī faat sane to imadig, aa sane are faat biya to imadig. ⁴⁴ Aa mugu mugu yogon faat bun, tamo ī keleī youf. Tamo kayau idi, wei biya barik bun to daledig, gira udum bun to daledig. ⁴⁵ Tamo biya ī, yogon wau bun ereb biya kuru fedig anī bunem, tobonunā biya yaor fedig, age fiya gen, tamo sane, yogon wau bun ereb sane kuru fedig anī bunem, tobonunā sane yaor fedig. Yogon wau bun isokosef, yogon sigor bun wogō yedig.

Fō Inoya Nē Keleī Tamo, Neneya Tamo Ado

(Matyu 7:24-27)

⁴⁶ “Ere nigin ā aya nigin ‘Oduḡ, Oduḡ,’ ge fen, aya orok anī to ago gedig? ⁴⁷ Taka ī wageun isi, neu od karī ye fen, dōf age fef, ī naig fiya anī aya ā afelneif. ⁴⁸ Ī fō inoya tamo taka, ku fatuk yale fen, meein teten fō gariya inon gen.

Sain kuwei isin, wĩ ye fen, fõ yun, anĩ ere, fõ anĩ yokũ fiya kisi feleya sã, ere nigin, fõ are totol ado inon. ⁴⁹ Anĩ ere, taka ĩ neu od karĩ ye fen, to dõf age fef, ĩ tamo taka teneub bun fõ gariya sã inon gen. Sain kuwei wĩ ye fen, fõ yun, fõ anĩ kala fel, oditekei daũf irailen.”

7

Kusĩ Tamo Neid Orowa Nē Momoiya (*Matyu 8:5-13*)

¹ Jesus tamo kayau karĩ douf nigin enei ganan wogõ bure fel fen, ĩ Kapenaum taun ilen. ² An kusĩ tamo neid orowa nē ferfer taka, in odug ĩ nigin wau laa fedig anĩ, dagi fen, laa fou fenē age fen. ³ Kusĩ orowa Jesus nigin karĩ ye fen, Juda neid mudur adodo Jesus garan susur fedi di, ĩ isi fen, yogon ferfer el fiyēf nigin to difiyen. ⁴ Idi Jesus garan disi fen, totol bagai digonen, “Tamo enei, õ enĩ agouf nigin kisi feleya bagai, ⁵ ere nigin, ĩ nemã tamo kayau nigin wau laa fedig, nemã uub fõg inon.” ⁶ Anĩ nigin, Jesus idi geid dilen.

Ī mogo fõ sirin mog, kusĩ orowa ne tã tar Jesus dirokenēf nigin sur fedin, “Odug, õ kabĩ totol to walouf, ere nigin, aya to biya nigin aya kisi afef, õ neu fõ bun to usiyouf. ⁷ Aya to biya nigin, aya õ garan isiya nigineg to kisi afen. Anĩ ere, õ od urõ di, neu kabĩ tamo dagi fara falauf. ⁸ Ere nigin, aya yug nigin age fiya, ayag neu odug anĩ farumen abodok, kusĩ tamo idig aya farumeun dibodok. Aya taka enĩ arokenek, ‘Ule,’ afiyek, ĩ ilauf. Aya taka arokenek, ‘Õ usi,’ au di, ĩ isidig. Neu kabĩ tamo enĩ ago afiyek, ĩ anĩ age fedig.”

⁹ Kusĩ orowa od enĩ irõ di, Jesus karĩ ye fen, ĩ nigin terē yen, agef fen, tamo kayau dõ difiyen anidi bun falei yel iron, “Aya ã arokenek, aya Israel bun, momoiya odug eig fiya taka to ailen.” ¹⁰ Age ye di, kusĩ tamo sur fedin anidi,

fõ bun ke de dile fen, ferfer anĩ dagi sã ibod mog, fotou difen.

Jesus Kayau Waab Taka Nē Kesu Turĩ Fen

¹¹ Anĩ dumen, Jesus taun taka Nain ilen, in dõ fiya tar, tamo kayau musei, ã geid weim dilen. ¹² Ì mogo taun bobog kelē fiyē mog, laa tamo taka faali de disin, laa tamo anĩ kayau waab nē kesu tekelei bagai, tamo kayau musei taun temeleid kayau waab geid. ¹³ Sain Jesus kayau waab anĩ fele fiyen, in wau ã nigin gudũf fen, iron, “To inã wale.”

¹⁴ Age ye fen, ã isel, dege kobũ fe di, faali difen idi, dē delen. Ì iron, “Tamo gaũ, aya õ arokonok, fã wale!” ¹⁵ Laa tamo anĩ fã ye ibod ken, od yen, age fe di, Jesus tamo anĩ ã sina kel ifenen.

¹⁶ Age fe di, idi ganan kumĩ ado terefeit de fen, Negur yana dalesen. Idi diron, “Profet odug taka, ada atun wõ yel. Negur yogon tamo kayau isennēdiyof nigin isil.” ¹⁷ Jesus nigin, od enei Judia distrik kalilĩ fiya ganan iyokelen. Jesus,

Jon Naan Igunēdiya Tamo Ado
(*Matyu 11:2-19*)

¹⁸ Jon nē dõ fiya tar, enei ganan nigin Jon dirokenen. Jon idi uru iweigneid fen, ¹⁹ Odug eig de to difiyēf nigin sur fedin, “Tamo isiyof den, õ ogo yeir de, amã fau taka nigin malamã manouf?”

²⁰ Tamo Jesus garan disi diron, “Jon Naan Igunēdiya Tamo, õ to mayõf nigin amã sur famam, “Tamo isiyof den, õ ogo yeir de, amã fau taka nigin malamã manouf?” ”

²¹ Sain anĩ bun bagai, Jesus, tamo kayau musei dagi adodo, darau adodo, kaa sesenem dirounēdin el feid fen, meleid ifofakeleya el fedi di, kelē den. ²² Jesus solof irokenēdin, “Kekug uleg fen, ã wedereim karĩ gel, meleim ulegel anĩ Jon wogõ wiyēg, meleid ifofakelen kelē def,

to diyon mogo diyok, lepra dagi adon mogo el fedin, wedereid daabun od karĩ def, gare den turĩ fedif, maleg bun biya od wogõ fedif. ²³ Tamo aya nigin wau to firagagaũ fef, Negur ĩ el fiyek.”

²⁴ Jon nẽ arũ tamo ditornẽ dilele di, Jesus, tamo kayau guru difen anidi, Jon nigin irokenẽdin, “Ã ere bagai anĩ ulogouf nigin, gerere tuan ulegen? Ã unin yaum walala fe di, ulogouf nigin ulegen de? ²⁵ Anĩ sãf are, ere bagai ã ulogou fenẽ, ulegen? Tamo taka kolos biya bagai ifonun de? Sã, idi kolos medeĩya biya difoun ken, safineid inid adodo are, king nẽ fõ bun dibodok. ²⁶ Ere bagai anĩ ã ulogou fenẽ, ulegen? Profet taka de? Ariya, aya ã arokeneik, ĩ profet wal fediya. ²⁷ Tamo anĩ, ĩ nigin eig ye itoton:

“‘Aya neu arũ tamo sur afe di, ĩ uyu ilauf,
im ket ogon naab dodok fouf.’*
²⁸ Aya ã arokeneik, kayau onudi kesu dalen idi atun, taka nem Jon to wal difiyen, anĩ ere, aib taka Negur nẽ tanon yana naal bagai ado, ĩ Jon wal fiya.”

²⁹ (Tamo kayau ganan, takis yaleya tamog, sain idi Jesus nẽ od karĩ de fen, Negur nẽ naab anĩ biya den, ere nigin, idi Jonem naan igunẽdin. ³⁰ Anĩ ere, Farisia tamo, lo keleĩ tamo geid, idi dogo nigin Negur nẽ oroya ditoron, ere nigin, idi Jonem naan to igunẽdin.)

³¹ “Tamo kayau sain enei bun, idi nigin ere bunem aya kisi afouf? Idi ere gen? ³² Idi simõ maket modoũ bun dibod ken, abob diweignẽdidig gen:

“‘Amã ã nigin kelel maun,
anĩ ere, ã to kui gen;
amã kanon seg malen,
anĩ ere, ã to inã walegen.’

* [7:27](#): [Malakai 3:1](#)

³³ Aya enei wogõ auf, ere nigin, Jon naan igunẽdiya tamo isin, bret to yon, wain to yon, ã urõgef, ‘Í kaa sane ado.’
³⁴ Tamo Naal isin, saaf yon, naan yon, ã urõgef, ‘Eĩ dobu irãya tamal, ã, takis yaleya tamo, mosor tamo adodo geid, uyu kũ difedig.’ ³⁵ Anĩ ere, kisi biya ã, in dõ fiya ganan bunem, biya yaorouf.”

Mosor Kayaum Jesus Bun Moul Fi Felen

³⁶ Farisia tamo takam, Jesus ã ado saaf dãf nigin iweignen, anĩ nigin, Jesus ã Farisia tamo anĩ nẽ fõ bun ile fen, tebol bun ibodon. ³⁷ Taun anĩ bun, kayau taka mosor ado ibodõdig, Jesus Farisia tamo anĩ nẽ fõ bun, saaf yoko yeya karĩ ye fen, kayau, moul sumeĩ biya bagai anĩ gulub* ado irou isin. ³⁸ Kayau ã Jesus dumen ye garan ifar, maru isi fen, Jesus ye lũ fen. Agef fen, kayau yogon fatiyam Jesus ye waĩf, umã fe, moul sumeĩ biya bagai, ye bun fi felen.

³⁹ Sain Farisia tamo Jesus iweignen anim, enei ile fen, ã yogo kisi bun iron, “Tamo enei profet takauf, ã aibem kobũ fiyek, ã ere kayau, ã mosor kayau taka anĩ, keleĩ youf.”

⁴⁰ Jesus ã irokenen, “Simon, aya ereb taka arokonõf.”

Ï iron, “Tise, urokana.”

⁴¹ Jesus iron, “Tamo uru, moni tamo taka bun wareg dalen, taka faif tausen kina, taka faif hundred kina. ⁴² Idi urom wareg ifenẽya moni sã, anĩ nigin, moni tamo dogo neid wareg gudũ felen. Gama nanim anĩ, moni tamo nigin wau fatuk laa fouf?”

⁴³ Simon solof iron, “Aya kisi afef, taka ã wareg odug yalen anĩ gudũ fel kenen anim.”

Jesus iron, “Õ tutuk es wol.”

⁴⁴ Age ye fen, Jesus falei yel, kayau wage ifen ken, Simon irokenen, “Õ kayau enei ulef? Aya ogon fõ bun asil. Õ yeu kulo fiya nẽ naan taka to wanal, anĩ ere, kayau ã yogon

* **7:37:** Meein alabasta nem dinon.

marum yeu lūf fen, yogon fatiyam waĩ fel. ⁴⁵ Ō to umã wiyal, anĩ ere, kayau enei, aya asour alel sain bun, ĩ yeu umã fel anĩ, fau fau umã fiyek. ⁴⁶ Ō mudurou bun moul to unol, anĩ ere, kayau ĩ moul sumeĩ biya bagai, yeu bun fi felel. ⁴⁷ Anĩ nigin, aya ō arokonok, kayau enĩ nē mosor musei yalelel, anĩ nigin, ĩ fatuk wau laa fen. Anĩ ere, aib taka mosor naal yalelen, ĩ wau laa fiya naal.”

⁴⁸ Age ye fen, Jesus kayau irokenen, “Ogon mosor alelkonok.”

⁴⁹ Tamo Jesus geid dibodon, tutur dogo dogol diron, “Eĩ aim, ĩ mosoreg yalelef?”

⁵⁰ Jesus kayau anĩ irokenen, “Ogon momoiya anim isennom, waũ inosiya ado ule.”

8

Faat Irarāya Tamo Nē Yaab Od (Matyu 13:1-23; Mak 4:1-20)

¹ Anĩ dumen, Jesus taun ado fonō fonō iyo ken, Negur nē tano nigin, biya od wogō yen. In dō fiya tar tuwelf weim, ² kayau tunĩ idi kaa sesen iruid fen, dagi el fedin idig weim: Maria (Magdala tamal) ĩ bun kaa sesen sewen irudi di, diyan, ³ Joana Kusa nē kayau, Kusa ĩ Herod nē fō lo fiya tamo, Susana, musei tunĩ geid. Kayau eneidi, idi neid safineid nem disennēdin.

⁴ Tamo kayau taun ganan bun temeleid, Jesus garan disi, moku de mog, ĩ yaab od enei iron, ⁵ “Kabĩ marau taka, faat irarāf nigin ilen. Sain ĩ irarak ile mog, tunĩ naab luwen kuku ren, are teten diyon, ninā ilun temeledim dakasin. ⁶ Tunĩ meein tuar kuku ren, are bali fokū yeid fen, laasi yedin, ere nigin, idi lumi sã. ⁷ Faat tunĩ malū duri atun kuku ren, are malū duri, faat anĩ ado, odudug fen, malū durim sile feledin. ⁸ Faat tunĩ teneub biya bun kuku ren,

are fokū yedin, biya imadin, gariya tekelei yogon biya wan hundred iman, biya anim gariya anī wal fiya.”

Sain ī enī wogō ye fen, ī iweig iron, “Taka ī karīya nigin weder ado, ī karī youf.”

⁹ In dō fiya tar, yaab od enī nē gariya nigin, ī to difiyen.

¹⁰ Jesus iron, “Negur tano nigin, iminēya od nē keleī are, Negur ā mogo ifenein, anī ere, tunī bun aya yaab od nem wogō auf, anī bunem,

“ ‘idi meledim diledig, anī idi meleid fokōya sā,

idi wederedim karī dedig, anī idi gariya keleī sā.’* ”

¹¹ “Yaab od anī nē gariya eig fiya. Faat are Negur nē od. ¹² Faat tunī naab luwen kuku ren are, tamo idi od karī den, Satan isi, biya od idi namedin ibodok anī yaleledig, anī bunem, idi to momoi de di, to isennēdiyof. ¹³ Faat tunī meein tuar iraran are, tamo idi od karī de fen, waud bun kulīya ado od daledig, anī ere, idi warumutei sā. Idi sain naal bagai momoi def, anī ere, kisi fiya isi di, fara furu de diyaleledig. ¹⁴ Faat malū duri atun kubū yen are, tamo idi od karī den, anī ere, idi diyok dile mog, tenebur mata ibodōya nē suwēya, safina ado ibodōya nē kisi, bouwa nē oroya anidim idi sile fedī di, idi faat to yūf. ¹⁵ Anī ere, faat teneub biya bun kubū yen are, tamo idi, kisi biya, karīya biya ado, waud bun ibodok, od karī de fen, kafī difelef, anī total difaref, faat biya yūf.

Lam Yoki Bun
(Mak 4:21-25)

¹⁶ “Taka nem lam tōf fen, mis kur be, fatar farumen to inodig. Age fiya ban, ī yoki bun iseginē di, idi aaben disif, lalan dilouf. ¹⁷ Ereb ereb ganān iminēya yenek anī ganān yaor fouf, ereb ereb ganān nar fen yenek anī ganān irou isi, biru fel fen, yaau du fe di, keleī youf. ¹⁸ Anī nigin, ā kisi el ge waleg fen, ā karī gouf. Aib taka ī ado, aya toru afouf,

* **8:10:** Asaia 6:9

age fe di, ï musei adouf. Taka ï sã bagai, ereb taka ï ado nigin ï kisi fef areg, ï bun tamal son fouf.”

*Jesus Nē Sina, Tura Tar Geid
(Matyu 12:46-50; Mak 3:31-35)*

¹⁹ Jesus nē sina, tura tar geid, ï dilouf nigin disin. Anĩ ere, idi ï wagen ileya kisi feleya sã, ere nigin, tamo kayau musei. ²⁰ Takam Jesus irokenen, “Ogon sinã, turã tar geid, ò dileyõf nigin serē difaref.”

²¹ Jesus solof iron, “Neu naai ado turau tar, are idi Negur nē od karĩ de fen, dõ difef anidi.”

*Jesus Yau Uyē Ado Irokenēdi Di, Kee Delen
(Matyu 8:23-27; Mak 4:35-41)*

²² Naa taka bun, Jesus in dõ fiya tar irokenēdin, “Ada daliyou sitakã talauf.” Anĩ nigin, idi waag bun sõ de dilen. ²³ Idi solĩ de mog, Jesus mulaĩ yenen. Yau odug daliyou bun isi di, maaĩ waag namen isokosen. Idi morõ odug fotou difen.

²⁴ In dõ fiya tar dile, Jesus turĩ difiyē diron, “Odug, Odug, ada naanũ talalau fenē!”

Ï fã yale, yau naan moloun wĩ yen ado, sakã fiyēdi di, yau uyē ado irorou kel, ganan dē delen. ²⁵ Jesus in dõ fiya tar to fiyēdin, “Ågenei momoiya nain?”

Idi kumĩ terē de fen, abob toti difen, “Eĩ aim bagai? Ï yau ado naaneg irokenēdi di, ï ait dõ difef.”

*Jesus Tamo Taka Kaa Sesen Musei Ado El Fiyen
(Matyu 8:28-34; Mak 5:1-20)*

²⁶ Idi Galili tamal daliyou dibal, Gerasa teneub bun dilen. ²⁷ Sain Jesus ubun kutũ yesin, taun anĩ bun tamal, tamo taka kaa sesen ado ï tarabã fiyen. Sain meluk, tamo enei kolos sã, fõ buneg to ibodõdig, anĩ ere, ï matmat bun ibodõdig. ²⁸ Ï Jesus ile fen, kaĩ ye, Jesus ye gariyan kubũ

ye, ï ait odugem iweig iron, “Õ aya ere naig wiyau fenē, Jesus, Negur İlun Biya nē Naal? Aya õ agonok, õ aya to daig wiyauf!” ²⁹ Ere nigin, Jesus mogo kaa sane tamo anī bun tamal ulō yesiyouf nigin irokenen. Sain musei kaa sanem ironē di, ye ima ado, sen nem difofädig, age de fen, tari difiyēdig, anī ere, ï sen kokour fele di, kaa sanem wala ino di, moilin iledig.

³⁰ Age ye di, Jesus ï to fiyen, “Õ yana ai?”

Ï solof iron, “Aya yanau Ami,” ere nigin, kaa museim ï namen disilen. ³¹ Idi ku isil idīya sã modoũ bun to sur fediyouf nigin, baba baban Jesus digonen.

³² Arei wala sirin, bor musei biya an saaf doko difaren. Kaa sesen idi, bor namedin dilauf nigin, Jesus digonē di, Jesus idi yo fedin. ³³ Kaa sesen, tamo anī bun tamal ulolō deis fen, bor namedin dilelen. Age dife di, bor gududu de, bebeig sane baurin daliyoun disil, naanũ gare desin.

³⁴ Bor lo fiya tamo, erēb erēb wō yen anī dile fen, diya dile, od anī, taun ado fonō fonō wogō den. ³⁵ Age dife di, tamo kayau, erēb wō yen anī dilou fenē dilen. Sain idi Jesus garan disin, kaa sesen tamo anī bun tamal diyalelen tamo anī, garab yel, kisi biya ado, Jesus ye gariyan ibod mog, dile fen, idi kumī den. ³⁶ Tamo idi meledim dilen anidim, kaa sesenem tamo diroun anī, naig be el fiyen anī, tamo kayau wogō difiyēdin. ³⁷ Age dife di, Gerasa teneub bun, tamo kayau ganān, Jesus itorneid ilauf nigin, ï dirokenen, ere nigin, idi kumim lai fedin. Anī nigin, Jesus waag bun sō ye fen, itornēdin.

³⁸ Tamo ï bun tamal kaa sesen diyalelen anī, Jesus ado dilauf nigin igonen, anī ere, Jesus ï sur fiye ken, iron, ³⁹ “Fonō kel ule fen, Negur õ nigin age fen anī wogō wouf.” Age ye di, tamo anī itor ilen, Jesus ï nigin age fen anī, taun ganān bun iyo ken, wogō yen.

*Kayau Naal Laa Fen Ado Dagi Kayau Taka
(Matyu 9:18-26; Mak 5:21-43)*

⁴⁰ Sain Jesus kele di, tamo kayau musei, ĩ aan difiyen, ere nigin, idi ganan ĩ nigin ololo difen. ⁴¹ Age de mog, Juda neid uub fõ lo fiya nẽ mudur taka, yana Jairus isi, Jesus ye gariyan kubũ ye fen, yogon fõ bun ileyã nigin igonen, ⁴² ere nigin, ĩ ne barai tekelei bagai, ĩ kayau naal tuwelf yar age fiya, mogo laa fou fenẽ.

Jesus naab ile mog, tamo kayau musei kiti de fen, kafi difiyẽ genen. ⁴³ Kayau taka an ifaren, ogõ dagi faimud ado, yar tuwelf iyon. Anĩ ere, taka nem ĩ to el fiyen. ⁴⁴ Kayau ĩ Jesus dume ise, in kolos iri kobũ fen, age fe di, kaisã bagai, kayau nẽ naud segẽ yelen.

⁴⁵ Jesus to fen, “Aim aya kobũ fiyal?”

Idi ganan wa dife di, Pita iron, “Odug, tamo kayau musei kiti de fen, kobũ diyok

⁴⁶ Anĩ ere, Jesus iron, “Aibem aya kobũ fiyal. Aya keleĩ, totol aya bun tamal ul fe yalel.”

⁴⁷ Age ye di, kayau ĩ imin ken, ileyã kisi feleyã san, tererẽ ye fen, isi, Jesus ye gariyan kubũ yen. Tamo kayau ganan meleid bun, ĩ ereb nigin Jesus kobũ fiyem ado, naig be ĩ kaisã bagai biya lel anĩ, wogõ yen. ⁴⁸ Age ye di, Jesus kayau irokenen, “Nau barai, ogon momoiya anim el yom. Waũ inosiya ado ule.”

⁴⁹ Jesus fau od wogõ ye mog, tamo taka, Juda neid uub fõ lo fiya mudur Jairus nẽ fõ bunem isin. ĩ iron, “Nẽ barai mogo laa fel. Baban õ tise morõ to wenẽf.”

⁵⁰ Jesus od enei karĩ ye fen, Jairus irokenen, “To kumĩ wo, momoi dogol wo, ago di, kayau fau el fiyẽf.”

⁵¹ Jesus Jairus nẽ fõ bun wõ ye fen, takam ĩ geid, aaben ileyã nigin katũ fedin, Pita, Jon, Jems ado, kesu nẽ tama sina dogol. ⁵² Tamo kayau ganan, ĩ nigin waud gudũf fen,

inã legur mog, Jesus iron, “To inã waleg. Kayau naal ï laa fiya sã, ï mulã yenek.”

⁵³ Idi Jesus kasã difiyen, idi keleï, kayau naal laa fel.
⁵⁴ Anï ere, Jesus ï ima yales fen, iron, “Neu kesu, fã wo!”
⁵⁵ Kayau nẽ uur kelen, age fe di, kaisã bagai, fã yale ifaren. Age fe di, Jesus, ï ereb taka ifen yõya nigin, idi irokenẽdin.
⁵⁶ Kayau nẽ sina tama terefeit de di, ereb wõ yel anï, taka to dirokenẽf nigin, Jesus idi katũ fedin.

9

Jesus In Dõ Fiya Tar Tuwelf Sur Fedin (Matyu 10:5-15; 14:1-12; Mak 6:7-29)

¹ Jesus in dõ fiya tar tuwelf iweigneïd fen, kuru fedin. Agef fen, ï, idi kaa sesen ganan dirudiyouf nigin ado, dagi el difediyouf nigin total ifeneïd fen, megeir fedin. ² ï, idi Negur nẽ tano nigin wogõ douf nigin ado, dagi adodo el difediyouf nigin sur fedin. ³ Jesus idi irokenẽdin, “Delẽ uyõgouf nigin ereb taka to walogouf, manig sã, faa sã, bret sã, moni sã, kolos uru to walogouf, tekelei dogol. ⁴ Fõ nanï be bun sõ gouf, an ubodõg ile, taun anï utorõgouf. ⁵ Tamo kayau ã to daleyeyi ken, ã to karï diyeïf, sain ã nedi taun anï utorõg fen, yeï aas tu welege di, idi ã kiwai difenein anï keleïf.” ⁶ Anï nigin, idi fafã de, fonõ fonõ diyo ken, modoũ ganan bun, biya od wogõ de fen, tamo kayau dagi el difedin.

⁷ Galili lo fiya nẽ mudur Herod, anï ganan wõ yef ilef anï, karï ye fen, wau togun, ere nigin, tunim dirok, Jon ï laa bun tamal mata kel fã yen, ⁸ tunim dirok, Eliya wõ yen, age fe di, tunïg dirok, profet kulu temeleid anidi taka mata kel fã yen. ⁹ Anï ere, Herod iron, “Aya Jon ula gudũ afen. Enei aim, ï nigin karï auf?” Age ye fen, ï Jesus ileya nigin kisi fen.

Jesus Faif Tausen Tamo Saaf Ifenēdin
(*Matyu 14:13-21; Mak 6:30-44; Jon 6:1-14*)

¹⁰ Sain aposel idi keku den, idi age difen anī Jesus wogō difiyen. Age de di, Jesus idi geif irou, idi mugu diya, taun taka Betsaida dilen. ¹¹ Anī ere, tamo kayau musei anī kelei ken, Jesus dō difen. Jesus idi aan fiyeīd, Negur nē tano nigin wogō fiyeīd fen, idi dagi el fiya nē anidi el fedin.

¹² Aragau di, in dō fiya tar tuwelf, ī gein disi diron, “Tamo kayau susur wo di, idi fonō kalilī fiya fonō fonō dile fen, saaf ado yenēya modoū dilouf, ere nigin, ada ein gerere tuan tabodok.”

¹³ Jesus aitedin yale iron, “Idi dāf nigin ereb āgem wenēdigouf.”

Idi solo de diron, “Ada bret faif, gau uru ado dogol. Ada tele, tamo kayau enei ganan nigin saaf to na talouf, are kisi feleya sā.” ¹⁴ (Faif tausen tamo age fiya an dibodon.)

Anī ere, Jesus in dō fiya tar irokenēdin, “Tamo kayau, mala fire fire fifti age fiya bun, ubodnēdig.” ¹⁵ In dō fiya tar age dife di, ganan dibodadan. ¹⁶ Jesus, bret faif gau uru ado yale, saa ilun itad fen, ī Negur de fiye ken, anī mumā fedin. Agef fen, ī in dō fiya tar ifenēdin, tamo kayau wagedin gō difouf nigin. ¹⁷ Idi ganan don kisi felen. In dō fiya tar, tamo kayau bret gau ado dokon, tunī ifaren anī fito difen, karam tuwelf isokosen.

Pita Kristus Nigin Kurō Fesin
(*Matyu 16:13-28; Mak 8:27-9:1*)

¹⁸ Sain Jesus mugun kosē yen, in dō fiya tar idi ī weim. Ī idi to fedin, “Tamo kayau idi, aya nigin ai dedig?”

¹⁹ Idi solo de diron, “Tunī dirok, Jon naan igunēdiya tamo, tunī dirok, Eliya, are tunīg dirok, profet kulu temeleid anidi taka mata kel fā yen.”

²⁰ Jesus to fedin, “Ba ā uleg? Aya nigin ā ai gef?”

Pita aiten yale iron, “Õ anĩ Negur nẽ Kristus.”

²¹ Age ye di, Jesus enei taka to dirokenẽf nigin, idi wedereid totol iron. ²² Age ye fen, ã iron, “Tamo Naal ã darau musei yale fen, mudur adodo, pris odudug, lo ifelnẽdiya tamo idim dudum difiyẽf. Age de fen, ã dukesi di, naa towo bure fele di, mata kel fã youf.”

²³ Age ye fen, Jesus idi ganan irokenẽdin, “Aib taka aya dõ fiyau fenẽ, ã yogon oroya dudum fe fen, yogon aa tetek, naa ganan faali fe, aya dõ fiyauf. ²⁴ Aib taka, yogon bouwa buru, mata ibodõf nigin oro fef, are fõ yalauf, anĩ aib taka yogon mata bouwa buru, aya nigin ye fen, irailauf, are kel yalouf. ²⁵ Tamo taka ã teneub enĩ ganan kakarai fe, akorou ye fen, ã yogo bou fõ yalauf be irailauf, ere biya ã yalouf? ²⁶ Aib taka, aya nigin ado neu od nigin, mama foug are, sain Tamo Naal, in fula fiya medeĩya, Tama nẽ ado, engel fateul neid fula fiya medeĩya ado disiyouf bun, ãg ã nigin mama foug. ²⁷ Aya ã momoi arokeneik, tunĩ ein difaref, fau to gare de mog, idi Negur nẽ tano dilouf.”

Jesus Bouwa Falei Felen
(*Matyu 17:1-8; Mak 9:2-8*)

²⁸ Jesus enei irokel fen, naa eit age fiya ilele di, ã, Pita, Jon, Jems yale, kosẽ youf nigin arei ilun diselen. ²⁹ ã kosẽ ye mog, yogon nawa falei felen, agef fen, yogon kolos, kolimei filiya nẽ lalan gen, wõ yen. ³⁰ Tamo uru, Moses Eliya ado, ³¹ fula fiya medeĩya ado wowã de fen, Jesus geid wogõ den. Idi Jesus teneub itorõf anĩ nigin wogõ den, anĩ ã Jerusalem oun kisi falauf. ³² Pita ã, ne tã tar geid, mulã nigin meleid morõ kelen, anĩ ere, idi oditekei meleid bi fel fen, idi Jesus nẽ fula fiya medeĩya ado, tamo uru ã geid difaren anĩ dilen. ³³ Tamo idi Jesus ditornẽ mog, Pita Jesus irokenen, “Odug, ada ein ibodõya nigin biya bagai. Ada

salafat towo tanouf, taka ogon, taka Moses nē, taka Eliya nē.” (Ī wogō yen anī, ĩ yogo kelei sā.)

³⁴ Age ye mog, lalo isi, idi kerub fedī di, idi lalo bun dilel mog, kumī den. ³⁵ Ait taka lalo bunem wō ye fen, iron, “Eī neu Kesu, ayam ĩ agirnen. Ī karī wiyēg.” ³⁶ Ait anī wogō yele di, idi Jesus mugu dilen. In dō fiya tar anidi, enei dogo bun dogol ibodon, idi ereb dilen anī, sain anī bun, taka to dirokenen.

Jesus Kesu Kaa Sane Ado El Fiyen

(Matyu 17:14-18, 22, 23; Mak 9:14-27, 30-32)

³⁷ Naa taka bun, idi arein tamal disi mog, tamo kayau musei Jesus tarabā difiyen. ³⁸ Guru fiya atun, tamo takam iweig iron, “Tise, aya ō agonok, ō neu kesu ulekanauf, ere nigin, ĩ neu kesu tekelei bagai. ³⁹ Kaa sanem irounē di, ĩ terē adod ye, ui yedig. Kaa sanem kesu yū irā di, tererē ye fen, awa bun sali moku fedig. Agef fen, kaisā to folō fiye kele fen, ĩ bouwa daū fedig. ⁴⁰ Aya, on dō fiya tar kaa sane diruwauf nigin agonēdin, anī ere, idi kisi feleya sā.”

⁴¹ Jesus solof iron, “Sain enei bun, tamo kayau momoiya sā, sane bagai. Sain ganī aya ā geid tabod ken, ā nigin wau aukesilauf? Ogon kesu ein urousi.”

⁴² Kesu anī isi mog, kaa sanem kesu tenebur yū irā di, tererē yen. Anī ere, Jesus kaa sane ou fiyen, agef fen, kesu anī el fiye ken, ĩ tama kel ifenen. ⁴³ Age fe di, idi ganan, Negur nē megeir odug nigin terefeit den.

Idi ganan, Jesus age fen anī ganan nigin, terē de mog, Jesus in dō fiya tar irokenēdin, ⁴⁴ “Ereb aya arokeneif anī wedereī unog. Tamo Naal ĩ fau kiwai tamo imeid bun dinou fenē.” ⁴⁵ Anī ere, idi od enī nē gariya nigin nene den. Idi nigin gariya anī inokon, anī nigin, idi od anī to kelei ken, ĩ to fiyēya nigin kumī den.

*Ai Anĩ Odug Bagai?**(Matyu 18:1-5; Mak 9:33-40)*

⁴⁶ Jesus nē dō fiya tar idi, aim anĩ idi atun odug ibodōf nigin, luwa diroun. ⁴⁷ Jesus idi neid kisi kelei ken, kesu naal taka yale iroule, ĩ sirin ifarnen. ⁴⁸ Agef fen, ĩ idi irokenēdin, “Aib taka, aya yanau bunem, kesu naal eig fiya taka yalef are, ĩ aya yaleyaf. Aib taka ĩ aya yaleyaf are, ĩ aya sur fiyan anĩ yalef. Ā ganan atun, taka ĩ naal bagai are, ĩ anĩ odug bagai.”

⁴⁹ Jon iron, “Odug, tamo taka, õ yanã nem kaa sesen iruid mog, amã mailen. Anĩ nigin, amã ĩ katũ mafiyēf nigin age mafen, ere nigin, ĩ neda takam sã.”

⁵⁰ Anĩ ere, Jesus iron, “To katũ wiyēg, taka ĩ kiwai to ifeneik, are āgenei.”

Samaria Tamo Kayau Jesus Kiwai Difenen

⁵¹ Jesus saa ilun yale irou iseleya nē naa dodole di, ĩ Jerusalem ileya nigin wau kuturolen. ⁵² Age fe di, ĩ arũ tamo uyu sur fedĩ di, idi Jesus nē ereb ereb dodok fiya nigin, Samaria fonō dilen. ⁵³ Anĩ ere, tamo kayau an to aan difiyen, ere nigin, ĩ Jerusalem ilauf nigin age fen. ⁵⁴ Sain in dō fiya tar Jems Jon ado, anĩ dile fen, idi to difen, “Odug, õ amã yã saa ilun tamal maweig di, isi, idi daũ fediyouf nigin oroyok de?” ⁵⁵ Anĩ ere, Jesus falei yel, ou fiyēdin, ⁵⁶ age de fen, idi fonō taka bun dilen.

*Jesus Dō Fiyēya Bun Kafĩ Fiya Fire Fire**(Matyu 8:19-22)*

⁵⁷ Idi naab luwe dile fen, tamo taka Jesus irokenen, “Õ narib ulauf are, aya õ dō ayōf.”

⁵⁸ Jesus aiten yale iron, “Gaũ kuĩ idi, yenēya nē modoũ ku ado, ninã lalo bun diyok idi, uru ado, anĩ ere, Tamo Naal ĩ mudur inoya nē modoũ sã.”

⁵⁹ Jesus tamo takag irokenen, “Dō wiya.”

Anĩ ere, tamo iron, “Odug, fau de, folõ wiya len, aya ele, neu dei mũ afel fen.”

⁶⁰ Jesus ã irokenen, “Laa tamo idi, laa tutur abob mumã difouf. Anĩ ere, õ ule, Negur nẽ tano nigin wogõ wo.”

⁶¹ Baban takag iron, “Odug, aya õ dõ ayõf, anĩ ere, folõ wiya len, kelau ele, neu ibor tar dabuo afiyeĩd fen.”

⁶² Jesus solof iron, “Taka ã dur bun ima ino fen, koriri yedig anĩ, Negur nẽ tano nigin kabĩ yaleya to kisi falauf.”

10

Jesus In Dõ Fiya Tar Sewenti-tu Sur Fedin (Matyu 11:20-27; 13:16, 17)

¹ Anĩ dumen, Odug sewenti-tu tamo igrineĩd fen, idi, ã taun ganan ado modoũ ilauf nẽ bun, uyulil uru uru susur fedin. ² Jesus idi irokenẽdin, “Kabier saaf musei biya bure felen, anĩ ere, kabĩ tamo musei sã. Age fiya nigin, kabĩ marau, Odug to wiyẽg, kabĩ tamo sur fedin di, yogon kabier dilauf. ³ Uleg! Aya ã sipsip naal gen, gaũ kuĩ atun sur ayeik. ⁴ ã moni nẽ kodol be, faa be, su be to walogouf, agog fen, naab luwen taka to aan wiyẽgouf.

⁵ “Fõ taka aaben ulagauf, uruwa urõgouf, ‘Fõ enei wau inosiya ado.’ ⁶ Tamo taka wau inosiya nẽ anĩ an ibodõf are, ãgenei wauĩ inosiya ã bun ibodõf, sãf are, ã bun kel isiyouf. ⁷ Fõ anĩ bun ubodõgouf, saaf ado naan yõya nigin idi difeneif, are wãgauf, ere nigin, kabĩ tamo ã mala solo yaleya kisi feleya. Fõ fõ to walegef uyõg.

⁸ “ã taun taka bun ulege di, idi ã aan diyeif, ã ereb wagein dinouf anĩ wãgauf. ⁹ Dagi adodo an difaref, el wiyẽdig fen, idi urokenẽdigouf, ‘Negur nẽ tano mogo ã nigin melsã.’ ¹⁰ Anĩ ere, ã taun taka bun ulege di, idi ã to aan diyeif, naab toko tokõ ge fen, urõgouf, ¹¹ ‘ãgenei taun nẽ aas yemã bun degẽ fen anĩg, amã kema ã bun tu mafef. Anĩ ere, ã enei keleĩ youf bagai, Negur nẽ tano

mogo melsã.’ ¹² Aya ã arokeneik, es fiya naa anĩ bun, taun anĩ, in darau Sodom taun darau dalen anĩ wal fiya, yalouf.

¹³ “Korasin taun, õ malalon ado! Betsaida taun, õ malalon ado! Æ bun memelik musei anodin, age fiya gen anĩ, Taia ado Saidon taun bun wõ yem are, mogo kulu waud falei de fen, wau gudũ fiya nẽ gabar difoun ken, aasur dibodom. ¹⁴ Anĩ nigin, es fiya sain bun, ã, morõ Taia ado Saidon taun dalouf anĩ wal fiya, walougouf. ¹⁵ Õ Kapenaum taun, õ yanã anĩ saa ilun iselauf de? Sã bagai, õ laa neid modoũ bun usilauf.

¹⁶ “Taka ĩ karĩ yeik, aya karĩ fiyaf, taka ĩ ã iruyeik, are aya iruyaf, anĩ ere, taka ĩ aya iruyaf, are ĩ aya sur fiyan anĩ iruf.”

¹⁷ Sewenti-tu tamo idi, kulĩya ado keku de, disi diron, “Odug, õ yanã bunem kaa seseneg morõ di, dõ difen.”

¹⁸ Jesus solof iron, “Aya, Satan saa ilunem kolimei lalan gen kakur fen, kubũ ye mog, ailen. ¹⁹ Aya, ã, gogour, ambei lalai wedig fen, kiwai nẽ totol ganam wal gouf nigin, megeir afenein. Ereb takam to tadũ yeif. ²⁰ Anĩ ere, kaa sigoramã dõ difel ge fen, to wauĩ kulĩ youf, anĩ ere, ãgenei yeneĩ saa ilun itoton nigin, wauĩ kulĩ youf.”

²¹ Sain anĩ bun, Jesus, Awa Uur Fateul bunem, kulĩya isokos fen, iron, “Dei, saa ado teneub nẽ Odug, aya õ yanã alesef, ere nigin, safina eneidi, kisi biya ado keleĩ adodo to dilouf nigin, õ unokon, ago fen, simõ gen dibodon anidi bun yaor won. Dei, enĩ are ogon waũ filolõ fiya biya bunem agon.

²² “Ereb ereb ganam, Dei ĩ aya bun inon. Taka nem Naal ĩ ai ya nigin keleĩ sã, Dei yogo dogol keleĩ. Taka nem Dei ĩ ai ya nigin keleĩ sã, Naal yogo dogol ado, tunĩ idi Naalum Dei ifelnẽdiyof nigin igirnẽdif anidim dogol keleĩ.”

²³ Age ye fen, Jesus falei yel, in dõ fiya tar lo feid fen, idi dogol irokenẽdin, “Meleim ã ulegedif anĩ dilef are el

fedif. ²⁴ Ere nigin, aya ã arokeneik, profet musei, king geid, ã ulegef anī dilou fenē nigin waud yenen, anī ere, idi meledim to dilen, idi ã karī gef anī karī dou fenē nigin waud yenen, anī ere, idi wederedim to karī den.”

Samaria Tamo Tobonunã Biya Ado Nē Yaab Od

²⁵ Sain taka bun, lo keleĩ tamo taka fã ye fen, Jesus kisi fiyen. Ī Jesus to fiyen, “Tise, aya naig afe di, mata faimud ibodkeleya anī alouf?”

²⁶ Jesus ĩ irokenen, “Negur nē Itotoya bun Lo ere yef? Ō uwesedig anī, ere yōdig?”

²⁷ Lo keleĩ tamom Jesus solof irokenen, “ ‘Ō, Odug ogon Negur ĩ nigin waũ adok, malãkanon adok, ogon megeir adok, ogon kisi adok bunem, waũ laaf yenēf.* Takag, ‘Ō ogo nigin waũ laa fef gen, nē tã nigineg ago waũ laa fouf.’*”

²⁸ Jesus tamo anī irokenen, “Ō de tutuk solo wol. Enei ago di, ō mata ibodkeleya walouf.”

²⁹ Anī ere, lo keleĩ tamo ĩ, Jesus ĩ nigin keleĩ biya sã fiyēf anī itor ken, Jesus to fiyen, “Age fiyauf are, ai anī neu tã?”

³⁰ Jesus solof iron, “Tamo taka Jerusalem taun tamal Jeriko taun isil mog, bē tamo imeid bun ilen. Idi yogon kolos dinukeis dū di, laa gen yen mog, ditornē diyalelen.

³¹ Sain anī bun, pris taka naab tekelei anī dōf isilen, tamo are de ile fen, ĩ fasis fe tokō felen. ³² Age fiya gen, Lewi tamo takag modoũ anī bun isi, tamo are de ile fen, ĩ fasis fe tokō felen. ³³ Anī ere, Samaria tamo taka iyok isin, tamo yenen nē isi, wō ye, tamo anī ile fen, ĩ nigin wau yun.

³⁴ Ī wagen ilen, moul wain ado gudū fiya bun fi fel fen, ifokenen. Agef fen, tamo are yales, yogon donki teten ino irou ilen, tamo irouya fō bun ino fen, kulatun fiyen. ³⁵ Naa

* 10:27: Diuteronomi 6:5 * 10:27: Levitikas 19:18

taka di, ï tu silwa koin moni yalis, tamo irouya fõ marau ifen ken, iron, ‘Kulatun wiyẽf, sain aya kelauf bun, õ baban mala teten be uran, are aya kela afonõf.’

³⁶ “Õ kisi wof, towo eneidi atun, ai anĩ, bẽ tamo imeid bun ilen anĩ ï ne tã?”

³⁷ Lo keleĩ tamo solof iron, “Tamo ï nigin wau yun anĩ.”
Jesus ï irokeken, “Ule, ï age fen gen, ago.”

Marta Maria Ado Neid Fõ Bun

³⁸ Jesus, in dõ fiya tar geid, naab luwe dile fen, Jesus fonõ taka bun wõ yen, an kayau yana Marta yogon fõ bun Jesus ilauf nigin, Jesus irokenen. ³⁹ ï tura yana Maria, ï anĩ, Odug ye gariyan ibod ken, ï wogõ yen anĩ karĩ yen. ⁴⁰ Anĩ ere, Marta erab erab dodok fiya anĩ bun kisi yen ken, Jesus wagen isi to fiyen, “Odug, neu turau itorna di, aya mugu kabĩ alef anĩ nigin, õ to kisi wof de? ï uroken, aya isenna!”

⁴¹ Age ye di, Odug aiten yalen, “Marta, Marta, õ erab erab musei nigin suwẽ wo fen, waũ morok, ⁴² anĩ ere, tekelei dogol õ nigin biya. Maria ï biya ani igirim, anĩ taka nem to yalelkenẽf.”

11

Jesus Kosẽya Nigin Ifelnẽdin

(Matyu 6:9-13; 7:7-11)

¹ Naa taka bun, Jesus modoũ taka bun kosẽ yen. Sain ï bure fele di, yogon dõ fiya tamo takam Jesus irokenen, “Odug, amã kosẽya nigin ufelnamã, Jon, ne dõ fiya tar ifelnẽdin gen.”

² Jesus idi irokenẽdin, “Sain ã kosẽ gouf, eig ge urõgouf:
“ ‘Dei,
õ yanã fateul ibodõf,
ogon tano isiyouf.

³ Naa mugu mugu bun, naa anĩ nẽ saaf wanamãf.

⁴ Ganan amã bun mosor dinof, amã idi neid mosor nigin wederamã tu kelef, age fiya bagai, õg amã nemã mosor nigin wederẽ tu kel. Ago fen, kisi famãya bun to uroulemãf.’ ”

⁵ Age ye fen, ã idi irokenẽdin, “Ãgenei taka ã, ne mou ado, anĩ bõ atun ã gein ile fen, irokenẽf, ‘Mou, bret towo nem usenna, ⁶ ere nigin, aya neu tã taka, aya bun delẽ isil, anĩ ere, aya ã yõya nẽ ereb taka sã.’

⁷ “Age ye di, ã aaben tamal anim irõf, ‘Aya kabĩ total to wana. Sukar mogo kotũ felel, aya neu kesu tar geid mogo fataren mainek. Aya fã au fen, ereb taka ifonõya kisi feleya sã.’ ⁸ Aya ã arokeneik, ã, ne mou nigin to fã ye fen, bret ifenẽf, anĩ ere, tamo are kukiãya sã kinĩ yei fiyẽ di, fã ye fen, ereb ã orof anĩ kilei ifenẽf.

⁹ “Anĩ nigin, aya ã arokeneik, to gouf, agef ã ifeneif; umirẽgouf, ã gurug gouf; godu godu gouf, ã sukar kã feneif. ¹⁰ Aibem taka to fouf, yalouf; aibem taka imirek, gurug fouf; aibem taka godu godu fouf, sukar kã fel kenẽf.

¹¹ “Ã tama tar, aim ãgenei kesu gau nigin to fef, anĩ ban gogour wenẽgouf de? ¹² Takag, ã tataro faat nigin to fef, ã ambei wenẽgouf de? ¹³ ã seseneĩ bagai, anĩ ere, ãgenei kesu safina biya biya anĩ ifenẽdiya, ã keleĩ bagai youf are, ãgenei anĩ wal fiya, Temeĩ saa ilun ibodok, Awa Uur Fateul aib idi to difiyek, idi ifenẽdiyof bagai!”

Jesus Belsebub Ado Difiyen

(Matyu 12:22-30, 43-45; Mak 3:20-27)

¹⁴ Jesus ait ifokeleya nẽ kaa sane irun. Sain kaa sane iyawo di, tamo ait ifokelen od wogõ yen, age fe di, tamo kayau musei terẽ den. ¹⁵ Anĩ ere, tamo tunĩ diron, “Are kaa sane neid mudur Belsebub yana bunem, ã kaa sesen irudif.” ¹⁶ Tunĩ Jesus kisi difiye ken, saa ilun tamal uris nigin to difen.

¹⁷ Jesus idi neid kisi kelei ken, idi irokenēdin, “Tano taka yogo kiwai ifen ken, fara fouf, are sane lauf, fō taka yogo kiwai ifen ken, fara fouf, are kubū youf. ¹⁸ Satan ī yogo kiwai ifen ken, fara fouf are, yogon tano naig fe ifarau? Aya enī orok, ere nigin, ā urōgef, aya Belsebub yana bunem kaa sesen arudif. ¹⁹ Are aya Belsebub yana bunem kaa sesen arudif are, ere bunem āgenei dō fiya tar kaa sesen dirudidig? Anī nigin, idim ā es diyeif. ²⁰ Anī ere, aya Negur nē ima gege bunem kaa sesen arudif are, Negur nē tano mogo ā bun isil.

²¹ “Tamo megeir ado taka, ī waila kisi feleya ado yogon fō lo fef are, in safina are totoū. ²² Anī ere, taka ī yogon megeir wal fiya anim irounē lai fiye ken, yogon waila ī anī bun total yaledig anī son fe fen, in safina gadō fouf.

²³ “Taka ī aya to fedē fiyaf, ī neu kiwai, takag, ī aya ado to kuru mafef are, ī firagagaū fef.

²⁴ “Sain kaa sane tamo bun tamal ulō yeis fen, gerere tuan ile, si inoya modoū imirek ile to fotou fef. Agef fen, ī irok, ‘Aya fō atoron anī bun baban kelauf.’ ²⁵ Sain ī kel isif, fō ani waī difel fen, madur difen anī ilef. ²⁶ Anī nigin, ī ile fen, baban kaa sesen ī wal fiya sewen anī geif irou isif, age de fen, idi namen dile difaref. Age dife di, tamo anī gai sane bagai lef, uruwa bun nē tobonunā anī wal fiya.”

²⁷ Jesus eneidi nigin wogō ye mog, tamo kayau atun kayau taka iweig iron, “Sinā ō gō yo ken, su ifonon, are ī el fiyek.”

²⁸ Ī solof iron, “Age fiya ban, Negur nē od karī de fen, dō difef anidi, el fedif.”

Jona Bun Uris
(Matyu 12:38-42)

²⁹ Tamo kayau guru fiya mala oduge di, Jesus iron, “Tamo kayau, gama sain enei bun dibodok, are sane bagai.

Idi memelik nigin to difef, anĩ ere, taka to afenẽdiyof, de profet Jona nẽ uris anĩ dogol afenẽdiyof. ³⁰ Jona are Niniwe taun tamo kayau bun uris, age fiya bagai, Tamo Naal ĩg sain enei nẽ tamo kayau bun uris. ³¹ Es fiya sain bun, Kuin Saut tamal fã ye fen, tamo kayau sain enei bun geid, idi neid mosor nigin kurõ falaisiyof, ere nigin, kayau anĩ Solomon nẽ keleĩ karĩ youf nigin, teneub idiyen tamal isin, gama taka Solomon wal fiya are yeir. ³² Es fiya sain bun, Niniwe tamo kayau fã de fen, tamo kayau sain enei bun geid, idi neid mosor nigin kurõ difalaisiyof, ere nigin, idi mogo Jona wogõ ye di, waud falei den, gama taka Jona wal fiya are yeir.

Bouwa Nẽ Lam
(*Matyu 5:15; 6:22, 23*)

³³ “Taka nem lam tõf fen, to iminẽyan be, beĩ kur inodig, age fiya ban, in yoki bun iseginẽdig, age fe di, idi aabẽ disif anidi lalan dilouf. ³⁴ Malã are bouwã nẽ lam. Õ malã biyauf are, ogon bouwã gananeƒ lalan barikãf. Anĩ ere, õ malã sesen lauf are, ogon bouwãg gugum kalauf. ³⁵ Anĩ nigin, lalan õ ado anĩ gugum keleya nigin lo walauf. ³⁶ Age fiya nigin, ogon boũ gananeƒ lalan barikãf fen, siri sitakã to gugum ouf are, lam nẽ lalan õ bun so fe di, yaor ledig gen, bouwa gananeƒ oditekei lalan ouf.”

Jesus Farisia Tamo Ado Lo Ifelnẽdiya Tamo Isisnẽdin
(*Matyu 23:1-36; Mak 12:38-40*)

³⁷ Sain Jesus wogõ ye bure fele di, Farisia tamo takam ĩ, Jesus ado saaf dãf nigin iweignẽ di, aaben ile, tebol bun ibodon. ³⁸ Anĩ ere, Farisia tamo ĩ, Jesus ima ketem kulo fiya sã, saaf nigin ibodon anĩ ile fen, terẽ yen.

³⁹ Age fe di, Odug ĩ irokenen, “Farisia tamo ã, kap ado beĩ agara kulo gedig, anĩ ere, ã namein akorouya ado sanem barikã. ⁴⁰ ã neneya tamo! Negur agara inon anĩ, nameg

to inon de? ⁴¹ Anĩ ere, ereb beĩ namen ibodok anĩ maleg wenẽdigouf, ago ge di, ereb ereb ganan ã bun filiya ibodõf.

⁴² “Farisia tamo ã meleĩlon ado, ere nigin, ã ãgenei edẽ, bakso ado, kabier tamal ereb ereb ganan farag fen, ten tekelei Negur wenẽgedig, anĩ ere, ã lo es fiya ado Negur nigin wau laa fiya utorõgedig. ã dum nẽ anĩ dõg fen, uruwa nẽ anĩg to utorõgem, are dem.

⁴³ “Farisia tamo ã meleĩlon ado, ere nigin, ã Juda neid uub fõ bun modoũ malabag ibodõya ado, maket modoũ bun tamo kayau idim sere diyeik anĩ oroyeik.

⁴⁴ “ã meleĩlon ado, ere nigin, ã tamo mekura dede fiya gen, tamo idi keleĩ sa ken, teten diyõdig.”

⁴⁵ Lo keleĩ tamo taka Jesus irokenen, “Tise, õ enei urõ di, õ amãg kono wamak.”

⁴⁶ Jesus solof iron, “Lo keleĩ tamo, ãg meleĩlon ado, ere nigin, ã tamo kayau, morõ idi faali fiya nigin malai bagai anĩ wenẽdigedig, anĩ ere, ã aug imeĩ gege tekelei idi isennẽdiya nigin to fitei yedig.

⁴⁷ “ã meleĩlon ado, ere nigin, ã profet neid matmat unogedig, anĩ ere, ã tubuĩ tarem idi didenkesin. ⁴⁸ Anĩ nigin, ãgenei tubuĩ tar profet age difedin anĩ, ã megeir ge fen, yaor gef, ere nigin, idi profet didenkesin, ã idi neid matmat unogedig. ⁴⁹ Age fiya nigin, Negur yogon kisi biya bunem iron, ‘Aya fau idi bun profet, aposel ado sur afediyouf, age afe di, idi tunĩ didenkeis fen, tunĩ kafĩ fiya difenẽdiyouf.’ ⁵⁰ Anĩ nigin, teneub inon gariya bunem isif, profet ganan neid naudeid fi felen anĩ nẽ mala solo, tamo kayau gama sain enei bun idim dalouf, ⁵¹ Abel nẽ naud bunem ile, Sekaraia ã tempel alta ado atun dukesin in naud bun. Aya ã momoi arokeneik, naud enĩ ganan nẽ mala solo, tamo kayau gama sain enei bun idim dalouf.

⁵² “Lo keleĩ tamo, ã meleĩlon ado, ere nigin, ã keleĩ nẽ ki walelegen, ã aug namen ileyã sa ken, ã idi namen dilef anidi neid sukar katĩ welegef.”

⁵³ Sain Jesus modoũ anĩ itoron, Farisia tamo, lo ifelnẽdiya tamo geid, ã bun kiwai total dino, to fiya fire fire musei to difiyen, ⁵⁴ ereb od wogõ youf bun dirounẽf nigin tari difiyen.

12

Weder Irouya Ado Tai Fiya (Matyu 10:26-33)

¹ Dirub kele di, tamo kayau tausen musei biya guru difen, anĩ bun idi abob tete tete lalai de difaren, age dife di, Jesus in dõ fiya tar ketem irokeneĩd fen, iron, “Ã, Farisia tamo neid yis nigin lo welegei, are mala yaleya tobonunã. ² Gama ereb dede fiya yenek, are ganã fau lelek falauf, gama ereb iminẽyan yenek, are ganã fau yaorouf. ³ Ã gugum bun wogõ gen anĩ, fau gaa lalan bun karĩ douf, ã aaben wedereim kosesẽ gen anĩ, fau fõ sokoronem kurõ difesiyouf.

⁴ “Neu mou tar, aya ã arokeneik, idi bouwa dukeis fen, anĩ dumen ereb taka baban age fiya kisi feleyã sã anidi to kumĩ wodig. ⁵ Anĩ ere, ã aib kumĩ wiyẽgouf anĩ afelneif: ã bouwa yukeis fen, dumen ã hel bun irãyeif nigin megeir ado anĩ kumĩ wiyẽgouf. Ariya, aya ã arokeneik, ã kumĩ wiyẽg. ⁶ Fisisir faif, tuwenti toea nẽ nem na nigin to sur gedig de? Anĩ ere, Negur ã anidi taka nigin to weder tu keledig. ⁷ Momoi, Negur ãgenei mudureĩ bun fatiyeĩ ganã iwes yalen. To kumĩ wog, ã fisisir musei wal fediya.

⁸ “Aya ã arokeneik, aibem taka, aya nigin tamo meleid bun kurõ falaisiyouf, Tamo Naal ãg, ã nigin Negur nẽ engel meleid bun kurõ falaisiyouf. ⁹ Anĩ ere, taka ã, aya nigin

tamo meleid bun wa fouf, ayag ï nigin Negur nē engel meleid bun wa afouf. ¹⁰ Taka ï, Tamo Naal nigin kiwai ifen ken, kobu yef are, in mosor yalelauf. Ani are, taka ï, Awa Uur Fateul kiwai ifen ken, kono fiyek, in mosor to yalelauf.

¹¹ “Sain ã Juda neid uub fō bun guri diyeï diroule, mudur adodo yeneid adodo meleid bun difarneïf, an wauï moro ken, aug isenneïf nigin naig mafouf, ere mauf, wog fen, to sii yeïf, ¹² ere nigin, sain anï bun, Awa Uur Fateul erob wogō gouf nigin, ifelneïf.”

Neneya Tamo Safina Ado Nē Yaab Od

¹³ Tamo kayau musei atun, tamo takam Jesus irokenen, “Tise, neu turau urokenē di, amã urom akor foi mafouf.”

¹⁴ Jesus solof iron, “Aim aya ã atun es fiya tamo be, foi fiya tamo igirnan?” ¹⁵ Age ye fen, Jesus idi irokenēdin, “Lo welegei, erob erob ganen bun akorouya anï lo welegei, tamo nē mata in safina musei bun to ibodok.”

¹⁶ Age ye fen, ï yaab od enei idi irokenēdin, “Tamo taka safina musei ado, ne teneub bun saaf musei yaledig. ¹⁷ ï kisi yalen, ‘Aya naig afouf? Aya neu saaf inoya nē modoũ sã.’

¹⁸ “Agef fen, ï iron, ‘Aya eig afouf anï de. Neu ki narï afeleid fen, odug nuwa anodiyouf, an neu saaf ado erob erob ganen anouf. ¹⁹ Age afel fen, aya yug nigin orōf, “Õ erob erob biyai biyai musei biya, yar musei nē unof. Ibodōya karika, saaf, naan wokon, waũ el fouf.” ’

²⁰ “Anï ere, Negur ï irokenen, ‘Õ neneya! Bō enei bun bagai, aya ogon mata alelkonōf. Age afe di, aim ogo nigin dodok won anï yalouf?’ ²¹ “Taka ï yogo nigin, agef safina kuru fef, anï ere, Negur mala bun maleg ibodok, ï bun eig bagai fe, wō youf.”

To Osig

(Matyu 6:25-34)

²² Age ye fen, Jesus in dō fiya tar irokenēdin, “Age fiya nigin, aya ã arokeneik, ã āgenei bouweĩ mata ibodōf nigin to osig fen, ere saaf tãf gouf, ã āgenei bouweĩ nigin to osig fen, ere gabar tafilaĩf gouf. ²³ Mata anĩ saaf wal fiya, bouwa anĩ gabar wal fiya. ²⁴ ã kalog uledigedig, idi saaf to ditenēdig, idi saaf to u difedig, idi ki be, udũ inoya modoũ sã, anĩ ere, Negur ifoutnēdidig. ã ninã anidi wal fediya bagai! ²⁵ ã takam yogon mata nigin osi ye fen, aua tekelei tobol fiya kisi feleya de? ²⁶ ã naal bagai enei age fiya kisi feleya sã nigin, ere nigin anĩ ã ererb ererb tunĩ nigin osi gef?

²⁷ “Aa munĩ naig fe odugedig anĩ ulegedig. Idi kabĩ to daledig, to diwadig. Anĩ ere, aya ã arokeneik, kulu King Solomon yogon fula fiya medeĩya bun naki gegē biya biya ifonun animeg, aa munĩ taka to wal fen. ²⁸ Anĩ ere, Negur dubur aa munĩ gama dogol ifarauf, nile di, yã irãf anĩ, agef naki fediyouf are, ã idi wal fediya bagai, Negur naig fe ã ifounneĩf, ã momoiya naal bagai ado! ²⁹ Anĩ nigin, ã wauĩ ere saaf wãgauf be, ere naan wãgauf anĩ bun to unog, anĩ bun to osig. ³⁰ Are haiden idi enĩ ganan nigin meleid dimirēdig. ãgenei Temeĩ ã lau gef anĩ ganan keleĩ. ³¹ Anĩ ere, Negur nē tano umirēg, ago ge di, safina eneidig ifeneĩf.

³² “Musei sã ã, to kumĩ wog, ere nigin, āgenei Temeĩ, tano anĩ ã ifeneĩya nigin wau al fen. ³³ ãgenei safineĩ na sur ge fen, maleg wenēdigouf. ã mugu mugu moni nē kodol to serek fouf anĩ uwagauf, agog fen, saa ilun nē safina biya biya to sa kalauf anĩ kuru gouf, an bē tamo non to isidig, tutũ to dãf. ³⁴ ãgenei safina biya biya ibodok nē an, wauĩg an yenēf.

*Jesus Kel Isiyouf Nigin Ololo Fiya
(Matyu 24:43-51)*

³⁵ “Kabĩ nē naki ufonũg fen, āgenei lam tōg saika wog,
³⁶ tamo idi, nedi odug, tamo kayau ado bagu fiya nē tar bunem kelouf nigin tari difedig, anĩ bunem, sain ĩ isi, sukar godu godu fe di, idi sã kaisã bagai ĩ sukar kã difelkenēf anidi gen ago gouf. ³⁷ Ferfer anidi ololo dife mog, nedi odug isi ilediyof anĩ, idi nigin deuf, aya ā momoi arokeneik, ĩ fau yogo kabĩ nē naki ifoun kel, ferfer tebol bun ibodneid fen, isi, aruneid yalouf. ³⁸ Ferfer anidi saika difel mog, nedi odug, bō atun be, we ado be isi ilediyof anĩ, idi nigin deuf. ³⁹ Anĩ ere, ā enei keleĩ youf: Fō marau ĩ, sain nanĩ be bun, bē tamo isiyof anĩ keleĩ youf are, ĩ yogon fō lo fe di, to narĩ fouf. ⁴⁰ Āg saika gouf, ere nigin, Tamo Naal ĩ fau sain to isiyof gouf bun isiyof.”

⁴¹ Pita to fen, “Odug, ō yaab od enei amã nigin de, ganan nigin urok?”

⁴² Odug solof iron, “Ferfer taka aim anĩ, dō fiya biya, kisi biya ado de? ĩ, yogon odugem ĩ yogon odug nē fō bun, anidi neid saaf dogo neid sain kilei, dōf ifenēdiyof nigin, ima bun inof. ⁴³ Sain tamo odug kelouf bun, ferfer biya bagai age fe di, ilouf, tamo odug ĩ el fiyēf. ⁴⁴ Aya ā momoi arokeneik, tamo odug ĩ, yogon safina ganan, ferfer anĩ ima bun inouf. ⁴⁵ Anĩ ere, ferfer taka ĩ wau bun irōf, ‘Neu tamo odug isiya nigin sain meluk yalef,’ age ye fen, ĩ gariya ino, tamo ferfer ado kayau ferfer iden ken, ĩ yogo saaf biya naan biya yokon, aai sē fedig. ⁴⁶ Ferfer anĩ nē tamo odug, in isiya nē naa ferfer to isiyof ye fen, kisif mog, in isiya sain ĩ keleĩ sã mog, isiyof. Tamo odug, ferfer anĩ gudūf fisik fe fen, momoiya sã geid, nedi modoũ bun inenēf.

⁴⁷ “Ferfer taka ĩ, yogon tamo odug nē oroya keleĩ ken, to dodok fef be, yogon odug orof anĩ to dōf age fef, ĩ fau wōf musei fouf. ⁴⁸ Anĩ ere, taka ĩ to keleĩ ken, darau yaleya nē anĩ age fef, ĩ musei to wō fouf. Aib taka ĩ musei ifenen, ĩ bun musei yaleya nigin irokenēf, agef fen, taka ĩ lo fouf

nigin musei biya ifenen, ï bun musei biya yalouf nigin to fiyēf.

*Jesus Maur Gudū Fiya Nigin To Isin, Isoreya Nigin
(Matyu 10:34-36)*

⁴⁹ “Aya tenebur yā arou asiyouf nigin asin, yā mala kaur mogom are, aya orou bagai fiyam. ⁵⁰ Anī ere, aya naan igūya taka fau alouf, anī nigin, aya wau fatuk morok ile, anī kisi falauf. ⁵¹ Ā kisi gef, aya tenebur ein maur gudū fiya arou asiyouf nigin asin de? Sā bagai, aya ā arokeneik, isoreya nigin asin. ⁵² Gama ilauf bun, ibor tekelei bun, idi faif fara de fen, towom uru kiwai difenēdi di, urum towo kiwai difenēdiyof. ⁵³ Idi fara de fen, tamam kesu kiwai ifenē di, kesum tama kiwai ifenēf, sina, ne barai kiwai ifenē di, ne barai sina kiwai ifenēf, sina yanawau kiwai ifenē di, yanawau kayau sina kiwai ifenēf.”

*Sain Nigin Es Fiya
(Matyu 16:2, 3)*

⁵⁴ Jesus tamo kayau musei irokenēdin, “Sain ā gaa ileyen budū fā ye di, uleg fen, ā kaisā bagai urōgedig, ‘Uyē isiyof,’ ago ge di, age fedig. ⁵⁵ Takag, yau karag maā ubunem fū fef, ā urōgedig, ‘Uruwa dō fadauf,’ are agef wō yedig. ⁵⁶ Ā mala yaleya tamo! Teneub saa ado suma dinof anī uleg fen, es gouf nigin ā keleī. Naig fe di, sain enei nē suma es fiya nigin ā to keleik de?

⁵⁷ “Ere nigin ā aug erab biya anīg to es gedig? ⁵⁸ Ō ogon kiwai ado medistret bun uleg fen, naab luwen ogon kiwai ado od madur wouf, to agouf are, ï ō yale, es fiya tamo bun inenōf, age fe di, es fiya tamo ō polis bun inenō di, polis ō kalabus bun inenōf. ⁵⁹ Aya ō arokonok, ō wareg ganen to unolauf are, ō kalabus bun to kutū wesiyof.”

13

Wauĩ Falei Gouf, Sãf, Inanakalauf

¹ Sain anĩ bun, tunĩ an difaren anidim, Pailat Galili temeleid tunĩ neid naudeid ado dogo neid sesewi fiya nē safina ekul fen anĩ, Jesus dirokenen. ² Jesus solof iron, “Ā kisi gef, Galili temeleid eneidi age de darau dalen nigin, idi neid mosor Galili temeleid ganan neid mosor wal fiya de? ³ Aya ā arokeneik, sã bagai! Anĩ ere, ā wauĩ to falei gouf are, āg ganan inanakalauf. ⁴ Takag, Siloam fõ meluk tamo kayau bun kubũ ye fen, idi eitin idenkesin. Ā kisi gef, idi neid mosor, tamo kayau ganan Jerusalem taun difaref neid mosor wal fiya de? ⁵ Aya ā arokeneik, sã bagai! Anĩ ere, ā wauĩ to falei youf are, āg ganan inanakalauf.”

⁶ Age ye fen, Jesus yaab od enei iron, “Tamo taka, aa fig tekelei yogon wain kabier itenen, anĩ ĩ ile, faat nigin mala itoton, anĩ ere, taka to ilen. ⁷ Anĩ nigin, ĩ wain kabĩ lo fiya tamo irokenen, ‘Yar towo aya asi, aa fig enei bun faat nigin malau atoton, anĩ ere, taka to ailen. Utu urã! Ere nigin teneub gigiru yakasif?’

⁸ “Kabĩ lo fiya tamo solof iron, ‘Odug, baban yar tekelei utorkana len, aya gariyan ku kalĩ afel, yaro te anouf. ⁹ Yar taka bun biyauf, are deuf! Sãf are, utu urã.’ ”

Jesus, Kayau Taka Bagiya Fe Fesen, Sabat Naa Bun El Fiyen

¹⁰ Sabat naa taka bun, Jesus Juda neid uub fõ taka bun od ifelnēdin. ¹¹ Kayau taka, yar eitn kaa sanem irounen nigin dagi ado, an ibodon. Kayau ĩ bagiya fe fesen, agef fen, ĩ madur ifareya kisi feleya sã bagai. ¹² Sain Jesus kayau anĩ lof fen, ĩ wagen iweigne ken, ĩ irokenen, “Kayau, õ ogon dagi bun tamal õ karika afonok.” ¹³ Age ye fen, Jesus ĩ bun ima ino di, kaisã bagai kayau ĩ madur le ifar fen, Negur yana yalesen.

¹⁴ Juda neid uub fõ nẽ mudur, Jesus Sabat naa bun dagi el fiyen nigin, name sane fen, tamo kayau irokenẽdin, “Kabĩ yaleya nigin naa sigis ado. Anĩ nigin, naa anidi bun usig el yeif, Sabat naa bun sã.”

¹⁵ Odug ã irokenen, “Ã, mala yaleya tamo! Ã mugu mugu Sabat naa bun, ãgenei bulmakau be, donki be difaredig modoũ bun tamal birug fen, naan ifenẽdiya nigin to gurig ulegedig de? ¹⁶ Kayau enei, ã Abraham nẽ barai, ã Satanem sain meluk yar eitín ifokelnen, ã ifõya anĩ bun tamal Sabat naa bun to karika afenẽf de?”

¹⁷ Jesus od enei wogõ ye di, yogon kiwai tar ganan mama fedin, anĩ ere, Jesus ereb ereb biya bagai age fen ganan nigin, tamo kayau musei ganan waud al fen.

Masted Faat Yis Ado Nẽ Yaab Od
(*Matyu 13:31-33; Mak 4:30-32*)

¹⁸ Anĩ nigin, Jesus to fen, “Negur nẽ tano anĩ, ere taka gen? Ere bun aya kisi afe di, susu falauf? ¹⁹ Are masted faat gen, anĩ tamo takam yale fen, yogon kabier itenen. Anĩ odug fen, aa wõ ye di, ninã ilun temeleid disi, were bun dibodadan.”

²⁰ Baban ã to fen, “Negur nẽ tano anĩ, ere taka bun aya kisi afe di, susu falauf? ²¹ Are yis gen, anĩ kayau takam yale fen, flawa odug ado falei fe di, ganan gẽ yen.”

Bobog Kidõ
(*Matyu 7:13, 14, 21-23*)

²² Jesus Jerusalem taun ilauf nigin naab luwen iyok ile fen, taun ado fonõ fonõ ile, od ifelnẽdin. ²³ Takam Jesus to fiyen, “Odug, are teke tekelei dogol kel yalediyouf de?”

Jesus idi irokenẽdin, ²⁴ “Bobog kidõ anĩ ileya nigin kabĩ total walogouf, ere nigin, aya ã arokeneik, musei idi namen dilauf nigin age difouf, anĩ ere, to kisi falauf.

²⁵ Sain fõ marau fã ye fen, sukar inolalauf, ã serẽ ufareg fen, godu godu ge ugonẽgouf, ‘Odug, sukar kã wanamãf.’

“Anĩ ere, ĩ solof irõf, ‘Aya ã keleĩ sã, ã nainenem usigen.’

²⁶ “Age ye di, ã urõgouf, ‘Amã õ geid saaf naan ado ton, ago fen, õ nemã naab bun od ufelnamak uyon.’

²⁷ “Anĩ ere, ĩ solof irõf, ‘Aya ã keleĩ sã, ã nainenem usigen. ã sane ago gedig ganan, aya malau bun uyaleleg!’

²⁸ “Sain Abraham, Isak, Jakop, profet ganan geid, Negur nẽ tano bun uledig fen, ã aug mayarẽ irarãyeĩf, an inã wifirig fen, goboreĩ kikokõ youf. ²⁹ Tamo kayau gaa iseyan temeleid, gaa ileyen temeleid, yat temeleid, fa temeleid disi, Negur nẽ tanon tar bun idi neid modoũ dalouf. ³⁰ Momoi, an idi dumen dibodok fau malabag dibodõf, idi malabag dibodok fau dumen dibodõf.”

Jesus Jerusalem Nigin Wau Gudũ Fen
(Matyu 23:37-39)

³¹ Sain anĩ bun, Farisia tamo tunĩ Jesus garan disi dirokenen, “Modoũ enei utor ken, taka bun ule. King Herod ĩ õ inokesiyou fenẽ.”

³² Jesus solof iron, “Uleg, gaũ kuĩ anĩ urokenẽg, ‘Gama ado nil, aya kaa sesen aruid fen, tamo kayau el afediyouf, age afe fen, naa towo bun, aya neu kabĩ anĩ uyu katõ afalauf.’ ³³ Anĩ ere, aya gama, nil, arã toko tokõ afouf, momoi bagai profet taka Jerusalem taun to ito ken, firen laa fouf!

³⁴ “O Jerusalem, Jerusalem, õ profet udenkeis fen, õ bun sur fedig anidi, meein meein wedidig, sain ganĩ aya õ wau afon ken, ogon gerẽ tar kuru afediyouf nigin age afedig, tataro sina momou waye farumen kuru fedig gen, anĩ ere, õ utorõdig! ³⁵ Ulegouf, ãgenei fõ ã bun fonou lef. Aya ã arokeneik, ã aya baban to uleyagauf ile, ã fau urõgouf,

‘Oduḡ yana bunem isif ĩ el fiya ado.’* Sain anĩ bun, ã aya uleyagauf.”

14

Jesus Farisia Tamo Taka Nẽ Fõ Bun

¹ Sabat naa taka bun, Jesus, Farisia tamo uyu irouya taka nẽ fõ bun, saaf yõya nigin ilen, idi an Jesus ololo difen.

² Jesus wagen an, tamo taka bou didiãya nigin darau yaledig anĩ ibodon. ³ Jesus, Farisia tamo, lo keleĩ tamo geid to fedin, “Sabat naa bun, dagi el fediya anĩ lo dõ fiya de, sã?”

⁴ Anĩ ere, idi mutũ difaren. Anĩ nigin, Jesus tamo anĩ yale, el fiye kel sur fiyẽ di, ilen.

⁵ Agef fen, ĩ idi to difen, “Ã taka, Sabat naa bun, kesu be, bulmakau be taka kuren isilau, ã kaisã bagai to dĩ wasagauf de?” ⁶ Age ye di, idi od solof irõya kisi feleya sã.

⁷ Jesus, tamo tebol bun modoũ malabag anĩ gei dife di, ile fen, ĩ idi yaab od enei irokenẽdin, ⁸ “Tamo kayau ado bagu fiya nẽ tar bun, aib õ iweignõf are, modoũ malabag anĩ to walouf, ere nigin, tamo taka õ wal yõya iweignen be. ⁹ Age foug are, ã uru iweigneim marau isi, õ irokonõf, ‘Ogon modoũ anĩ, tamo enei wenẽ.’ Age ye di, õ mama yo ken, modoũ dumen bagai anĩ walouf. ¹⁰ Anĩ ere, õ iweignõf are, modoũ dumen anĩ walouf, ago di, iweignom marau isiyouf, ĩ õ irokonõf, ‘Mou, modoũ biya bun godo urou usel.’ Age fe di, õ modoũ malabag anĩ wale di, ã iweigneim turã tar ganan meleid bun õ yanã oduḡ adouf. ¹¹ Ere nigin, aib taka yogo yana yalesef, fau lai fesilau, aib taka ĩ yogo yana lai fesilef, Negur ĩ yana yalesauf.”

¹² Age ye fen, Jesus fõ marau irokenen, “Sain õ gaa atun saaf be, bõ saaf wenẽdiyoyou fenẽ, ogon mou tar, naud turã tar, sirag tar be, nẽ tã tar safina inid adodo

* **13:35:** Sam 118:26

to uweignēdiyof, agouf, idi aba diweignōf, anī bun ò mala solo difonōf. ¹³ Anī ere, sain ò tar unouf, maleg, bouweid sesen, yeid kirorōya, meleid ifofakeleya anī uweignēdiyof, ¹⁴ agouf, Negur ò el yōf. Idi aba ò ke de difonōya kisi feleya sã, anī ere, madur tamo neid mata kel fãya bun, Negur ò mala solo ifonōf.”

Tar Odug Nē Yaab Od
(*Matyu 22:1-10*)

¹⁵ Tamo tebol bun weim dibodon anidi takam, od enei karī ye fen, ī Jesus irokenen, “Negur nē tanon tar bun tamo saaf yãf anī, ī el fiya ado.”

¹⁶ Jesus solof iron, “Tamo taka tar odug dodok fe fen, musei iweignēdin. ¹⁷ Tar sain bun, ī iweignēdin anidi irokenēdiyof nigin yogon ferfer sur fen, ‘Usig, gama ereb ereb ganan dodok felel.’

¹⁸ “Anī ere, idi ganan de tekelei gen galã od dinon. Uyulil ī iron, ‘Aya gama bagai kabī na alen, anī nigin, aya anī ailau fenē alauf. O malalon ado, aya to asiyouf.’

¹⁹ “Taka iron, ‘Aya bulmakau ten na alen, anī idi naig fiya anī ailau fenē elef. O malalon ado, aya to asiyouf.’

²⁰ “Takag iron, ‘Aya gama bagai kayau mata alen nigin, aya isiya kisi feleya sã.’

²¹ “Ferfer kel ile, ne odug od enei irokenen. Age fe di, fõ marau name sane fen, yogon ferfer irokenen, ‘Kaisã bagai ule, taun nē naab odug, naab nanaal ado dõ wo fen, maleg, bouweid sesen, meleid ifofakeleya, yeid kirorōya anidi guri urou usi.’

²² “Ferfer iron, ‘Odug, ò urom are mogo age afel, anī ere, modoũ fau lolokã.’

²³ “Age ye di, odug yogon ferfer irokenen, ‘Naab uyok ule fen, fonõ fonõ naabur tamo kayau idi anī disiyouf nigin total bagai urokenēdi di, disi, neu fõ isokosauf. ²⁴ Aya ã

arokeneik, aya tamo idi aweignēdin anidi taka, neu tar bun saaf bagai to kobū de dilouf.”

Kisi Es Wo Fen, Jesus Dō Wouf
(*Matyu 10:37, 38*)

²⁵ Tamo kayau musei, Jesus weim dile fen, ī falei yel, idi irokenēdin, ²⁶ “Taka ī aya gein isif, ne tama, sina, ne kayau, kesu tar, ne tura tar, main tar, yogon matag to itorōf are, ī neu dō fiya tamo wō youf nigin kisi feleya sā. ²⁷ Takag, taka ī yogon aa tetek to faali fe fen, aya dō fiyaf, ī neu dō fiya tamo wō youf nigin kisi feleya sā.

²⁸ “Ā taka, fō meluk taka inoya nigin orouf are, ī tetun ibod ken, fō inolauf nigin moni kisi feleya ado be anī es fouf, age fiya sā de? ²⁹ Ere nigin, ī fō gariya ino mā, inoleya to kisi falauf are, tamo kayau ganān anī dile fen, kasā difiye ken, ³⁰ dirōf, ‘Tamo enei fō kare fen, anī ere, inoleya kisi feleya sā.’

³¹ “Takag, king taka, king taka ado kusī douf nigin, ī ten tausen kusī tamo adom, king taka tuwenti tausen kusī tamo ado kusī disif anī, kusī bun wal fiyēya kisi feleya be sā be anī, tetun ibod ken, es fouf, age fiya sā de? ³² Ī to kisi falauf are, ī king taka fau gerō ifar mog, wowor fiya tamo sur fedi di, idi komo fiya nigin to difiyēf. ³³ Age fiya gen bagai, ā taka ī, ereb ereb ganān ī ado anī to itorōf are, ī neu dō fiya tamo wō youf nigin kisi feleya sā.

³⁴ “Anī nigin, sol ī biya, anī ere, in kai sa kalauf are, naig fe di, ī baban kai youf? ³⁵ Sol age fiya are, teneub ado falei fiya nigin ado, gaar te ado falei fiya nigineg to biya, anī nigin dirailedig.

“Aib ī karīya nigin weder ado, utornē karī youf.”

15

Sipsip Fõ Yelen Nē Yaab Od (*Matyu 18:12-14*)

¹ Takis yaleya tamo, mosor adodo geid ganan, Jesus karī difiyēf nigin ī non disin. ² Anī ere, Farisia tamo, lo ifelnēdiya tamo geid, nauseir de fen, diron, “Tamo enei, mosor adodo aan fiyeīd fen, weim saaf doko.”

³ Age de di, Jesus yaab od enei irokenēdin, ⁴ “Ā taka wan handred sipsip ado, anī tekelei iminkalauf are, ī nainti-nain sipsip yaorin itorneīd fen, iminkelen anī imirek ile fotou fedig, age fiya sã de? ⁵ Sain ī fotou fouf, ī wau adod fen, yale, benerin orowa sef, ⁶ fõ bun ilauf. Agef fen, ī ne mou tar ado, ne tã tar gou feid irõf, ‘Ā aya geid kulī tauf. Aya neu sipsip fõ yelen anī fotou afel.’ ⁷ Aya ā arokeneik, age fiya gen bagai, mosor ado tamo taka wau falei yef bun, saa ilun kulīya odug adouf anim, nainti-nain madur tamo baban faleiya nē sã idi nigin kulīya wal fiya.

Silwa Koin Moni Iminkelen Nē Yaab Od

⁸ “Takag, kayau taka silwa koin moni ten ado, anī tekelei iminkalauf are, ī lam tõf, fõ waif fen, el fe imirek ile fotou fouf, age fiya sã de? ⁹ Sain ī fotou fouf, ī ne mou tar ado, ne tã tar gou feid irõf, ‘Ā aya geid kulī tauf. Aya neu silwa koin moni iminkelen anī fotou afel.’ ¹⁰ Age fiya gen bagai, aya ā arokeneik, mosor ado tamo taka wau falei yef ī nigin, Negur nē engel meleid bun kulīya odug wõ yef.”

Kesu Fõ Yelen Nē Yaab Od

¹¹ Jesus tobol fe iron, “Tamo taka kesu uru adon. ¹² Ibuyem tama irokenen, ‘Dei, akor neu anī fara wana.’ Anī nigin, temeid yogon safina idi atun foi fen.

¹³ “Anī bure fel fen, sain meluk to ilele di, kesu ibuye, safina ī ado ganan kuruf yale irou, teneub taka bun gerõ biya ilen, an in safina tobonunã to biya bun daū felen. ¹⁴ Ī

ereb ereb ganan daũ fele di, teneub anĩ bun naũ odug wõ yen, age fe di, ĩ bun lau fiya wõ yen. ¹⁵ Anĩ nigin, ĩ ile, fõ morou taka bun kabĩ yalouf nigin to fiyẽ di, fõ moroum ĩ bor saaf ifenẽdiyof nigin yogon kabier sur fen. ¹⁶ ĩ naũ bagai nigin bor saaf dõ di, ĩg anĩ yõya nigin orodig, anĩ ere, takam ereb taka to ifenẽdig.

¹⁷ “Ī kisi kelen sain, ĩ iron, ‘Neu dei ĩ kabĩ tamo musei ado, idi saaf barikã. Aya ein naum laa fiyau fenẽ! ¹⁸ Aya fã au, neu dei garan kelau fen, ĩ arokenẽf: Dei, aya saa ilun ado õ bun mosor anon. ¹⁹ Aya to biya nigin, neu kesu to wouf, ogon kabĩ tamo oroi waledin taka gen waleyauf.’ ²⁰ Anĩ nigin, ĩ fã ye, tama gein ilen.

“Anĩ ere, ĩ fau gerõ iyok isi mog, tama ĩ kesu ile fen, ĩ nigin wau fatuk yũ di, kesu gein gudu ref ile, kakarai fiye ken, umã fiyen.

²¹ “Kesum tama irokenen, ‘Dei, aya saa ilun ado õ bun mosor anon. Aya to biya nigin, neu kesu to wouf.’

²² “Anĩ ere, tama ĩ yogon ferfer irokenẽdin, ‘Gamanem kolos biya bagai waleg urousig, ĩ ufounnẽg, ima gege bun sai unog fen, ye bun su unokenẽg. ²³ Bulmakau lubu bou dĩa waleg urousig ukesig. Ada tar tano tokon, sigigi tafouf. ²⁴ Ere nigin, neu kesu enei laa fen anĩ baban matal, ĩ fõ yelen anĩ baban fotou tafiyem.’ Anĩ nigin, idi gariya dino sigigi difen.

²⁵ “Sain anĩ bun, kesu matu ĩ kabier ibodon. Dum ĩ iyok isi, fõ kelẽ fiye ken, fõ non kui de gurũ de mog, karĩ yen. ²⁶ Agef fen, ĩ kabĩ tamo taka iweigne ken, to fiyen, ‘Oun ere naig difef?’ ²⁷ Kabĩ tamo ĩ aiten yale iron, ‘Turã kel isil, anĩ tamã bulmakau lubu bou dĩa yum, ere nigin, tamam ĩ bouwa totoũ biya bagai ado kel yalel.’

²⁸ “Age ye di, tura matu name sane fen, fõ bun ileya nigin itoron. Age fe di, tama mayarẽ ile wowor fiyen.

²⁹ Anĩ ere, kesu ĩ tama solof irokenen, ‘Ulefe, yar enei

ganan aya ò sigor taka to wal afe fen, arunã alef asin. Anĩ ere, ò aya meme lubu taka wana di, neu mou tar geid to sigigi mafen. ³⁰ Anĩ ere, ò naal enei are, ogon safina, kayau bouweid na nē sur difedig anidi bun daũ fel fen, fonō isi di, ò bulmakau lubu bou dīya ukenem!’

³¹ “Tama iron, ‘Neu kesu, ò aya ado faimud tabodōdig. Safina ganan aya ado, are ogon. ³² Anĩ ere, ada sigigi tafē fen, wauda al fem bagai, ere nigin, turã enei laa fen anĩ baban matal, ĩ fō yelen anĩ baban fotou tafiyem.’ ”

16

Kabĩ Tamo Neid Orowa Tobonunã Sane Kisi Biya Ado Nē Yaab Od

¹ Takag, Jesus in dō fiya tar irokenēdin, “Safina musei ado tamo taka, ĩ yogon kabĩ tamo neid orowam in safina daũ fef yeya karĩ yen. ² Anĩ nigin, ĩ iweignē ile di, to fiyen, ‘Eĩ ere od anĩ ò nigin karĩ auf? Ogon kabĩ walen anĩ faded wo di, karĩ auf, ere nigin, ò baban kabĩ tamo neid orowa to ubodōf.’

³ “Kabĩ tamo neid orowa yogo nigin iron, ‘Gama aya naig afouf? Neu odug neu kabĩ yalelkanaf. Aya meku yaleya nigin totolou sã, agef mãg, aya nonĩya nigin mama ado. ⁴ Aya naig be afouf are aya keleĩ, anĩ bunem sain aya neu kabĩ ein atorōf are, tamo kayau neid fō bun ileya nigin aan difiyauf.’

⁵ “Age ye fen, ĩ, yogon odug bun wareg dalen anidi mugu mugu iweignēdi di, disin. ĩ tamo uyulil anĩ to fiyen, ‘Ō neu odug bun wareg ganĩ walen?’

⁶ “Ĭ aiten yale iron, ‘Eit handred galen aa oliv moul alen.’ ” Kabĩ tamo neid orowa ĩ irokenen, ‘Ogon wareg ditoton wale, kaisã ubod ken, fo handred utot.’

⁷ “Age ye di, ĩ uyulil dō fiyen anĩ to fiyen, ‘Ba ò wareg ganĩ walen?’

“Ī solof iron, ‘Wan handred wit bek alen.’

“Kabī tamo neid orowam ĩ irokenen, ‘Ogon wareg ditoton wale, eiti utot.’

⁸ “Yogon odug ĩ, kabī tamo neid orowa idegēya tamal, ĩ kisi el fe yale fen, age fen nigin, yana yalesen. Ere nigin, tamo kayau teneub enei bun temeleid kisi el de dale fen, ereb dogo neid nigin tamo kayau lalan bun temeleid wal fediya age difedig. ⁹ Aya ã arokeneik, teneub enei nē safina bunem ã aug nigin neĩ mou tar waledigouf, anĩ bunem, sain safina sa kalauf, mata gai ibodkeleya bun aan diyēĩf.

¹⁰ “Taka ĩ ereb naal bagai el fe lo fef, odug buneg agef lo fouf, taka ĩ naal bagai bun idegek, odug buneg idegēf.

¹¹ Anĩ nigin, ã tenebur enei nē safina to el ge lo gen ouf are, aim ã momoi nē safina lo fiya nigin ineneĩf? ¹² ã takan nē safina to el ge kulatun gen ouf are, aim anĩ ã safineĩ ifeneĩf?

¹³ “Kabī tamo takam odug uru bun to kabī yalouf. Taka nigin to wau yen ken, taka nigin wau laa fouf be, taka anĩ aruna yale fen, taka anĩ to awa yāf. ã Negur nigin ado moni nigin aruna yaleya kisi feleya sã.”

¹⁴ Farisia tamo moni nigin waud laa fedig anĩ, od enei ganan karĩ de fen, Jesus kasã difiyen. ¹⁵ Age dife di, Jesus idi irokenēdin, “ã bagai anĩ, tamo meleid bun, ã aug nigin biya age mafef gedig, anĩ ere, Negur ĩ wauĩ keleĩ bagai. Tamo ereb nigin waud fatuk difenek, are Negur mala bun ninir bagai.”

*Ifelnē*diya Od Tobol Fiya

¹⁶ “Lo nē od ado, profet neid od wogō def disi, Jon bun daun. Sain anĩ bunem, Negur nē tano nigin biya od wogō def disif, age fe di, ganan namen ileya nigin mugu mugu teĩbir def. ¹⁷ Saa teneub ado iminkeleya nigin are

karika, anĩ ere, Lo bun itotoya togo fiya naal bagai taka to iminkalauf.

¹⁸ “Taka ĩ aiwa iru fen, kayau taka yalouf are, ĩ seseirã inof, taka ĩ kayau tamo takam irun anĩ yalouf are, ĩ seseirã inof.

Safina Musei Tamo Ado Lasarus

¹⁹ “Safina musei ado tamo taka, naa ganan bun kolos naki biya, saaf biya, ibodõya biya ibodõdig. ²⁰ Maleg taka yana Lasarus, gurumam barikã, safina musei ado tamo ne bobogẽ yenẽdig. ²¹ Agef fen, ĩ, safina musei ado tamo nẽ tebol bunem kuku ref anĩ yãf nigin orodig. Gaũg disi, guruma seum difedig.

²² “Dum maleg tamo laa fe di, engelem Abraham wagen dirou diselen. Safina musei ado tamog laa fe di, mũ difen. ²³ Laa neid modoũ bun, safina musei ado tamo darau odug yale fen, ĩ gerõ mala irakel, Lasarus Abraham wagen ibod mog, ilen. ²⁴ Agef fen, ĩ Abraham iweigne ken, iron, ‘Dei Abraham, aya nigin waũ ino ken, Lasarus sur wiyẽ di, ima gege uyum naan kobũf fen, irousi baleu felu kouf, ere nigin, aya yã enei bun darau odug alef.’

²⁵ “Anĩ ere, Abraham aiten yale iron, ‘Kesu, õ mata ubodon sain, õ ereb ereb biya wale mog, Lasarus ĩ ereb ereb to biya yalen, anĩ karĩ wo, anĩ ere, gama ein ĩ wau wã fe di, õ darau odug bun ubodok. ²⁶ Takag, enei ganan teten, amã ã geid atun meku odug inon, anĩ bunem, idi ein tamal ã gein isiya nigin kisi feleya sã, takam an tamal amã gein ibal isiya nigineg kisi feleya sã.’

²⁷ “Ĩ aiten yale iron, ‘Age fiyauf are, Dei, aya õ agonok, neu dei nẽ fõ bun Lasarus sur wiyẽ di, isilauf, ²⁸ ere nigin, aya turau tar faif dibodok. Utornẽ len, wedereid irouwauf, age fe di, idig darau odug nẽ modoũ enei bun to disiyouf.’

²⁹ “Abraham solof iron, ‘Idi Moses nē itotoya ado profet neid itotoya ado, utorneid len, idi anidi bun wedereid dinouf.’

³⁰ “Ī iron, ‘Age fiya sā, Dei Abraham, laa bun tamal takam idi bun isilauf are, idi waud falei youf.’

³¹ “Anī ere, Abraham tamo anī irokenen, ‘Idi Moses nē od ado profet neid od nigin to wedereid dinouf are, laa bun tamal takam fā ye fen, idi irokenēdiyoufeg to karī douf.’ ”

17

Jesus Mosor Ado Momoiya Nigin Ifelnēdin

(Matyu 18:6, 7, 21, 22; Mak 9:42)

¹ Jesus in dō fiya tar irokenēdin, “Ereb ererb tamo mosor bun inenēdiyouf anī isiyouf bagai, anī ere, tamo nanī be bunem isif, ĩ malalon ado. ² Taka ĩ nanaal enidi taka mosor bun inenēya ban, ĩ meein odug guyutu bun ifo ken, maaīwō irāya nigin biya bagai. ³ Anī nigin, ā lo welegei. “Ō turā mosor inouf, ou wiyēf, anī ĩ falei youf are, ō in mosor nigin wederē tu kel. ⁴ Ī naa tekelei bun, ō bun mosor ino sewen fouf, ĩ ō gein isi, sewen fe irōf, ‘Aya awaul,’ ō in mosor nigin wederē tu kel.”

⁵ Aposel idi Odug dirokenen, “Nemā momoiya odug wouf!”

⁶ Jesus solof iron, “Ā momoiya naal, masted faat gen adouf are, aa enei urokenēgouf, ‘Kusu wale, usil maaīwō ufarauf,’ ago ge di, ā sigoreī dō fouf.

⁷ “Ā taka, yogon ferfer kabier teneub yūf be, sipsip lof fen, kabierem isi mog, ne maraum tau, ‘Kaisā bagai saaf yōya nigin usi ubod,’ fiyēf de? ⁸ Age fiya ban, ĩ eig youf, ‘Neu saaf dodok wol fen, ō naki wol, arunau wale, akas bure afele di, gama ō saaf ado naan wāf.’ ⁹ Ī irokenē di, dōf age fen nigin, maraum ferfer tau de wiyal fiyēf de? ¹⁰ Anī nigin, ā ererb ererb irokeneik anī ganan dōg, ago weleg fen,

ãg eig ge urõgouf, ‘Amã ferfer to biya, amã nemã kabĩ anĩ dogol malel.’”

Jesus Tamo Ten Lepra Dagi Adodo El Fedin

¹¹ Jesus Jerusalem ileya nigin, Samaria ado Galili distrik daũ atu iyok ilen. ¹² Ì fonõ taka bun ile mog, tamo ten lepra dagi adodo, ì fotou difiyen. Idi gerom difar fen, ¹³ aiteid odug nem diweig diron, “Jesus, Odug, amã nigin malalon yõ!”

¹⁴ Sain ì idi ileid fen, iron, “Uleg, aug bouweĩ pris ufelnẽdigouf.” Age ye di, idi dile mog, bouweid biya len.

¹⁵ Idi neid taka bouwa biya len anĩ ile fen, kel isi, ait odugem Negur yana yalesen. ¹⁶ Jesus ye gariyan kubũ ye yen ken, de wiyal fiyen, ì Samaria tamal.

¹⁷ Age fe di, Jesus to fen, “Ten ganan to biya ledin de? Tamo nain idi nain difaref? ¹⁸ Takam to kel isi, Negur yana yalesel, yaũ enei dogol de?” ¹⁹ Jesus age ye fen, ì irokenen, “Fã wale fen, ule, ogon momoiyam õ el yom.”

Jesus Negur Nẽ Tano Nigin Wogõ Yen

(Matyu 24:23-28, 37-41)

²⁰ Sain taka, Farisia tamom, Negur nẽ tano ere sain isiyouf nigin Jesus to difiyẽ di, Jesus solof iron, “Negur nẽ tano, malam ileya kisi feleya sã bunem isidig, ²¹ tamo to ‘Eĩ yeir,’ be, ‘Your oun,’ be douf, ere nigin, Negur nẽ tano are ã atun ibodok.”

²² Age ye fen, Jesus yogon dõ fiya tar irokenẽdin, “Sain isi di, Tamo Naal nẽ naa taka ileya nigin oroyeĩf, anĩ ere, ã anĩ to ulogouf. ²³ Tamom dirokeneĩf, ‘Ì your!’ be, ‘Ì yeir!’ douf. ã, to uleg, idi to dõ wedig. ²⁴ Ere nigin, Tamo Naal, yogon naa bun, kolimei filiya lalan saa gariyanem irou, idikeleyan isiledig gen. ²⁵ Anĩ ere, uruwa ì darau musei

yale di, tamo kayau sain enei bun dibodok anidi ĩ dudum difiyēf.

²⁶ “Noa nē sain bun age fen gen, age fiya bagai Tamo Naal nē sain buneg age foug. ²⁷ Tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. Agef mog, kuwei isi fen, idi ganan daũ fedin.

²⁸ “Lot nē sain buneg de age difen, tamo kayau saafem, naanem difen, na dalef, na sur difef, saaf diton, fō dino mog, difen. ²⁹ Anĩ ere, naa Lot Sodom taun itor ilen bun, yā ado meein salfa, saa bunem uyē gen kukur fen, idi ganan daũ fedin.

³⁰ “Age fiya gen bagai, Tamo Naal yaorouf nē naa bun, agef wō youf. ³¹ Naa anĩ bun, taka ĩ yogon fō agaran ibod mog, in safina namen ibodok anĩ yalouf nigin to kel isilauf. Age fiya bagai, taka ĩ kabier ibodok, yogon safina yalouf nigin to kel ilauf. ³² Lot nē kayau bun kisi gouf! ³³ Taka ĩ yogon mata yalouf nigin kisi foug, ĩ mata anĩ fō yalauf. Taka ĩ yogon mata anĩ itorōf are, ĩ yogon mata irou kafĩ falauf. ³⁴ Aya ā arokeneik, bō anĩ bun, tamo uru idi fatar tekelei bun denēf, tekelei yalouf, taka itornēf. ³⁵ Kayau uru idi wit ditutu mog, tekelei yalouf, taka itornēf.”* ³⁷ Idi to difen, “Odug, õ urok anĩ nain wō youf?” Jesus idi irokenēdin, “Nain be laa yenek nē an, tum guru difoug.”

18

Kayau Waab Tuwa To Yu Kelen Nē Yaab Od

¹ Age ye fen, Jesus, in dō fiya tar idi faimud kosēya nigin tuweid to yũf anĩ ifelnēdiyof nigin, yaab od taka irokenēdin. ² ĩ iron, “Taun taka bun, es fiya tamo taka

* **17:35:** Itotoya tunĩ eig de ditoton: itornēf. ³⁶ Tamo uru idi kabier difarauf, tekelei yalouf, taka itornēf.

ibodon, ï Negur to kumĩ fiyēdig, tamog to iwesnēdig. ³ Taun anĩ bun an, kayau waab taka ibodon, ï es fiya tamo bun toku kel fen, yogon kiwai mala solo ifenēf nigin irokenēyai yedig.

⁴ “Es fiya tamo ï kaisã to karĩ fiyen, anĩ ere, dum ï yogo nigin iron, ‘Aya Negur to kumĩ afiyek, tamog to awesnēdif, ⁵ anĩ ere, kayau waab enei toku morō ifanaf nigin, in morō anĩ ail fen, kayau ï irok anĩ age afouf, anĩ bunem ï to kel fen, morō ifanauf!’ ”

⁶ Jesus age ye fen, iron, “Es fiya tamo sane, ereb ï iron anĩ karīg. ⁷ Negur yogon igirnēdin anidi, bō ado gaa ado diweig dirokenēdig nigin, ï lo nē madur fiya to ifenēdiyof de? ï sain meluk to karĩ fiyēdiyof de? ⁸ Aya ã arokeneik, ï kaisã bagai lo nē madur fiya ifenēdiyof. Anĩ ere, Tamo Naal isiyof sain bun, tenebur ein ï momoiya fotou fouf de?”

Farisia Tamo Taka, Takis Yaleyã Tamo Ado Nē Yaab Od

⁹ Tunĩ idi dogo nigin amã madur bagai de fen, tunĩ meleid irim lai difedidig anidi bun, Jesus yaab od eneig irokenēdin, ¹⁰ “Tamo uru tempel bun kosē douf nigin diselen, taka Farisia tamo, taka takis yaleyã tamo. ¹¹ Farisia tamo ifar fen, yogo nigin kosē yen, ‘Negur ò de ayok, aya tamo tunĩ gen sã, bē diledig, sane age difedig, seseirã dinodig, takis yaleyã tamo enei geneg sã. ¹² Aya uub tekelei bun naa uru kuri au fen, ereb ereb ganã aya alef anĩ, ten teke tekelei ò afonōdig.’

¹³ “Anĩ ere, takis yaleyã tamo ï so rel ifaren. ï saa iluneg to itad fen, anĩ ere, ï akor yu ken, iron, ‘Negur, aya nigin waũ inōf, aya mosor temelou.’

¹⁴ “Aya ã arokeneik, Farisia tamo anĩ sã, takis yaleyã tamo enei, Negur mala bun ï madur fen, fō bun ilen. Ere

nigin, taka ï yogo yana yalesef, Negur ï yana lai fouf, taka ï yogo yana lai fef, Negur ï yana yalesauf.”

Kesu Nanaal Jesus Geid

(Matyu 19:13-15; Mak 10:13-16)

¹⁵ Takag, tamo kayau, Jesus kesu momoug kobũ fediyouf nigin ï wagen guri difeid disin. Age dife di, in dô fiya tar anï dile fen, idi ou difiyēdin. ¹⁶ Anï ere, Jesus kesu ï wagen iweigneïd fen, iron, “Utornēdig len, kesu nanaal aya wageun disiyouf, idi to katũ wedig, ere nigin, Negur nē tano are eig fediya neid. ¹⁷ Aya ā momoi arokeneik, aib taka ï, Negur nē tano, kesu naal age fiya gen to yalouf are, ï Negur nē tanon to bagai ilauf.”

Uyu Irouya Tamo Safina Musei Ado

(Matyu 19:16-30; Mak 10:17-31)

¹⁸ Uyu irouya tamo taka Jesus to fiyen, “Tise biya, aya ere naig afe fen, mata faimud ibodkeleya alouf?”

¹⁹ Jesus ï irokenen, “Ere nigin õ aya anï biya wiyaf? Aibem taka biya sã, Negur yogo dogol. ²⁰ Õ ïtãfiya keleï: ‘Õ seseirã to unouf, õ tamo taka to ukesiyouf, õ to bē walouf, õ taka nigin idegēya od to urõf, sinã tamã yeneid walesauf.’*”

²¹ Age ye di, ï iron, “Enei ganan aya kesu naalun dô afef asin.”

²² Jesus enei karï ye fen, ï irokenen, “Õ fau tekelei anï inï sã. Ogon safina ganan na nigin sur wo fen, maleg tamo weneïd, agouf anï õ saa ilun safina biya adouf. Ago wol fen, usi, aya dô wiya.”

²³ Anï ere, ï od enei karï ye fen, wau fatuk gudũ fen, ere nigin, ï safina musei biya ado. ²⁴ Jesus ï lege fiye ken, iron, “Safina musei adodo tamo, Negur nē tano bun iley a nigin, gai malai bagai! ²⁵ Momoi, kamel ï, gabar iwaya nē nil

* **18:20:** Eksodas 20:12-16; Diuteronomi 5:16-20

ku bun ileya nigin, karika bagai, safina musei ado tamo, Negur nē tano bun ileya nigin, malai bagai.”

²⁶ Idi od anī karī de fen, to difen, “Age fiyauf are, aim anī mata ibodkeleya anī yaleya nigin kisi feleya?”

²⁷ Anī ere, Jesus solof iron, “Ereb tamom age fiya nigin kisi feleya sã anī, Negur age fiya nigin kisi feleya.”

²⁸ Pita Jesus irokenen, “Ulef, amã õ dõ mayõf nigin, ereb ereb ganan amã ado anī matoron!”

²⁹ Age ye di, Jesus idi irokenēdin, “Aya ã momoi aro-keneik, aib taka fõ, kayau, tura tar, sina tama tar be, gere tar, Negur nē tano nigin itoron, ³⁰ ã mala solo musei bagai sain enī bun yalouf, ã dumen isiyouf buneg mata faimud ibodkeleya yalouf.”

*Jesus In Laa Nigin Irõ, Towo Fen
(Matyu 20:17-19; Mak 10:32-34)*

³¹ Age ye fen, Jesus, in dõ fiya tar tuwelf firen geif iroule irokenēdin, “Ulegef, ada Jerusalem teselef, ereb ereb ganan Tamo Naal nigin profet ditoton anī, fau kisi falauf. ³² ã fau haiden Israel sã anidi imeid bun ilauf. Idi ã fau diselinēf, kono difiyēf, disisnēf, wagī difiye ken, dukesiyouf. ³³ Naa towo bun, ã fau baban mata kel fã youf.”

³⁴ Anī ere, dõ fiya tar, enei ganan taka to kelein. Od anī nē gariya idi bun iminen, agef fen, idi ã ereb nigin irok anī to kelein.

*Maleg Tamo Mala Ifofakeleya Anī Mala Fara Felen
(Matyu 20:29-34; Mak 10:46-52)*

³⁵ Sain Jesus Jeriko kelē fiyē mog, tamo taka mala ifofakeleya, naab yerin nonī yef ibodon. ³⁶ ã tamo kayau musei disi dilef ya karī ye fen, ereb wõ yef anī nigin to fedin. ³⁷ Idi ã dirokenen, “Jesus Nasaret tamal isi ilef.”

³⁸ Age de di, ã iweig iron, “Jesus, Dawid Naal, aya nigin malalon yõ!”

³⁹ Tamo uyu dilen anidim sakã difiye ken, foro yalauf nigin dirokenen, anĩ ere, ĩ wade bagai iweig iron, “Dawid Naal, aya nigin malalon yõ!”

⁴⁰ Jesus dē yel fen, tamo ĩ wagen dirou disiyouf nigin irokenēdin. ĩ isi melsã di, Jesus ĩ to fiyen, ⁴¹ “Aya õ ere age afonõf ani, õ oroyok?”

Tamo anĩ solof iron, “Odug, aya malau kelē yalau fenē.”

⁴² Age ye di, Jesus ĩ irokenen, “Malã fara wol, ogon momoiya anim el yom.” ⁴³ Kaisã bagai, ĩ mala fara fel fen, Jesus dõf, Negur yana yalesen. Tamo kayau ganan anĩ dile fen, idig Negur yana dalesen.

19

Sakeus, Takis Yaleya Tamo

¹ Jesus Jeriko taun wõ ye fen, atu iyok ilen. ² Tamo taka yana Sakeus an ibodon. ĩ takis yaleya tamo neid mudur, safina musei ado. ³ ĩ Jesus ĩ ai bagai anĩ ilouf nigin oron, anĩ ere, ĩ tobega tamo nigin ĩ kisi feleya sã, ere nigin, tamo kayau musei dinonolnen. ⁴ Anĩ nigin, ĩ ket gudu ref ile, Jesus ilouf nigin aa fig ilun sõ yen, ere nigin, Jesus naab anĩ dõf, are isi ilauf.

⁵ Sain Jesus modoũ anĩ bun ulõ yeis fen, mala ilun ira ken, ĩ irokenen, “Sakeus, kaisã bagai kutũ weis. Gama aya ogon fõ bun abodõf bagai.” ⁶ Age ye di, ĩ kaisã kutũ yeis fen, wau sere fiya ado Jesus aan fiyen.

⁷ Tamo kayau ganan enei dile fen, kosesē kurã den, “ĩ mosor ado tamo nē fõ bun mogo ilef.”

⁸ Anĩ ere, Sakeus ifar fen, Jesus irokenen, “Odug, ulef! Gama yeir aya neu safina atun fara afe fen, sitakã maleg tamo afenēdiyof, aya idegēya bunem tunĩ neid safina alen are, aya idi mugu mugu mala solo aiwa ifenēya teten ano fen, afenēdiyof.”

⁹ Age ye di, Jesus ï irokenen, “Gama kel yaleya anï fõ enei bun isil, ere nigin, tamo enï, ïg Abraham naal taka. ¹⁰ Ere nigin, Tamo Naal fõ delen anidi imirneïd fen, kel gei foug nigin isin.”

*Ferfer Ten Moni Imeid Bun Inon Nē Yaab Od
(Matyu 25:14-30)*

¹¹ Idi od enei karï de mog, Jesus tobol fe, yaab od taka irokenēdin, ere nigin, ï mogo Jerusalem melsã ifaref, anï nigin, tamo kayau Negur nē tano kaisã bagai wõ youf de fen, kisi difen. ¹² Anï nigin, ï iron, “Tamo taka yana odug ado, ï king dinenē di, kel isiyouf nigin fõ takã gerõ bagai ilen. ¹³ Anï nigin, ï yogon ferfer ten iweig laisi fen, moni wan tausen kina mugu mugu ifeneïd fen, irokenēdin, ‘Moni enei kabï wenēg mog, aya kelauf.’

¹⁴ “Anï ere, yogon tamo tar kiwai difen ken, eig de dirõf nigin ï dumen arũ tamo sur difen, ‘Amã tamo enei nemã king wõ youf nigin to oromak.’

¹⁵ “Anï ere, ï king yana yale fen, fonõ kel isin. Agef fen, ï, ferfer moni ifenēdin idi moni ado naig de kabï dalen anï ilouf nigin, iweignēdi di, disin.

¹⁶ “Tamo uyu ï isi iron, ‘Odug, aya ogon wan tausen kina bun, ten tausen kina taka alen.’

¹⁷ “Age ye di, yogon odug solof irokenen, ‘Õ ferfer biya, õ de agon! Õ safina naal bagai bun kabï biya walen nigin, taun ten lo weid.’

¹⁸ “Ï dô fiya taka isi iron, ‘Odug, aya ogon wan tausen kina bun, faif tausen kina taka alen.’

¹⁹ “Age ye di, yogon odug ïg irokenen, ‘Õ taun faif lo weid.’

²⁰ “Age fe di, ferfer taka isi iron, ‘Odug, ogon moni yeir. Aya moni anï gabar masak nem sile afe fen, anokon. ²¹ Aya õ nigin kumï aun, ere nigin, õ tamo total ado. Õ ereb to unokon anï waledig, onom to utenen anï kusu wodig.’

²² “Yogon odug ĩ irokenen, ‘Aya ogon od bunem es ayõf, õ ferfer sane! Õ kelein, aya tamo total ado, ayam to anokon anĩ aledig, ayam to atenen anĩ kusu afedig de?
²³ Ere wo fen, neu moni benk bun to unon? Ago wom are, sain aya kelauf bun, moni kabĩ yalen anĩ nẽ mala ado, moni õ benk wenen anĩ bagu fiya kel isin ado alem.’

²⁴ “Age ye fen, odug idi difaren anidi irokenẽdin, ‘Yogon moni son ge fen, tamo ten tausen kina ado anĩ wenẽg.’

²⁵ “Age ye di, idi ĩ dirokenen, ‘Odug, ĩ mogo ten tausen kina ado!’

²⁶ “Odug solof iron, ‘Aya ã arokeneik, taka ĩ ado, aya teten anouf, anĩ ere, taka ĩ sã bagai, ereb taka ĩ ado areg, ĩ bun tamal son fouf. ²⁷ Anĩ ere, neu kiwai tar, aya nedi king ibodõya nigin to orodin anidi, ein wageun gurig urousig fen, malau bun udenkesig.’ ”

Jesus Tamo Yana Ado Gen Jerusalem Ilen
(Matyu 21:1-11; Mak 11:1-11; Jon 12:12-19)

²⁸ Jesus od enei wogõ yel fen, Jerusalem iseleya nigin, ĩ ketem uyu iselen. ²⁹ Jesus Moul Arei* bun Betfage ado Betani fonõ kelẽ fiye ken, in dõ fiya tar uru sur feid irokenẽdin, ³⁰ “Fonõ wageik anĩ bun uleg, an wõg fen, donki naal difon anĩ ulogouf, are aibem taka anĩ bun to iyon. Anĩ biru weleg fen, ein urou usig. ³¹ Taka nem to yeif, ‘Ere nigin ã anĩ biru gef?’ urokenẽgouf, ‘Odug anĩ kabĩ ifenẽf nigin.’ ”

³² Anĩ nigin, uyu sur fedin idi dile, Jesus irokenẽdin kilei bagai anĩ fotou difen. ³³ Idi donki naal biru de mog, anĩ nẽ marau tamo idi to difiyẽdin, “Ã ere nigin donki naal anĩ biru gef?”

³⁴ Idi ĩ solo de dirokenen, “Odug anĩ kabĩ ifenẽf nigin.”

* **19:29:** ‘Oliv Arei’ dedig.

³⁵ Idi donki naal anī Jesus wagen dirousi fen, idi neid gabar teten dirara ken, ī anī teten dinenē ibodon. ³⁶ Jesus iyok ile mog, tamo kayau idi neid gabar naabur du difedin.

³⁷ Sain ī iyok isi, naab Moul Arei bunem isileya non, in dō fiya tar ganan, memelik ganan inodin dilen nigin, waud al fiya ado aiteid odug nem Negur yana dalesen:

³⁸ “King, Odug yana bunem isif, are ī el fiya ado!”*

Saa ilun wau inosiya ado, ilun bagai fula fiya medeīya ado!”

³⁹ Tamo kayau atun, Farisia tamo tunī Jesus dirokenen, “Tise, ogon dō fiya tar sakā wiyeīd!”

⁴⁰ Anī ere, Jesus solof iron, “Aya ā arokeneik, idi foro dalauf are, meein eneidi diweig dirōf.”

⁴¹ Ī Jerusalem kelē fiye ken, taun anī ile, wau gudū fe di, inā yale, ⁴² iron, “Ō Jerusalem naa enei bun, ō nigin erebem waū inosiya irou isif anī ō keleim, are dem, anī ere, gama ō malā bun iminek. ⁴³ Sain taka ō bun isiyouf, ogon kiwai tar, ō bun teneub mudu dino, salili diyokel, afi diyokalauf. ⁴⁴ Idi ō tenebur dale dirāyōf, ō ado gerē tar ogon kau namen difaref geid. Idi meein taka taka teten ditorō di, to ibodōf, ere nigin, Negur ō bun isin nē naa anī to ulegen nigin.”

Jesus Tempel Bun

(Matyu 21:12-17; Mak 11:15-19; Jon 2:13-22)

⁴⁵ Jesus tempel modoū bun ile, idi ereb ereb na nigin sur de mog, an irudidin. ⁴⁶ Agef fen, Jesus idi irokenēdin, “Negur nē Itotoya bun ibodok, ‘Neu fō are, kosēya nē fō ibodōf;’* anī ere, āgem ‘bē tamo neid iminēya fō’* unogen.”

* **19:38:** Sam 118:26 * **19:46:** Asaia 56:7 * **19:46:** Jeremaia 7:11

⁴⁷ Naa ganan Jesus tempel bun ifelnēdidin. Anī ere, pris odudug, lo ifelnēdiya tamo, tamo kayau neid mudur adodo geid, Jesus dukesiyouf nigin naab dimiren. ⁴⁸ Anī ere, idi age difouf nigin naab taka to dilen, ere nigin, tamo kayau ganan in od anī diroun.

20

Jesus Aim Igirnen Anī To Difiyen
(*Matyu 21:23-27; Mak 11:27-33*)

¹ Naa taka bun, Jesus tempel bun tamo kayau ifelneīd fen, biya od wogō yen. Agef mog, pris odudug, lo ifelnēdiya tamo, mudur adodo geid, ī gein disin. ² Idi diron, “Aim ō igirnō di, ō ereb ereb enī ago wof anī urokanamā. Aim ō igirnon?”

³ Jesus aitedin yale iron, “Ayag to fiya taka afeneīf. Solog urokanag, ⁴ Jon naan igunēdin are saa ilun tamal de, tamo bunem?”

⁵ Idi dogo dogol katō de fen, diron, “Ada, ‘Saa ilun tamal,’ tauf are, ī to fouf, ‘Ere nigin ā ī nigin to momoi wiyēgen?’ ⁶ Anī ere, ada, ‘Tamo bunem,’ tauf are, tamo kayau ganan meeinem dinadauf, ere nigin, idi Jon ī profet den.”

⁷ Anī nigin, idi solo de diron, “Ī nain be tamal are amā keleī sā.”

⁸ Age de di, Jesus iron, “Ayag ā to arokeneīf, aim aya igirna di, aya ereb ereb enī age afedif.”

Tamo Kabī Lo Difedig Nē Yaab Od
(*Matyu 21:33-46; Mak 12:1-12*)

⁹ Jesus tobol fe, yaab od enei tamo kayau irokenēdin, “Tamo taka wain kabī yale, ī mala solo yalouf nigin wain kabī, kabī tamo tunī imeid bun ino fen, sain meluk uyu takā ilen. ¹⁰ Fito fiya sain, ī ferfer taka wain kabī lo fiya tamo gedin, wain biya tunī difenēf nigin sur fen. Anī ere,

idi ĩ du ken, sur difiyē di, ima sāsā ilen. ¹¹ ĩ ferfer taka sur fen, anĭ ere, idi tamo anĭg du ken, mama difenē di, ima sāsā ilen. ¹² ĩ baban takag sur fe di, idi ĩg darau difen ken, dumeitur diran.

¹³ “Age dife di, wain kabĭ marau iron, ‘Aya ere naig afouf? Aya neu kesu, oboiyou, sur afouf. Idi ĩ anĭ karĭ difiyēf be.’

¹⁴ “Anĭ ere, kabĭ lo fiya tamo idi ĩ dile fen, abob dirokenen. Idi diron, ‘Eĭ ĩ akorouf. Ada ĩ taukeis fen, akor eĭ nedauf.’ ¹⁵ Anĭ nigin, idi ĩ wain kabĭ dumeitur dira ken, dukesin.”

Age dife di, wain kabĭ marau naig fediyouf? ¹⁶ ĩ isi, kabĭ lo fiya tamo idenkeis fen, wain kabĭ anĭ tamo tunĭ ifenēdiyof.”

Sain tamo kayau od enei karĭ de fen, idi diron, “Enei to bagai agef wō youf!”

¹⁷ Anĭ ere, Jesus idi lo feid le fen, to fedin, “Age fiyauf are, ere gariya nigin Negur nē Itotoya bun eig ye irok:

“ ‘Meein are fō inoya tamom sane de fen, ditoron,

meein anĭ gama monog tor wō yen’*?”

¹⁸ Aib taka meein anĭ teten kubū youf, mereb fe fisik fouf, takag, aib taka meein anĭ ĩ teten kubū youf, ĩ danĭf aas lauf.”

¹⁹ Lo ifelnēdiya tamo, pris odudug geid, Jesus kaisā bagai irounēya nigin naab dimiren, ere nigin, idi kelein, ĩ idi nigin yaab od enei wogō yen. Anĭ ere, idi tamo kayau nigin kumĭ den.

Sisa Takis Ifenēya

(Matyu 22:15-22; Mak 12:13-17)

²⁰ Anĭ nigin, idi Jesus ololo difiye ken, kofo tamo sur difedin, kofo tamo idi idegēya bun madur tamo gen dilen. Idi Jesus ereb od wogōya bun kŭ fenē di, diroune ken, Rom

* 20:17: Sam 118:22

gawaman mudur nē lo fiya ado megeir bun dinenēf nigin kisi difen. ²¹ Anī nigin, kofo tamo Jesus to difiyen, “Tise, amā keleī, ogon wogōya ifelnēya ado madur. Ō takam in oroya dō wouf nigin wewu yō di, in oroya dō fen, taka wau morō to wenēdig, anī ere, ō momoi bun Negur nē naab ufelnamādig. ²² Amā Sisa takis mafenēf anī lo dō fiya de, sã?”

²³ Anī ere, Jesus idi namedin idegēya anī ile fen, irokenēdin, ²⁴ “Koin moni taka ufelnag. Ai nē malakanon ado itotoya anī bun ibodok?”

²⁵ Idi aiten dale diron, “Sisa nē.” Age de di, Jesus idi irokenēdin, “Age fiyauf are, Sisa nē are Sisa wenēg, Negur nē are Negur wenēg.”

²⁶ An Jesus mal atun wogō yen bun, idi ī ironēya kisi feleya sã. Idi ī solof iron anī bunem terefeit de fen, foro delen.

Mata Kel Fāya Bun Ai Nē Kayau Ibodōf?
(Matyu 22:23-33; Mak 12:18-27)

²⁷ Sadusia tamo idi dirōdig, laa bun tamal mata to ke de fã dedig, dedig anī tunim, to fiya eig fiya ado Jesus wagen disin. ²⁸ Idi diron, “Tise, Moses itotkanaman, are tamo taka, ne tura laaf fen, aiwa itornen, anī ere, kesu sãf are, tamo ī kayau waab anī yale fen, tura nē kesu diroukenēf. ²⁹ Gama tura tura sewen dibodon. Matu ketem kayau taka yalen, anī ere, kesu yaleya sã mog, tamo laa fen. ³⁰ Matu dō fiya bagam kayau anī yalen, ī laa fe di, ³¹ ī dō fiya bagam kayau anī yalen, age de dile dile, tura tura sewen ganan kesu sã gare desin. ³² Dum kayau areg laa fen. ³³ Anī nigin, dum laa bun tamal mata kel fāya sain bun, ī ai nē kayau ibodōf, ere nigin, tura tura sewen anidi adok ī dale dogolen?”

³⁴ Jesus aitedin yale iron, “Gama sain enei bun, tamo kayau yalef, kayau tamo yalef ya ibodok. ³⁵ Anī ere, sain

anĩ bun, idi laa bun tamal mata kel fãya sain bun dibodõf nigin kisi feleya anidi, an tamo kayau yalef, kayau tamo yalef ya sãf, ³⁶ idi baban gare deyag kisi feleya sã, ere nigin, idi engel gen. Idi laa bun tamal mata ke de fã def nigin, idi Negur nẽ gere tar. ³⁷ Anĩ ere, arein aa yã wõ yen nigin Negur nẽ Itotoya bun, Moseseg tamo gare den anĩ mata ke de fã douf nigin ifelnen, ere nigin, ï Odug nigin iron, ‘Abraham nẽ Negur, Isak nẽ Negur, Jakop nẽ Negur.’* ³⁸ ï laa neid Negur sã, ï mata ibodõya neid Negur, ere nigin, ï bun ganan mata dibodok.”

³⁹ Lo ifelnẽdiya tamo tunĩ aiten dale diron, “Tise, õ de urok!” ⁴⁰ Anĩ bunem idi kumĩ de fen, taka nem ereb taka nigin baban Jesus to, to fiyen.

*Ai Nẽ Kesu Anĩ Kristus?
(Matyu 22:41-23:7; Mak 12:35-40)*

⁴¹ Age dife di, Jesus idi irokenẽdin, “Naig fe di, idi Kristus ï Dawid nẽ Naal dedig? ⁴² Dawid ï yogo Buk Sam bun kurõ falaisin:

“ ‘Negur neu Odug irokenen,

“Imau biya melem ubod mog,

⁴³ ogon kiwai tar

on yẽ inoya nẽ sawa anouf.” ’*

⁴⁴ Dawid ï nigin ‘Odug’ yef, age fiyauf are, naig fe di, ï Dawid naaluouf?”

⁴⁵ Tamo kayau ganan karĩ difiyẽ mog, Jesus in dõ fiya tar irokenẽdin, ⁴⁶ “Lo ifelnẽdiya tamo nigin lo welegei. Idi gabar meluluk difonunakel diyo ken, maket modoũ bun aan difiyẽdiyof anĩ orodidig. Age de fen, idi Juda neid uub fõ bun sia biyai biyai bun dibod ken, tar inoya bun modoũ malabag malabag bun dibodõdig. ⁴⁷ Idi kayau waab idegnẽdiya bunem nedi fõ sosoin difeid fen, meleid

* **20:37:** Eksodas 3:6 * **20:43:** Sam 110:1

yaleya nigin meluk bagai kosẽ dedig. Tamo age fediya, mala solo darau sane bagai dalouf.”

21

Kayau Waab Nē Safina Negur Ifenēya
(Mak 12:41-44)

¹ Jesus mala irã, tamo kayau safineid adodo, nedi kolekta moni tempel bogis bun dino mog, iledin. ² Takag, ï lof mog, kayau waab maleg taka isi, peni giriya moni nanaal uru inon. ³ Agef fen, Jesus iron, “Aya ã momoi arokeneik, kayau waab maleg enĩ ï, ganan wal fediya, odug bagai bogis bun inol. ⁴ Tamo kayau enei ganan, dogo neid safineid bun tamal, nedi kolekta moni dinon, anĩ ere, kayau anĩ, maleg bun ï mata ibodõf nē anĩ ganan inon.”

Idikeleya Sain Nē Uris
(Matyu 24:1-35; Mak 13:1-31)

⁵ In dõ fiya tar tunĩ, tempel meein biya biya nem ado, safineid biyai Negur difenen anim, tempel naki difiyen anĩ nigin wogõ den. Anĩ ere, Jesus iron, ⁶ “Á ulegef enei nigin, sain fau isiyouf, meein enĩ taka to abob tete tete yenēf, anĩ adok fau isog irailauf.”

⁷ Idi to difen, “Tise, ere sain eneidi wõ youf? Ere uris anĩ, eneidi kisi falauf nigin wõ youf?”

⁸ Age de di, Jesus iron, “Takam to idegneif nigin lo weleg. Ere nigin, musei aya yanau nem disi dirõf, ‘Aya Kristus,’ takag, ‘Sain mogo melsak.’ Age de di, to dõ wiyēdig. ⁹ ã kusĩ nigin ado, kantri bun kiwai fen, gawaman narĩ difef ya karĩ gouf, ã to tererē gei. Ereb ereb enidi ketem wõ youf bagai, anĩ ere, idikeleya anĩ, sain anĩ bun bagai to wõ youf.”

¹⁰ Age ye fen, Jesus idi irokenēdin, “Teneub taka fã ye fen, ï teneub taka nigin kiwai ifenēf, tano taka ï tano taka

nigin kiwai ifenēf. ¹¹ Mimĩ odug wowā youf, naũ odug ado dagi total, modoũ taka taka bun wowā youf, ereb ereb kumīya nē ado uris odudug, saa bun wowā youf.

¹² “Anĩ ere, eneidi ganan fau to wõ ye mog, idi kaka diyeyi ken, kafĩ fiya difeneĩf. Idi Juda neid uub fõ bun ado kalabus bun dineneĩf. Age de fen, ã king ado gawaman mudur adodo meleid bun dirouleyeĩf, anĩ ganan aya yanau nigin de fen, age diyeyĩf. ¹³ Naab enei bunem, ã idi meleid bun, aya nigin kurõ wesigouf. ¹⁴ Anĩ ere, ã idi meleid bun aug isenneĩya nigin dodok ge fen, to wogõ gouf nigin ã kisi ketem ufokeleg. ¹⁵ Ere nigin, aya, od ado kisi biya, ãgenei kiwai tar takam solof irõya be, kiwai ifenēya kisi feleya sã anĩ afeneĩf. ¹⁶ Anĩ ere, ã fau sineĩ temeĩ tarem, tureĩ tarem, sirag ado neĩ mou taremeg kiwai difenei ken, ã tunĩ laa bun dineneĩf. ¹⁷ Tamo ganan, aya yanau nigin de fen, ã kiwai difeneĩf. ¹⁸ Anĩ ere, mudureĩ bun, fatiyeĩ tekelei bagai to iminkalauf. ¹⁹ Megeir ifareya bunem, mata walogouf.

²⁰ “Sain ã Jerusalem kusĩ tamom salili dife mog, ulogouf, ã keleĩ youf, Jerusalem fonou inenēya anĩ melsak. ²¹ Age fiya ulogouf, idi Judia distrik bun dibodok, arein diya diselauf, idi taun anĩ bun dibodok, anenem diyalalauf, idi taun yerin difaref, namen to dilauf bagai. ²² Ere nigin, sain enei are, Negur nē Itotoya bun ibodok ganan kisi falauf nigin darau ifenēya nē sain. ²³ Naa anĩ bun, kayau bouweid ado, kayau kesu su difenek ado, idi meleidlon ado. Teneub anĩ bun, morõ odug wõ ye fen, Negur nē didi, tamo kayau enei bun isiyouf. ²⁴ Idi dimig nem didenkeis, kalabus tamo gei difeid fen, teneub ganan bun diroulediyouf. Jerusalem fau haiden Israel sã anidim lalai difeid dile, haiden Israel sã anidi neid sain anĩ kisi falauf.

²⁵ “Uris gaa bun, ogõ bun ado, barisa bun wõ youf. Tenebur ein, teneub ganan bun moloun fire bagai fã ye

fen, maaĩ gugu re di, idi kisi gurũ ye fen, nene douf. ²⁶ Tamo kayau, teneub bun ere wowã youf de fen, kumĩ de, meleid waĩ youf, ere nigin, saa nẽ megeir guyoyõ douf. ²⁷ Sain anĩ bun, tamo idi, Tamo Naal lalo bun megeir ado fula fiya medeĩya barikã isi mog, dilouf. ²⁸ Ereb ererb enei gariya ino, wõ ye di, ufareg fen, mudureĩ utadseg, ere nigin, kel yaleyeĩya are melsak.”

²⁹ Age ye fen, Jesus yaab od enei irokenẽdin, “Ã aa fig ado aa ganan ulogouf. ³⁰ Sain idi aarau ifiraũd mog, anĩ ã aug uleg fen, ã keleĩdig, saneya melsak. ³¹ Age fiya bagai, ererb ererb eneidi wõ ye mog, ulogouf are, ãg keleĩ youf, Negur nẽ tano are mogo melsak.

³² “Aya ã momoi arokeneik, tamo kayau sain enei bun dibodok anidi to gare de mog, ererb ererb eneidi ganan wõ youf. ³³ Saa teneub ado sa kalauf, anĩ ere, neu od to bagai sa kalauf.

³⁴ “Lo walagauf, sãf are, saafei ge, aai naanuei ge fen, tenebur mata ibodõya nigin sii fiya anim, ãgenei wauĩ bun kafĩ yeĩ di, ã keleĩ sã mog, Negur nẽ naa kor gen ã bun isiyouf. ³⁵ Naa are, tenebur tamo kayau ganan bun wõ youf. ³⁶ Eneidi ganan wowã you fenẽ anĩ wal fiya kisi falauf nigin ado, Tamo Naal mala bun ufaragauf nigin, ã faimud ololo wog fen, kosẽ gouf.”

³⁷ Naa ganan, Jesus tempel bun ifelneĩd fen, aragau ganan, Moul Arein isel fen, bõ an ibodõdig. ³⁸ Age fe di, tamo kayau ganan, tempel bun karĩ difiyẽf nigin, bonimeĩ bagai disidig.

22

*Judas Jesus Mudur Adodo Imeid Bun Inouf Nigin Yo Yen
(Matyu 26:1-5; Mak 14:1, 2, 10, 11; Jon 11:45-53)*

- ¹ Gama Bret Yis Sã Sifa naa, Pasa naa dedig melsã di,
² pris odudug, lo ifelnẽdiya tamo geid, Jesus yukesiya

nigin naab dimiren, ere nigin, idi tamo kayau nigin kumĩ den. ³ Age fe di, Satan, Judas, Iskariot tamal dedig, tuwelf dō fiya tar atun taka, ĩ namen ilen. ⁴ Age fe di, Judas ile, pris odudug ado tempel lo fiya tamo neid uyu irouya bun wō ye fen, idi geid ĩ naig fe Jesus kiwai imeid bun inouf nigin katō difen. ⁵ Idi od enĩ karĩ de, waud al fe fen, ĩ moni difenēf nigin dirokenen. ⁶ Judas ĩ yo ye fen, tamo kayau to guru de mog, Jesus idi imeid bun inouf nigin naab imirek ilen.

Jesus In Aposel Geid Idikeleya Nē Bō Saaf Don
(*Matyu 26:17-35; Mak 14:12-31; Jon 13:21-30, 36-38*)

⁷ Anĩ dumen, Bret Yis Sã anĩ nē naa wō yen, anĩ bun idi Pasa naa nigin sipsip naal diden ken, sesewi difedig. ⁸ Jesus, Pita Jon ado sur feid fen, iron, “Uleg, ada Pasa naa nē saaf tãf nigin dodok wanadag.”

⁹ Idi Jesus to difiyen, “Õ, amã nain anĩ, Pasa naa nē saaf tãf nigin, dodok mafouf anĩ oroyok?”

¹⁰ Age de di, Jesus idi irokenēdin, “Taun wōg fen, tamo taka darum naan ado isi fotou yeĩf, ĩ fō bun ilauf anĩ dōg uleg. ¹¹ Agog fen, ã fō marau eig wiyēg urokenēgouf, ‘Tise õ irokonok: Aab nanĩ bun an, aya neu dō fiya tar geid, Pasa naa nē saaf mãf?’ ¹² Ago ge di, ĩ aab odug ilun anĩ ifelneĩf, an erab erab dodok de bure difelen. An neda nigin dodok gouf.”

¹³ Age ye di, idi dile, Jesus irokenēdin kilei erab erab age fiya dilen. Anĩ nigin, idi Pasa naa dodok difen.

¹⁴ Sain wō ye di, Jesus in aposel geid tebol bun dibodon. ¹⁵ Age de fen, Jesus idi irokenēdin, “Aya darau yaleya sã mog, ã geid Pasa naa nē saaf tãf anĩ orouf bagai. ¹⁶ Ere nigin, aya ã arokeneik, aya baban Pasa naa nē saaf to ãf ile, anĩ fau Negur nē tano bun kisi falauf.”

¹⁷ Age ye fen, ï kap yale, Negur de fiye ken, iron, “Enei waleg fen, ã atun foig. ¹⁸ Aya ã momoi arokeneik, aya baban wain to ãf ile, Negur nē tano isiyouf.”

¹⁹ Age ye fen, Jesus bret yale, Negur de fiye ken, mumã fen. Agef fen, ï in dō fiya tar ifeneïd fen, iron, “Eï neu bouwau, ã nigin afeneik. Enei agog fen, aya nigin kisi gouf.”

²⁰ Age fiya bagai, saaf bure difel fen, Jesus kap yale, iron, “Kap enei, neu naudou bun, ã Negur geid bar itenēya mata, naudou are ã nigin fi felef. ²¹ Anï ere, taka aya kiwai imeid bun inoyauf, are ein tebol bun urom imamã manof. ²² Momoi, Tamo Naal ï nigin iron kilei agef ilauf, anï ere, tamo ï kiwai ifenek, ï malalon ado.” ²³ Age ye di, idi dogo dogol toti difen, idi atun aim bagai tobonunã enei age fouf.

²⁴ Takag, idi atun aim anï odug bagai ibodōf nigin luwa diroun. ²⁵ Age dife di, Jesus idi irokenēdin, “Haiden neid king, dogo neid tamo kayau lo difedig, idi dogo neid megeir tamo kayau bun yaor difedig, are ada biya difadauf dedig. ²⁶ Anï ere, ã age fiya anï to ago gouf. Age fiya ban, ã atun odug ibodok are, kesu naal gen ibodōf, takag, uyu irouya tamo ï, aruna yaleya tamo gen ibodōf. ²⁷ Ai anï odug, taka tebol bun ibodok anï de, taka ï aruna yalef anï? Taka ï tebol bun ibodok anï sã de? Anï ere, aya ã atun aruna yaleya tamo gen abodok. ²⁸ ã anï, neu kisi fiya isi di, aya bun toku ufaregen. ²⁹ Neu Dei tano aya ifanan gen, ayag tano ã afeneik. ³⁰ Age afe di, ã neu tanon, tebol bun saaf ado naan wãgaur, king nē sia bun ubodōg fen, Israel ibor tuwelf es gouf.

³¹ “Simon, Simon, tamo wit biya ado wit ido foi fiya nigin age fedig gen, Satan ï ãgenei momoiya kisi yeï fenē nigin to fen. ³² Anï ere, aya, Simon ò nigin ogon momoiya to urofosiyouf nigin kosē aun. Anï nigin, sain ò kelouf, turã tar megeir wediyouf.”

³³ Anĩ ere, Pita aiten yale iron, “Odug, aya õ ado kalabus bun ado, laa bun ileyã nigin dodok afel.”

³⁴ Age ye di, Jesus iron, “Pita, aya õ arokonok, gama fau tataro kokorok yeya sã mog, õ wa fen, aya nigin keleĩ sã wo, towo wouf.”

³⁵ Age ye fen, Jesus idi to fedin, “Sain aya ã moni nẽ kodol, faa be, su sã sur ayein, ã ere taka lau gen de?” Idi solo de diron, “Sã.”

³⁶ Age de di, Jesus idi irokenẽdin, “Anĩ ere, gama taka ã moni nẽ kodol adouf, yalouf, faag age fiya, taka ã dimig sã, yogon gabar na nigin sur fe fen, taka na yalouf. ³⁷ Negur nẽ Itotoya bun eig ye ibodok, ‘ĩ tamo sesen geid bagu difedin.* Aya ã arokeneik, enei aya bun kisi fel, agef wõ youf. Ariya, aya nigin itoton are mogo kisi felef.”

³⁸ In dõ fiya tar diron, “Ulef, Odug, dimig uru yeir.” Age de di, ã iron, “Are de.”

Jesus Moul Arein Kosẽ Yen

(Matyu 26:36-46; Mak 14:32-42)

³⁹ Agef fen, Jesus aabẽ tamal ulõ yeis fen, gai age fedig gen, Moul Arein iselen, age fe di, in dõ fiya tareg ã dõ difiyen. ⁴⁰ Modoũ anĩ bun wõ de fen, Jesus in dõ fiya tar irokenẽdin, “Kisi fiya bun to kubũ gouf nigin kosẽ wog.”

⁴¹ Jesus yogon dõ fiya tar itorneĩd, meein irã di, ile kubũ youn age fiyan ile, ibor bobou fe fen, kosẽ yen, ⁴² “Dei, õ oroyõf are, kap enĩ aya bun walelauf. Anĩ ere, neu oroya to dõ wouf, on oroya dõ wo.” ⁴³ Engel taka saa ilun tamal, ã bun wõ ye fen, megeir ifenen. ⁴⁴ Age fe di, Jesus wau morõ fatuk fe di, ã total bagai kosẽ yen, age fe di, maab, naud isidig gen, tenebur kuku ren.

⁴⁵ ã kosẽ yel fen, fã ye, in dõ fiya tar gedin kel ile, waud gudũ falaisil, den mog, ileidin. ⁴⁶ Agef fen, Jesus idi to

* 22:37: Asaia 53:12

fedin, “Ere nigin mulaĩ wenẽgef? Ā kisi fiya bun to kuku gouf nigin fafåg fen, kosẽg.”

Jesus Dirounen

(Matyu 26:47-56; Mak 14:43-50; Jon 18:3-11)

⁴⁷ Jesus fau wogõ ye mog, tamo musei disin, tuwelf in dõ fiya tar idi anĩ atun taka, Judas dedig inim uyu iroukenẽdin. Ī Jesus umã fiyẽf nigin non ilen. ⁴⁸ Anĩ ere, Jesus ĩ to fiyen, “Judas, õ umāya bunem Tamo Naal kiwai wenẽf de?”

⁴⁹ Sain Jesus nẽ dõ fiya tar, ereb wõ you fenẽ age fe di, dile fen, idi diron, “Odug, amã nemã dimig nem madenauf de?” ⁵⁰ Age de fen, idi takam, pris mudur ado nẽ ferfer weder biyalẽ anĩ salõf iran.

⁵¹ Anĩ ere, Jesus iron, “Baban enei to ago gouf!” Age ye fen, ĩ tamo anĩ nẽ weder kobũf fen, el fiyen.

⁵² Agef fen, Jesus, pris odudug, tempel lo fiya tamo neid uyu irouya geid, mudur adodo, ĩ nigin disin anĩ irokenẽdin, “Ā bẽ tamo ounẽgouf gen, ã dimig adodo seburer adodo usigef de? ⁵³ Naa ganan, aya ã geid tempel bun tabodon, anĩ ere, ã aya bun imeĩ taka to unogen. Anĩ ere, eĩ āgenei sain, are gugum irouneik nigin.”

Pita Jesus Nigin Wa Fen

(Matyu 26:57, 58, 69-75; Mak 14:53, 54, 66-72; Jon 18:12-18, 25-27)

⁵⁴ Idi Jesus dale, diroune ken, pris mudur ado nẽ fõ bun dirou dilen. Pita ĩ so rel fen, dumeid dõ fen. ⁵⁵ Anĩ ere, sain idi fofomala atun yã kũ de dibodon, Pita ĩg an weim dibodon, ⁵⁶ Kabĩ kayau momoul taka, Pita yã sirin ibod mog, ilen. Kayau momoul anĩ Pita lo fel fen, iron, “Tamo eneig ĩ geid.”

⁵⁷ Anĩ ere, Pita waf fen, iron, “Kayau, aya ĩ keleĩ sã.”

⁵⁸ Sain naal ile di, taka nem ĩ ile fen, iron, “Õg idi neid taka.”

Anĩ ere, Pita iron, “Mou, aya sã!”

⁵⁹ Aua tekelei age fiya ile di, taka bagam ĩ nigin total iron, “Momoi bagai, tamo eneig ĩ geid diyon, ere nigin, ĩg Galili tamal.”

⁶⁰ Anĩ ere, Pita aiten yale iron, “Tamo, õ urok anĩ aya keleĩ sã!” ĩ irõ mog bagai, tataro kokorok yen. ⁶¹ Odug falei yel, Pita lo felen. Age fe di, Pita Jesus wogõ fiyen anĩ nigin weder fokõ yen, “Gama fau tataro kokorok yeya sã mog, õ aya nigin wa wo, towo wouf.” ⁶² Age fe di, ĩ mayarẽ ile fen, inã fatuk yalen.

*Kusĩ Tamo Jesus Diselinen
(Matyu 26:67, 68; Mak 14:65)*

⁶³ Tamo Jesus dirounen idi, ĩ diseline ken, wagĩ difiyen. ⁶⁴ Age dife fen, idi Jesus mala difofakel fen, to difiyen, “Kurõ weis urokanamã! Aim õ inok?” ⁶⁵ Age de fen, idi kono fiya od musei dirokenen.

*Jesus Juda Kaunsel Neid Kot Mala Bun Ifaren
(Matyu 26:59-66; Mak 14:55-64; Jon 18:19-24)*

⁶⁶ We fele di, tamo kayau neid mudur adodo neid kaunsel, are pris odudug, lo ifelnẽdiya tamo geid, weim guru de mog, Jesus idi gedin dirou dilen. ⁶⁷ Idi diron, “Õ Kristus ouf are, amã urokanamã.”

Anĩ ere, Jesus aitedin yale iron, “Aya ã arokeneĩf are, ã to momoi gouf, ⁶⁸ agef fen, aya ã to ayeĩfeg, ã to solog urõgouf. ⁶⁹ Anĩ ere, gama sain enei bunem ilauf ganen, Tamo Naal ĩ, Negur megeir ado ima biyalem ibodõf.”

⁷⁰ Age ye di, idi ganen to difiyen, “Age fouf are, õ anĩ Negur Naal de?”

Ĩ aitedin yale iron, “Ã de urõgef, aya anĩ.”

⁷¹ Age ye di, idi diron, “Ere nigin ada, ã nigin od megeir fiya nigin tamo baban tamirẽf? Ada ã sigoron bagai karĩ taul.”

23

Jesus Pailat Herod Ado Meleid Bun Ifaren

(Matyu 27:1, 2, 11-26; Mak 15:1-15; Jon 18:28-19:16)

¹ Age de fen, guru fiya ganan fã de, Jesus Pailat bun dirou dilen. ² Age de fen, idi mogo gariya dino, ã bouwa bun od du ken, diron, “Amã, tamo enei nemã tamo kayau ganan idegẽya bunem sanen guri feid irou ile mog, mailen. ã Sisa takis ifenẽya nigin katũ fiyeĩd fen, ã yogo nigin aya Kristus, aya king yen.”

³ Anĩ nigin, Pailat Jesus to fiyen, “Õ Juda neid king de?” Jesus solof iron, “Are de yer, õ urok anĩ.”

⁴ Age ye di, Pailat ã, pris odudug, tamo kayau geid irokenẽdin, “Aya tamo enei bou bun mosor taka to ailel.”

⁵ Anĩ ere, idi total dinon, “ã Judia distrik ganan bun, in ifelnẽya bunem tamo kayau waud yalen. ã Galili an gariya ino fen, tokõ fel eineg isin.” ⁶ Pailat anĩ karĩ ye fen, ã Galili tamal be anĩ to fen. ⁷ Pailat ã, Jesus Herod nẽ tano bun tamal yeya kelei ken, Herod gein sur fen, Herod ãg sain anĩ bun Jerusalem ibodon.

⁸ Herod Jesus ile fen, wau fatuk kulĩ yen, ere nigin, sain meluk bagai ã ileyã nigin oron. ã nigin karĩ yen nigin, Herod ã Jesus bun memelik tunĩ ilouf nigin age fen. ⁹ Herod Jesus musei bagai to fiyen, anĩ ere, Jesus taka to solof iron. ¹⁰ Pris odudug, lo ifelnẽdiya tamo geid an difaren, ã bou bun od total bagai dinon. ¹¹ Age dife di, Herod yogon kusĩ tamo geid, Jesus kasã difiye ken, kono difiyen. Age dife fen, kolos biya difounne ken, Pailat wagen sur difiyẽ di, kel ilen. ¹² Naa anĩ bun, Herod Pailat ado nigal dun, uruwa bun idi uruwom kiwain.

¹³ Pailat ï, pris odudug, mudur adodo, tamo kayau geid iweigneïd fen, ¹⁴ irokenēdin, “Ă tamo enei, tamo kayau waud yale fen, sane nigin weleid inon ge fen, waleg, urou usigel. Aya ā meleï bun to afiyem, anï ere, ā ï bou bun od unogen anï, tamo enei bun gariya taka to ailel. ¹⁵ Herod ïg age fiya, anï nigin, ï kel sur fe di, ada gein isil. Anï ulogouf, ï yukesiya nigin ereb sane taka to age fen. ¹⁶ Anï nigin, aya darau dogol afen ken, atornēf.”*

¹⁸ Anï ere, idi sigoreid takai fen, diweig diron, “Tamo enei ukesyouf! Barabas walis kanamă!” ¹⁹ (Barabas ï anï taun oun kusï yales fen, tamo yukesin nigin, kalabus bun dinenen.)

²⁰ Pailat, Jesus yalisenēya nigin baban total bagai irokenēdin. ²¹ Anï ere, idi baba baban diweig diron, “Aa tetek bun ũf! Aa tetek bun ũf!”

²² Age de di, Pailat ï irō, towo fen sain bun anï irokenēdin, “Ere nigin? Tamo enei, ere mosor inon? Aya ï yukesiya nē gariya anï, ï bun taka to ailel. Anï nigin, aya ï darau afen ken, atornēf.”

²³ Anï ere, idi aiteid odudug fen, ï aa tetek bun yŭf nigin, baba baban dirokenen. Age dife di, dogo neid aitedim, Pailat nē od lai difiyen. ²⁴ Anï nigin, Pailat, nedi oroya dō fiya nigin kisi yale fen, irokenēdin. ²⁵ Pailat ï, tamo kusï yales fen, tamo yukesi di, kalabus bun dinenen ï nigin tamo kayau to difiyen anï, yalisne ken, dogo neid oroya dō difouf nigin Jesus ifenēdin.

Jesus Aa Tetek Bun Dun

(*Matyu 27:32-44; Mak 15:21-32; Jon 19:17-27*)

²⁶ Idi Jesus dirou dile fen, Simon Sairini tamal, ï yogon fonom isi mog, luwen ï dale, aa tetek orowa se dife di, faali

* **23:16:** Itotoya tunï eig de ditoton: atornēf.” ¹⁷ Gama ï, kalabus bun tamal tamo taka, Sifa bun yalis kenēdiyof bagai.

fe, Jesus dō fen. ²⁷ Tamo kayau musei, kayau idi ï nigin waud gudŭf fen, inã dalen geid, dō difiyen. ²⁸ Anĩ ere, Jesus idi bun falei yel, idi irokenēdin, “Jerusalem nē barai tar, aya nigin inã to waleg, ã aug nigin ado gereĩ tar nigin inã waleg. ²⁹ Ere nigin, sain fau isiyouf bun, idi dirōf, ‘Kayau dali, kayau fau kesu gō fiya sã, kayau kesu su ifenēya sã anidi el fedif!’ ³⁰ Age de fen,

“ ‘idi arei dirokenēdiyof, “Teteman kukug!”

arei mudu dirokenēdiyof, “Kerub wamāg!” ^{*}

³¹ Tamo, aa mata mog, enei age difedif are, meti youf sain bun, ere wō youf?”

³² Lo wal fiya tamo uru idig, ï geid laa bun dinenēdiyof nigin dirou dilen. ³³ Sain idi modoũ yana Mudur Tuwan dedig wō de fen, an Jesus aa tetek bun dun, lo wal fiya tamo uru geid, taka biya melem, taka ki melem. ³⁴ Age dife di, Jesus iron, “Dei, idi neid mosor nigin weder tu kel, ere nigin, idi keleĩ sa ken, enei age difef.” Age fe di, idi aisaĩ kodē de fen, yogon kolos idi atun foifu difen.

³⁵ Tamo kayau difar fen, lo difeid mog, mudur adodomeg ï kasã difiyē diron, “Ĩ tunĩ isennēdin, ï Kristus Negur igirnen ouf are, utornēg len, yogo bouwa isennēf.”

³⁶ Kusĩ tamog dise fen, diselinen. Idi wain makik ado difen ken, ³⁷ diron, “Ō Juda neid king ouf are, ogo boũ usennēf.”

³⁸ Ĩ muduren itotoya eig ya yenen: EĨ JUDA NEID KING.

³⁹ Lo wal fiya tamo aa tetek bun difaren anĩ takam, Jesus kono fiyē iron, “Ō Kristus ouf are, ō ogo usenne ken, amã usennamãf!”

⁴⁰ Anĩ ere, lo wal fiya tamo taka im, ne tã ou fiye ken, iron, “Ō kafĩ fiya tekelei walef, anĩ ere, ō Negur to kumĩ wiyek de? ⁴¹ Ada urom darau talef, are de, ere nigin, ada

* **23:30:** Hosia 10:8

urom sane age tafen anĩ mala solo. Anĩ ere, tamo enei ereb sane to age fen.”

⁴² Age ye fen, ĩ Jesus irokenen, “Jesus, sain õ ogon tano bun usel fen, aya karĩ wiyalauf.”

⁴³ Age ye di, Jesus tamo anĩ irokenen, “Aya õ momoi arokonok, gama õ aya ado paradis bun tabodõf.”

Jesus Laa Fen

(Matyu 27:45-56; Mak 15:33-41; Jon 19:28-30)

⁴⁴ Gaa atun tuwelf kilok age fiya bun, teneub ganan bun gugum kelef ile, tri kilok aragaun, ⁴⁵ ere nigin, gaa mala ifokelen. Age fe di, tempel nẽ gabar anĩ atusil serek fe, uru wõ yen. ⁴⁶ Jesus ait odug nem iweig iron, “Dei, neu uur õ imã bun anof.” Agef iro ken, ĩ oboi irour yalen.

⁴⁷ Kusĩ tamo neid orowa, Jesus age fiya ile fen, Negur yana yales iron, “Momoi, tamo eĩ madur tamo.” ⁴⁸ Tamo kayau ganan idi lo fiya nigin guru difen, ereb anĩ wõ ye di, meledim dilen, are idi waud gudũf fen, akoreid du ken, firagagaũ difen. ⁴⁹ Anĩ ere, idi Jesus keleĩ anidi ganan, idi atun kayau Galilim ĩ dõ de disin anidig, so del difar fen, eneidi wõ ye di, lo difen.

Jesus Mũ Difen

(Matyu 27:57-61; Mak 15:42-47; Jon 19:38-42)

⁵⁰ Tamo taka yana Josef, ĩ kaunsel taka, madur tamo biya bagai, ⁵¹ anĩ nigin, ĩ idi neid tobonuneid ado od difon anĩ nigin to yo yen. ĩ Judia distrik bun Arimatea taun tamal, ĩ Negur nẽ tano isiyouf anĩ tari fen. ⁵² Josef ĩ, Pailat gein ile, Jesus bou buru yalouf nigin to fiyen. ⁵³ Agef fen, ĩ Jesus bou buru yale, irou isil, gabar lalau nem silef fen, matmat sa bun ku dalen an inenen, ku anĩ bun an taka to dinenen. ⁵⁴ Naa anĩ dodok fiya naa, Sabat naa mogo gariya inou fenẽ melsã.

⁵⁵ Kayau Jesus geid Galilim disin, Josef dō de, matmat ado, Jesus bouwa buru naig de dinof anī, lo difen. ⁵⁶ Age difel fen, idi fonō dile, bou wā fiya nē marasin ado moul sumeī biya bagai dodok difen. Anī ere, idi Sabat naa nigin itāfiya dō de fen, si dinon.

24

Jesus Mata Kel Fā Yen

(Matyu 28:1-10; Mak 16:1-8; Jon 20:1-10)

¹ Uub nē naa matu bun* bonimei bagai mumurei ado, kayau idi, bou wā fiya nē marasin dodok difen anī dale fen, matmat bun dilen. ² Age dife fen, idi matmat bun meein wele feleya dilen. ³ Anī ere, sain idi meku namen dilen, idi Odug Jesus nē bouwa buru an to dilen. ⁴ Idi enei nigin kisi musei dale mog bagai, tamo uru kolos medeīya barikā siridin difaren. ⁵ Age dife di, kayau kumī de fen, kususu de, teneub lo difen, anī ere, tamo idi kayau dirokenēdin, “Ā ere nigin laa atun mata tamo umirnēgef? ⁶ Ī ein sã, ĩ mogo fã yel! Ī Galili oun ã geid ubodög fen, irokenein anī, wedereī fokō youf, ⁷ ĩ iron, ‘Tamo Naal mosor adodo imeid bun dino di, ĩ aa tetek bun dukesiyouf, age dife di, naa towo bun, ĩ baban mata kel fã youf.’” ⁸ Age de di, kayau idi, in od anī wedereid fokō yen.

⁹ Sain idi matmat bunem ke de, diso fen, aposel ilewen tunī ganan geid, enei ganan wogō difiyēdin. ¹⁰ Kayau idi are Maria Magdala tamal, Joana, Maria Jems nē sina. Kayau anidi, kayau tunīg geid, enei aposel wogō difiyēdin. ¹¹ Anī ere, idi kayau nigin to momoi den, ere nigin, kayau neid od, idi bun auya gen. ¹² Anī ere, Pita fã yale, matmat bun gudu re ilen. Ī ku bun itin, gabar lalau dogol yen mog,

* 24:1: Are Sande.

ilen, agef fen, ereb anĩ wõ yen anĩ nigin, ã kisi musei yalef ile, yogon fõ bun ilen.

Emaus Naab Luwen
(Mak 16:12, 13)

¹³ Naa de anĩ bun, idi neid tamo uru, fonõ taka yana Emaus dilen, Jerusalem anenem Emaus are ilewen kilomita age fiya. ¹⁴ Idi urom, ereb ereb ganam wõ yen anĩ abob dirokenek dilen. ¹⁵ Idi eneidi nigin diro ken, katõ de dile mog, Jesus yogo isi, weim diyok dilen. ¹⁶ Anĩ ere, idi Jesus keleĩa nigin meleid ifofakelen.

¹⁷ Age dife di, Jesus idi to fedin, “Ã ere nigin naab luwen katõ ge usigef?” Idi dẽ del fen, idi neweid wau gudũ fiya ado agogon delen. ¹⁸ Idi taka yana Kleopas Jesus solof irokenen, “Õ ege Jerusalem nẽ ki tamo nigin, naa eneidi bun an ereb ereb wõ yen anĩ, õ keleĩ sã de?”

¹⁹ Age ye di, Jesus idi irokenẽdin, “Ere bagai?” Idi Jesus dirokenen, “Jesus Nasaret tamal nigin. ã profet taka, Negur ado tamo kayau ganam meleid bun, od ado tobonunã bun megeir barikã. ²⁰ Pris odudug, neda mudur ado idim, ã laa bun dinenẽf nigin imeid bun dino di, aa tetek bun dukesin. ²¹ Anĩ ere, amã waumã iron, im anĩ Israel tamo kayau kel gei foug maun. Anĩ dogol sã, enei ganam wõ yen are, gama naa eneim mogo naa towo ilef. ²² Takag, amã nemã kayau tunĩg, amã terẽ difamam. Gama bonimeĩ bagai, idi matmat bun dilel, ²³ anĩ ere, idi yogon bouwa buru to dilel. Idi dile, meleid seleulã kurãf fen, engel diledin, engel idi dirokenẽdil, Jesus ã mata ibodok, difiyẽdi di, disĩ, amã dirokanamam. ²⁴ Age de di, amã tunĩ matmat bun dile, kayau wogõ del gen bagai dilel, anĩ ere, idi Jesus to dilel.”

²⁵ Jesus idi irokenẽdin, “Ã neneya bagai, ã profet wogõ den anĩ ganam, wauĩ bun momoiya nigin folo reya bagai!

²⁶ Kristus ã darau enei yale fen, yogon fula fiya medeĩa

namen to ilauf de?” ²⁷ Age ye fen, ĩ Moses ado profet ganan neid itotoya bunem gariya ino fen, yogo nigin Negur nē Itotoya ganan bun ibodok anī, idi faded fedin.

²⁸ Idi fonō dilef nē anī kelē difiye ken, Jesus tokō feleya nigin suma ino genen. ²⁹ Anī ere, idi totol bagai dirokenen, “Amā geid tabodōf, ere nigin, gaa mogo kuru kelef, gugum irousif.” Anī nigin, Jesus idi geid dibodōf nigin namen ilen.

³⁰ Sain ĩ idi geid tebol bun dibod ken, ĩ bret yale, Negur de fiyē, mumāf fen, gariya ino ifenēdin. ³¹ Age fe di, idi meleid fara fele di, idi Jesus nigin kelein. Age dife di, ĩ idi meleid bun iminkelen. ³² Idi abob dirokenen, “Sain ĩ naab luwen wogō fada fen, Negur nē Itotoya faraf ifelnadal mog, ada namedan wauda to tōf yalel de?”

³³ Age de fen, idi fā de dale, kaisā bagai Jerusalem keku de dilen, an idi aposel ilewen, tamo tunī idi geid, guru de difar mog, fotou difedi di, ³⁴ diron, “Are momoi! Odug fā ye fen, Simon bun wō yen.” ³⁵ Age de di, tamo uru ereb naab luwen wō yen ado, Jesus ĩ bret mumā fe di, idi Jesus nigin naig de kelein anī wogō den.

Jesus In Dō Fiya Tar Bun Wō Yen

(Matyu 28:16-20; Mak 16:14-18; Jon 20:19-23; Aposel 1:6-8)

³⁶ Idi fau enei nigin wogō de mog, Jesus yogo idi atun ifar fen, irokenēdin, “Wau inosiya ā ado ibodōf.”

³⁷ Idi baraū mailef de fen, terē de fen, kumī den. ³⁸ Age dife di, Jesus idi irokenēdin, “Ere nigin ā wauī morō fef, ere nigin ā wauī bun kisi uru wō yef?” ³⁹ Aya imau yeu ado feleg. Eī aya yug bagai! Kobū wiyag fen, uleg. Baraū ĩ aya bouwau ado, tuwau ado uleyagef gen sã, ĩ bou sã, tuwa sã.”

⁴⁰ Jesus enei iro ken, ĩ ima ye ado ifelnēdin. ⁴¹ Age fe di, idi waud kuliya ado terēya bunem, fau waud to momoi de di, Jesus idi to fiyēdin, “Ā ereb yōya nē taka ein tau ado?”

⁴² Idi gau yā tamal masak taka difenen, ⁴³ age dife di, Jesus gau yale, meledin yon.

⁴⁴ Jesus idi irokenēdin, “Enei are, aya fau ã geid tabodon sain bun arokenein. Ereb ereb ganan, aya nigin Moses nē Lo bun, profet neid itotoya bun ado, Buk Sam bun ditoton anī ganan kisi falauf bagai.”

⁴⁵ Agef fen, Jesus idi Negur nē Itotoya keleī youf nigin, waud kā fenēdin. ⁴⁶ 46 Ĩ idi irokenēdin, “Negur nē Itotoya bun eig ye irok: Kristus ĩ fau darau yale fen, laa bun tamal naa towo bun mata kel fã youf, ⁴⁷ age fe di, wau faleiya ado, mosor nigin weder tu keleya nē od anī, fau ĩ yana bunem teneub ganan bun, Jerusalem anenem gariya dino fen, wogõ de dilauf. ⁴⁸ 48 Ā enei ulegen nigin kurõ walaisi gouf. ⁴⁹ Aya esel fen, neu Dei sur afouf yen anī, ã bun sur afouf, anī ere, taun anī bun ubodõgef uleg, ã megeir saa ilun tamal anim ifounneĩf.”

Jesus Saa Ilun Iselen

(Mak 16:19, 20; Aposel 1:9-11)

⁵⁰ Sain Jesus idi gurif irou, Betani non dilen, an ĩ ima yales fen, el fiya ifenēdin. ⁵¹ 51 Ĩ idi el feid le fen, ĩ itornēdi di, saa ilun irou iselen. ⁵² Age fe di, idi ĩ yana dales fen, waud kulīya odug ado, Jerusalem ke de dilen. ⁵³ Age de fen, idi tempel bun toku dibod ken, Negur yana dalesedig.

Mata Ifenēya Nē Od
The New Testament in the Marik Language of Papua New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 19 Oct 2021 from source files dated 20 May 2021

d7099f9d-3bdf-5620-8eb3-7e6c51cab7ea